

Jesús kushipayabũ haska wakubainibukiaki

ATOS

**Deusú Yushĩ Pepa Jesús hawẽ tsumabu
hatu yubabainikiaki, na hãtxarã**

1 ¹Ë haibu pepa Teófilo, ha dukũ una ã mia keneshũ bumaimarã, ha dukũ Jesús hatu yusĩkĩ ashũkĩ taewabiranimarã, haska dasibi hakiri ã mia keneshũ bumaimaki. ²Nai anu kariama Yushĩ Pepaki dasia nishũ hawẽ tsumabu kuxipayabu yusĩkĩ hau haska katushũ txanima akubaishanũbũ hatu yunuyabis shaba betsatiã nai anu inakainikiaki. ³Hanua ma mawabixina besteimashũ hawẽ yura kayabi ana shabakabi hatu kayatiwamakĩ hau unãtihairawanũbũ shaba 40 dia hatu uĩmakĩ haskai Deus nuku shanẽ ibushũshanaikiri hatu hãtxa wakubainikiaki.

⁴Hanua Jesus hawẽ kuxipayabube niyushũ hau Jerusalém anua kaĩbaĩyamayushanũbũ hatu nemakĩ yuikĩ:
—Haska Epa Deusú matu yubani ã matu yuixinarã, hau matu inãkĩ yunushanũ nenua kaĩama habianushũs manayushãkãwẽ. ⁵Txanima Joãonẽ henuwẽ dukũ hatu naximakubaĩyamaki. Hakia eãnã, habiaskari wakĩ samama duakabi Deusú Yushĩ Pepawẽ ã matu naximashanaii, matu unãti wamakinã— hatu waya

Deusú nai anu Jesus aniai hawẽ tsumabũ uĩnibukiaki, na hãtxarã

⁶hanushũ hatube itxabu betsã Jesus yukakĩ:
—Shanẽ Ibuũ, na habiatianã, nawabu nitxĩtã nukunabu Israelbu ana hatu pewakĩ kuxipa wai mĩ hatũ shanẽ ibui taei kai?— akabu

⁷Jesús hatu kemakĩ:
—Hatiãra ibubis hawẽ kuxipawẽ Epa Deusú haska washanairã, matunamaki, mã unãtirubumarã. Hatũ besti unaĩkiki. ⁸Haska mã hawẽ unãtirurã, hawẽ Yushĩ Pepa matu anu huaya hawẽ kuxipa bitã

Jerusalém anushū inū Judéia mai pakea inū Samaria mai pakea ha dabe hirabi anushū inū txaihaira mai kesua anu hiwebaunabu anu bukubaũkĩ ekiri mā hatuki txanikũkaĩyushanai— hatu wai ⁹nĩkakĩ uĩaĩbũ Jesus haskabiamana nai anu Deusũ ainikĩ dütābainai nai kuĩ bekĩ bepukĩ huneaya ana uĩabumakẽ ¹⁰Jesus haska kaĩkĩ hatu henebainai uĩ naiuri teskāshũ uĩkĩ heneriabumakẽ huni dabe tima tari hushupa sawea damia hatu bebũ nituxitã ¹¹hatu yuikĩ:

—Galiléia anuabuũ, haskakĩ mā naiuri uĩaĩ? Na habias Jesus matu anua nai anu Deusũ ainiairã, haskakainai mā dama uĩshu keskariai ana habiaskariakirāshanikiki, hauriarirã— hatu wabu

Jesusũ tsuma kuxipaya betsa wakĩ Matias katunibukiaki, na hãtxarã

¹²hanua Oliveiras Mati anua Jesusũ tsuma kuxipayabu Jerusalém anu ana txitũbirani quilômetro bestitxai hatishũ yununi besti anu huĩrukütitiã katani ¹³haskabirani ha mae anu hikitã hanu ikabu hiwe keyatapa dũtu merã mapekenibukiaki, Pedrorã, Joãonã, Tiagorã, Andrérã, Filiperã, Tomérã, Bartolomeurã, Maturã, Alfeũ bake Tiagorã, Simão Zelote hatũ nawabu nitxĩkatsis imisrã, Tiagõ bake Judasrã. ¹⁴Habu haskabiranima ha dũtu anu itxai Jesusũ betsabũ inũ, hawẽ ewa Maria inũ, aĩbuaĩbu habũ ikũwaĩbu hatube itxashũ shaba tibi hau Deusũ hatu merabewanũ yukakubainibukiaki.

¹⁵Ha shaba tibi haskakubaĩkĩ shaba betsatiã ¹²⁰ikũwaĩbu hatube itxa maniabu Pedrõ hatu yuinũ ika benitã hatu yuikĩ:

¹⁶—Ê betsabũ inũ ẽ puĩbuũ, haska bebũkiri Judaskiri Deusũ Yushĩ Pepatũ Davi yuia kenenirã, habias Judasĩ akĩ meneimaki. Haska wanikiri akĩ txanima hatũ hatu iyushũ Jesus hatu atximaimaki. ¹⁷Hamẽ Judasrã, ha dukũ Jesusũ nukube katushũ nukube daya inãriayama ikimaki. ¹⁸Haska Judasĩ txakabu xinãkĩ hawẽ Shanẽ Ibu hatu atximaxina ha pei pakabu hawẽ txakabuwẽ taeshũ bixiãwẽ taeshũ huni betsã bai ture bitã hanua Judas ibubis ikirã, manaũria maikiri besukirã tĩ iki pupeshekei puku haras iki keyutã mawanikiaki. ¹⁹Jerusalém anu hiweabũ nĩkatã ha bai kenakĩ: “Aceldamaki”, akĩ kenakinã, hatũ hãtxawẽ yuiarã: “Himi baiki”, anibu kenamisbuki. ²⁰Txanima Salmos una merã Judaskiri Davi bebũkiri yuikĩ:

‘Hawẽ mae henebainaya ana tsua hanu hiweama ishanikiki’,
ani inũ:

‘Hawẽ daya henebaina huni betsã hau ibu washanũwẽ’,
aniki.

²¹—Haska Davi kenenikiri xinãnãkãwẽ. Nukubetã Jesus txibãmisbũ na hunibu nũ hatube pashkaisma Shanẽ Ibu Jesus nũ txibaĩtiã nukube ikubirãxinabu nũ hayaki. ²²Joãonẽ Jesus naximai uĩtã ikũwãbiranibu inũ nai anu Jesus inai habũ uĩxinabu hau habu betsa nukuki dasitã hari

hau haska Jesus mawa bestêkainima hau nukube hakiri txanikûkaïshanũ
betsa katunākāwē— Pedrõ hatu watã

²³hanushũ huni dabe José Barsabás hawē kena betsa Justo inũ Matias
katutã ²⁴habũ eska Deus hatu yukashũkĩ:

—Shanē Ibu Deusuũ, dasibibũ xinã mĩ unāiwē taeshũ na huni dabe
pepa haratura mĩ katuai nuku uĩmawe, ²⁵hau Judasĩ hawē txakabuwē
taeshũ hawē kuxipa daya benutã hanu nuitapai kakē hau hawē daya
kuxipa betsã binunã— atã ²⁶unākatsis ikĩ hawē unātiwē katukatsi unāti
watã putabu Matias unāti wabu kaïayã ha katuabu Jesusũ 11 tsuma
kuxipayabuki Matias dasitã hatube ikũkainikiaki.

Deusũ Yushĩ Pepa hatu anu hunikiaki, na hãtxarã

2 ¹Hanua ana betsatiã judeubu Pentecostes nawai besiaibũ Jesus
ikũwaïbu dasibi hanus itxabũ ²hawaira nai anua hawē bana niwe
kuxipa bei dãka imis keska shũku ibirani hanu maniabu anu kerũ
kerũ ikĩ ³haskakĩ Jesus ikũwaïbu tibi txi here keska shawakeakei hatu
mamaki maratamea hi ibauni hatuki hikiakeakeaya ⁴haskakĩ dasibi hatu
atximakĩ keyuaya haska hãtxatirubumabiakē nawa betsa betsapabũ hãtxa
tibiwē Deusũ Yushĩ Papatũ yuimakĩ hatu hãtxamakĩ taewaya

⁵mai pakea betsa betsapa anua judeubu Jerusalém anu hiwei benibu
hiweabũ habu pepakĩ Deusũ hãtxa txibākĩ menekĩ heneisbuma ⁶hawē
bana nĩkabirani hanu mirima itxashũ ikũwaïbu anu hãtxa betsa
betsapawē hãtxabaunaibũ harakiri xinātima hatu wakeakeabu huni tibitũ
mai kesua anua habũ hãtxawē hãtxaibu nĩkai haskawē hãtxaisbuma nĩkai
⁷haskakaïmaibu nĩkai e iki teku iake iakei hãtxanamebaũkĩ yuikĩ:

—Narã, Galiléia anuabumamē, na haska dasibi hãtxabaũkanairã?

⁸Nukũ hãtxa tibiwē hãtxabaunaibubĩ! Nũ nĩkai? Haskai ha hunibu haska
hãtxakanimēkai? ⁹Na nũ nukuburã, Partos anuabu inũ, Média anubu inũ,
Elão anuabu inũ, Mesopotâmia anuabu inũ, Judéia anuabu inũ, Capadócia
anuabu inũ, Ponto anuabu inũ, mai pakea Ásia anuabu inũ, ¹⁰Frígia anuabu
inũ, Panfília anubu inũ, Egito anuabu inũ, Líbia mai pakea Cirene dapi
anuabu inũ, Roma anuabu inũ, ¹¹betsa judeu kainibu inũ, betsabũ judeubũ
beya txibãmisbu inũ, Creta anuabu inũ, Arábia anuabu beimabu nukũ hãtxa
tibiwē Deusũ kuxipawē e imatikiri yuiaibu nũ hatu nĩkai— iake iakeaibũ

¹²haskaibu hatu nĩkatã dasibi harakiri xinātima e iki keyutã yuka iki:
—Na eska txani hãtxaiburã, hawamē?— ikaibũ

¹³hakia huni betsabũ hawa xinãmari hatu kashe wakĩ ikaibukiri hatu yuikĩ:
—Paëa daki hãtxai ikanikika!— ikaibũ

Pedrõ hatu tapĩmai hãtxanikiaki, na hãtxarã

¹⁴hanua Jesusũ 11 tsuma kuxipaya betsabube Pedrõ hatũ hãtxa nĩkai
benia nishũ hui kuxipawē hatu yuikĩ:

—Judeubu inũ dasibi Jerusalém anu hiweabuũ, eska ẽ matu yuiái nĩka peirawakãwẽ, haska mã nĩkai hãtxairã. ¹⁵Na yuraburã, paẽabumaki, haska mã xinãkĩ ikũwaĩ keskamarã. Haskai e iskaũ bari keyariamabiakẽ 9:00 hora paẽtirubumaki. ¹⁶Hakia natiã haska tashniai nĩkakĩ mã uĩaiã, haska bebũkiri Deus yubakanishũ akikiki. Hawẽ hãtxa yuishunika Joel Deusũ hatu yuimaki:

¹⁷Deus txanii:

‘Ma bari hawẽ henei kaya ẽ Yushĩ Pepa yurabu anu ẽ hatu yunua hatuki dasikẽ matũ huni bakebu inũ matũ aĩbu bakebũ ekiri yusĩaĩbũ

berunãbu usha keskashũ
dami betsa betsapa uĩaiãbũ
anibubu usha ekiri namariashãkanikiki.

¹⁸Habiatiãri ẽ tsumabu hunibu inũ aĩbuaĩbu ẽ Yushĩ ẽ hatu inã ekiri yusĩbaũshãkanikiki.

¹⁹Haska inũ, nai anua hawẽ e imai kuxipa wakĩ
mai anuari dami betsa betsapari ẽ washanaii.
Himi habamakinã, txi wakinã, basnũ bai kua hawẽ kuĩ keska wakĩ
ẽ hatu uĩmashanaii.

²⁰Ë bake kuxipahairai txashakapai shanẽ ibui hua kemariamakẽ
shaba betsa betsapashanikiki.
Ha haskaitiã bari ana txashama mexu wakĩ inũ ushe ana txashamari
himi keska ishanikiki.

²¹Hanushũ tsuabũra: Ë Shanẽ Ibu Yavé Deus kuxipaki, ikĩ
ea yuiaiibu habu besti pashakĩ hatũ hiwea ikibi ika bishãkanikiki’,
aka Joelĩ yusitã nuku keneshuniki— iwanã, Pedrõ ana hatu yuikĩ:

²²—Israelbuũ, ẽ matu yuiái ea nĩkakãwẽ. Matunã, mã unãhairaii.
Jesus Nazaré anua hua Deusũ kuxipa watã hawẽ e imati inũ hawẽ
unãti wamakĩ dami itimaska tsuã atiruma wamakĩ hawẽ kuxipa matu
uĩmakĩ Deusũ amakeakekĩ shabakabi matu uĩmakubainimaki. ²³Haska
yubakani Deusũ ha huniwẽ abainai xinãma haska wai beshtenũ, iwanã,
matũ hawẽ bake danãkĩ haki yubakatã hatu atximatã tenãmanũ, iwanã,
huni txakabu mã hatu mastamaimaki. ²⁴Hakia mawabiakẽ Jesus Deusũ
ana bestẽwaĩmaki, mawamamistũ isĩ tenemakĩ baxitirubia hawẽ hiwea
yabutiruma binumakinã. ²⁵Hamẽ shanẽ ibuhaira Davĩ Jesus iki kaikiri
yuikĩ:

‘Ë shanẽ ibũ ea mekekĩ
ẽ yusiuri hawẽ kuxipawẽ ea merabewai ẽ uĩkubainaya
hawa tsuã ea maematã binũtirumaki.

²⁶Haskawẽ taea huĩti xinã txãkaĩ benimai nawakĩ kẽwãkĩ heneama
ẽ hiwea dasibiwẽ ikũwaĩ hawa dateama ẽ ikũkaĩshanaii.

²⁷Mawabu hanu dasibi bumisbu anu ka

mĩ meribi mĩ tsumapã yura maiwati tãpe anu
hau dakai txapuyamashanũ mĩ nemashanaii.

28 Haska watã hanu hiwekuĩ kati bai ea unãmatã
mia anu hiwemakĩ mĩ ea benimawakubaĩshanaii’,
akĩ nuku keneshuniki— iwanã, ana Pedrõ hatu yuikĩ:

29—Ë betsabu inũ ã puibuũ, nukũ shenipabu kayabi Davikiri txanima
shabakabi matu yuinũ ea nĩkakãwẽ. Davi mawa hanu maiwakĩ hawẽ
yura hananibu nũ uĩmiski. 30Habias Davi Deusũ hãtxa yuishunika hawẽ
yurakiri hamebi hãtxama haka hawẽ baba betsa kaĩriamakiri Deusũ
yubakĩ shanẽ ibuhaira ishanai unãmakĩ yuimaniki. 31Deusũ hãtxa
yuishunika Davi bebũkiri Deusũ xinãmakĩ Messiasikiri hãtxamakĩ hatu
yuimakĩ: “Messias Cristo mawa hawẽ yura txapuama inũ mawabu anu
hawẽ yura baxiama ana bestẽwãshanikiki”, ika hakiri hãtxaniki. 32Hamẽ
Deusũ haskakiri hãtxamanirã, ha Jesus mawa bestẽwãxina txanima
ibubis dasibibũ nũ uĩkubaĩxina nũ unãkanaii. 33Hanushũ ana bestẽwãtã
Deus hau habe shanẽ ibunũ, iwanã, hawẽ yusiuri tsautã haska yubakani
hawẽ Yushĩ Pepa hawẽ Epã Jesus inã hatũ nuku inãkeakekĩ nuku kuxipa
waikiki, na habia nĩkakĩ mã uianã. 34Haska inũ, Davikirima tsuara nai
anu kashanaikiri habias Davi hamebi yuikĩ:

‘Deusũ ã shanẽ ibu yuikĩ: Ë yusiuri tsauyuwe.

35 Hanu miki sinataibu ã mia yamawashũriama
ebe shanẽ ibukĩ manayuwe’,
aka hatu yusitã nuku keneshuniki— iwanã,

36—Israelbu dasibibuũ, txanima matu shabakabi xinãmanũ ea
nĩkakãwẽ. Ha habias Jesus cruz anu mã hatu mastamaimarã, Deusũ
bestẽwãtã nukũ Shanẽ Ibu kayabi nuku washuĩmaki, hawẽ Messias
Cristorã— hatu wa

37hanu hatube itxabũ nĩkai haskatimẽ? ika hatũ huĩti nixmahairai bika
tenekĩ xinãkĩ Pedro inũ Jesusũ tsuma kuxipaya betsabu hatu yukakĩ:

—Betsabuũ, haskatã nũ haskatirumẽ?— hatu wabu

38Pedrõ hatu kemakĩ:

—Deus mã txibãkatsis ikairã, matũ txakabu henetã matũ xinã betsa
watã Deus anu berikãwẽ. Haska watã mã Jesus Cristo ikũwaiwẽ taeshũ
hawẽ kenawẽ matu tibi nũ matu naximaya matũ txakabu watã hawẽ
Yushĩ Pepa Deusũ matu inã mã bishanairã. 39Nukuna bestimaki. Haska
Deus yubakani ma akikiki. Matu dasibibu inũ matũ bakebu inũ txaihaira
manibaunabu nukũ Shanẽ Ibu Deus haska matukiri yubakairã, dasibi
matukiri iniki. Haskawẽ taeshũ hatira hawenabu wakĩ katukĩ kenakatsis
ikikiki— iwanã,

40 ana hãtxa itxapawẽ Jesus mekenãkiri shabakabi yusi pewatã Pedrõ
hatu yusiũkĩ yuikĩ:

—Ha yurabu hiwe txakabu anua pasharikãwẽ— hatu wa

⁴¹hanushū ha shabatiā hawē hātxa nīkakī ikūwākī xinā betsa waibu 3.000 yurabu naximabu hati ana hatubetā ikūwāi hatuki dasinibukiaki. ⁴²Hanushū Jesusū kuxipayabū hatu yusīaibu habū hatū yusīa tapīkī txītuāma hawara hatū hamapai pashkai merabenaī inū, itxashū hatubetā Jesus hatu mawashunima xinākī misi pikī inū, habubetā Deus kuxipa yukakubainibukiaki.

Habū dukū ikūwātā eskai hiwekubainibukiaki, na hātcharā

⁴³Habiatiāri Jesusū tsuma kuxipayabū Deusū hatuwē dami atimaska itxapa akī hawē unāmati betsa betsapa akaibū dasibi Jerusalém anu hiweabu e iki Habaa! ikubainaibū ⁴⁴ikūwāibu dasibi pashkama merabenaī hatū hamapai yauxiama inānanākī ⁴⁵betsabu mabuyabu inū baiyabū hawē pei bikatsi huni betsabu inātā hawē pei bitā ikūwāibu nuitapaibu hawa hayama pei hatu pashkashūkī merabewakubainibukiaki. ⁴⁶Hanua shaba tibi Templo hemaītī anushū kuxipa yukakī hiwe anushūri itxashū hawa txītuāma xinā txākābetanā hatubetā pikī Jesus hatu mawashunima xināmati misi pikī ⁴⁷Deus kēwāibū dasibibū hatukiri pe xinākubainaibū shaba tibi betsabū Jesus ikūwāi yurā kaiā itxai hatuki dasiaibu Deusū hawenabu hatu wakī kenakubainikiaki, habu hiwei mekekatsi ikaiburā.

Huni txātu habiaska kaīni Pedrō beninikiaki, na hātcharā

3 ¹Hanua shaba betsatiā ma 3:00 da tardekē judeubū Deus yukamisbutiā Pedro inū Joāo Templo anu buaibū ²habianuri huni betsa txātu kaīnitū hau hatu pei ea anū, iwanā, shaba tibi Templo hemaītī mixki kene hikiti shui hawē kena Formosa, nukū hātshawē yuia Hawērua anu hawenabū iyushū tsaūtātāmisbu ³Pedro inū Joāo hikinū ika buaibū huni txātū hatu uīkī yukakī:

—Ewē nuikī ea pei inākāwē— hatu wa ⁴habū uīkī dais keyutā Pedrō yuikī:

—Neri nuku uīwē— aka

⁵“Ea pei inākanikiki”, ishū beri ikama hatu uīayā ⁶hanushū Pedrō ana yuikī:

—Ē peumaki. Hakia ē ha hayarā, ē mia inaiī. Deusū kuxipa ē hayawē taeshū ē mia shushawatiruki. Jesus Cristo Nazaré anuatū kena kuxipawē taea benitā niriwe— atā

⁷Pedrō hawē mekē yusiuriawē metsūshū benia hawē tae inū hawē hupushku hawaira mestei hukuxitā ⁸hanua ha huni txātuni beni itxui ti itā ni taekaini Pedro inū Joāobe Templo hemaītī anu hikikaini itxui ti ti ikaikī Deus kēwākī taewabainaya ⁹dasibibū uīaibū nikaikī Deus kēwābainai ¹⁰habū uī e iki datekī haskai haskashumē? ikī:

—Ha hunī hatū Templo hemaītī hikiti shui hawē kena Hawērua anu tsaushū pei hatu ea amis ma shusha unaī habia ikikiki— ikaibū

**Bari utati hawē kena Salomão anushū Jesuskiri Pedrō
shabakabi hatu yusīnikiaki, na hātcharā**

¹¹ha huni txātu kaīni ma shushawabu Pedro inū João hatu dapashkama hatube nikē dasibi yurabu kuxibirā uī e ibirā ibirani Templo hemaĩtī kesha hanu bari utati hawē kena Salomão anu hatuki dasi itxabirābiranaibu ¹²haskaibū Pedrō hatu uīkī yuikī:

—Israelbuū, haskai nuku uī mā e ikanai? Na huni nū shushawashu benitā nia uīkī nukū kuxipawē nū ashu mā xinaīmēkaī? Deus keskakī nū huni pepahairawē taeshū nū shushawashu mā daka xinaī? ¹³Nū haskamaki. Matu yuinū nīkakāwē. Habias nukū shenipabu Abraão inū, Isaque inū, Jacō Deus kēwāpaunibū na huni ma shushawashuki. Ha inū, hawē bake abuhairakī Deusū nukuwē taeshū kēhairawabiamiskē danākī matubu haki sinatakī atxishū nawa shanē ibuhaira anu mā iyua hanushū Pilatōs xinā pewatā tenākatsi ikama nitxīpanā mā nemaimaki. ¹⁴Hanushū matūri Pilatos yukakī Jesus huni pepatū hawa txakabuwaisma hau tashnimanū Pilatos yunuama ha huni txakabu besti merabewakī mā yuka matu hawa washūama nitxīshunimaki. ¹⁵Haska wakī hatū nuku hiwekuīmashanai mā hatu tenāmabia mawa Deusū ana nuku bestēwāshūima nukubū uīkubainimashū nū unaiī. ¹⁶Haskawē taeshū Jesus ikūwākī hawē kuxipawē na huni mā uīmis hawē yura hirabi kuxipa wakī nū ma shushawashuki, haska dasibitū mā uīainā— iwanā, ana hatu yuikī:

¹⁷—Enabuū, Jesus ikūwākatsi ikama hawē kuxipa unākī kayati wakī tapīriamabia matū shanē ibububetā ha huni unāma mā tenaīma txanima ē unaiī. ¹⁸Ha mā haska waimakirirā, bebūkiri Deusū hawē hātcha yuishunika dasibibu hakiri txanikī nukunabu yuikī: “Hawē Messiasrā, nuitapatā mawashanikiki”, anirā, haska yuini keska wakī Deusū ma hatu menemaimaki.

¹⁹Haska xināma Deus mā txibākatsis ikairā, matū txakabu henetā matū xinā betsa watā Deus anu berikāwē, hau matū txakabu matu buashununā. ²⁰Deusū matu hawē daewakī pepawakī benimawakatsis ikī hawē bake Messias Cristo bebūkiri katutā matu yubaniki, hau mā haki dasishanūbunā. ²¹Hanua natianā, Jesusrā, naiuri kayuimaki. Haurishū Deusū mai anuabu hawē hatu pewamakī keyumakī manakamayuikiki, haska hawē hātcha yuishunika meribibu hiweshū nuku keneshūpaunibu keska wamayukinā. ²²Hanua Moisésri hakiri nukū shenipabu hatu yuiriakī: “Hawē hātcha yuishunika ea keska matu anua matū Yavé Deusū kaīmashanikiki. Haska matu yunuai nīkatā txibākubaīshākāwē. ²³Hakia hawenabu bababū tsuabūra Deusū hātcha yuishunika Messias nīkakatsi ikabuma Deusū kupikī hatu yamawashanikiki, ana hawenabuma wakinā”, aniki.

²⁴Moisés besti haska hakiri txaniama hakia hawē hātxa yuishunika tibi Deusū hatu yuimakī Samuelwē taewakī haska Deusū hawē bake yunushanaikiri yusī haburi txanikubainibuki. ²⁵Haska inū, matu henekatsi ikama Deusū hawē hātxa yuishunikabu hātẓamai habuwē Deus matuki yubakaniki. Haskawē taeshū matū shenipabu Deusū yubai nukū shenipabu Abraãobe Deus hātẓakī matu heneama inūbariaikiri yuikī: “Mī baba betsawē taeshū mī bababu inū dasibi nawa betsa betsapabu shukua tibibu ē hatu pepawariashanai”, aniki. ²⁶Haskawē taeshū Deusū hawē bake bestēwaimashū mā hawenabu dukū matukiri pe xinākī matu duawakī taewaikiki, matū txakabu henetā mā xinā betsa wanūbunā— hatu wai

Judeu shanē ibubū Pedro inū João yukanibukiaki, na hātẓarā

4 ¹Pedro inū Joãonē yura itxapabu hatu yusīkī meneriabumakē Deusbe hawenabu hātẓashunikabu inū, Templo mekemisbu shanē ibu inū, saduceubu beshū ²Pedro inū Joãonē yurabu yusīkī Jesus mawa ana bestēkainima hatu unāmai nīkatā hatuki sinatabāi ³hatu atxishū ma bari kaya bitxiti hiwe anu hatu bitxitā: “Mexukiri besti hatu yukatiki”, ibainaibū ⁴ha haskaibutiā itxapabū habū Pedrō hātẓa nīkakī kaka pewē taeshū Jesus ikūwākī taewaibu hatu tanakī aibu tanama hunibu besti 5.000 tananibukiaki.

⁵Hanua ushaxini Jerusalém anu judeu shanē ibubu inū, mae shanē ibubu inū, Deusū hātẓa kenenibu yusīnanāmisbu Jerusalém anu itxabū ⁶habianuri judeu shanē ibuhaira binua Anás inū, Caifás inū, João inū, Alexandre inū, Deusbe hawenabu hātẓashunika shanē ibubū enabu dasibi hatibu itxashū ⁷Pedro inū João hau iwenūbū hatu yunua iweabu hatu namakis nitxītā yukakī:

—Tsuā kuxipawē inū tsuā kenawē na huni mā shushawaxinamē?— hatu wabu

⁸Deusū Yushī Papatū Pedro kuxipa wa hatu kemakī:

—Ē shanē ibubuū, ⁹huni nuitapai isī teneai pewakī nū shushawaxinakiri tapīkatsi ikī mā nuku yukai ikaii. ¹⁰Haskakenā, matu inū dasibi Israelbū mā nīkaya matu xināmanū nīkakāwē. Habias Jesus Cristo Nazaré anua haki sinatakī hiki mā hatu mastama mawa Deusū ana bestēwaima ikūwākī hawē kuxipa bestiwē na huni dasibibū mā uīai nū shushawaxinaki. ¹¹Jesus Deusū haska keska waimakiri matu shabakabi wanū ea nīkakāwē. Mā hiwe wanikabū mixki danābiaibū habias mixki keska Deusū bishū deshū makeresh wakī kene hawē mestēwākī akawaimaki, ha habias Jesusrā. ¹²Ha inū, hawa tsua betsawē nū meketi hayamakiaki. Mai hirabi anushū hawa huni betsawē Deusū hawē nuku mekekī pashawati hayamarikiaki— hatu wa

¹³hanua Pedro inū João hawa dateama kuxipai shanē ibubū uīabū berubi Jesuskiri shabakabi hatu yusīaibu shanē ibubū nīkatā ha hunibu

unānepabuma inū escola anushū hawa tapīsbumabia pewē hatu hātxa waibuwē taea unāi e itā hokia Jesus hatube nishū hatu yusīkubainima xinātā ¹⁴ha huni shushawaxinabu hatube niawē taea haska washū hatu haska watima nashukukī ¹⁵hanushū hanu itxabu anua hatū mekenikabu hatu nitxīmatā habu besti yubakai yuinameakeakekī ¹⁶yuiķī:

—Na Jerusalém anu hiweabū dami atimaska wakī shushawaxinabu dasibibū unākanikiki. Nū hatu haska wai, na huni daberā? “Habū akamaki”, ikī nū hatu parāmatirumaki. ¹⁷Hokia na haska Jesuskiri txanikubainaiburā, dasibibu hau ana hatu nīkamakī ikūwāmayamanūbū hatu beshtekī ne sewanākāwē, hau unuri ana Jesuskiri tsua yusītaskayamashanūbunā— itā

¹⁸hanushū ana hatu kenashū hatu yunukī:

—Jesuskiri ana hāt xakī hawē kenawē hatu yusi yamashākāwē— hatu wabu ¹⁹Pedro inū Joāonē hatu nīkasama hatu kemakī:

—Dasibi nū amis Deusū unaiwē taea haratu txibaī pemē? Matū hāt xā nīkaimēkaī? Deusū hāt xā nīkairaka? Haskakē matūmēbi unāti wakāwē. ²⁰Eskawē taea nū ikai matu yuinū nīkakāwē. Hawara uīķī nū nīkakubiranima hakimama hatu yusīķī nū henetirumaki— hatu wabu ²¹haska shushawaxinabuwē taeshū yurā kaiānē Deus kēwaību shanē ibubū uīķī habuwē datekī hawa txakabuwama ixiābu haska washū hatu kupitima hāt xā kuxipa besti wē ana hatu nematā nitxīnībukiaiki. ²²Ha huni txātu kaīni ma 40 bari binubiakē kaya wakī damiwakī akawanibukiaiki.

Jesus ikūwaību hatu mesewaibu datetima kuxipa yukanibukiaiki, na hāt xarā

²³Hanua Pedro inū Joāo hatu hawa wama hatu kaīmabu kaībaī hatū haibuaibuki nukutuxitā hatube itxatā dasibi Deusbe hawenabu hāt xashunika shanē ibubu inū mae shanē ibubū hatu haska wakāshu hatuki txaniaibu ²⁴haska hatu wakāshukiri nīkatā dasibibū Deus kēwāķī yukakī:

—Nukū Epa Deusuū, nai inū, mai inū iānēwā, inū dasibi hanu hiweabu mī damiwani nū unaiī. ²⁵Haska inū, mī Yushī Pepawē mī tsuma nukū shenipabu shanē ibuhaira Davi yuimakī:

‘Haskai hamēmēs hawa xināma ha yurabu yubaka besumai
haskai hamē ha iki hāt xāwākanimēkaī, hawa xināmarā?’

²⁶Mai kesua anua inū mae tibi anua shanē ibubu kuxipabu itxa yubakai
Shanē Ibu Deus inū hawē Katua Messias danaī haki
sinatashākanikiki’,

iki hāt xanirā,

²⁷—Txanima na habiatīā shanē ibu Herodes Antipas inū Pōncio Pilatos na mae anu nawa betsabube inū Israelbube itxa mī tsuma Jesus meribi mī

katuni Messias mĩ yununi mĩ kēwāmis haki sinatakanikiki. ²⁸Haska dasibi bebūkiri mĩ hakiri yubakani hau haska wai bunūbū mĩ yuinirā, txanima haska keskarā, habunā, ma akimabuki. ²⁹Nukū Shanē Ibuū, natianā, habū nuku mese mesewaibu mĩ uiaīi. Haskawē taeshū nū mĩ tsumabu hawa datea mĩ bakē kakape nū shabakabi txanikūkaunū nuku yunuwe. ³⁰Mĩ kuxipa paewē isī teneaibu shushawakī dami atimaska tsuā atiruma mĩ tsuma meribi Jesus mĩ waniwē hawē kuxipawē nuku amakī nuku hatu uīmakubaīwē— akī

³¹Deusbe hātchai meneaibū habiatīāri hanu itxabu anu patxa sakuaya Deusū Yushī Papatū hatu dasibi atxikī kuxipa wakī keyua hanushū ana dateama Deusū kakape hawenabu hatu shabakabi yuikubainibukiaki.

Ikūwaībū hatū mabu pashkatā hawē hiwenibukiaki, na hātcharā

³²Habū Jesus ikūwaību mirimabū hatū xinā habiaskas xināwē xinaī habū mabu tibi yui: “Ena bestiki”, ikama haka dasibibū mekubainibukiaki. ³³Hanushū Jesusū kuxipayabū haska Shanē Ibu Jesus bestēkainima hawē kuxipa unākī hatuki txanikubainaibu ikūwaību dasibi Deusū hatu duahairawakubainaya ³⁴habu baiyabu inū hiweyabū habu hawa nuitapabumā huni betsa inātā hawē taeshū pei bitā ha pei ³⁵hau hatu inanūbū Jesusū kuxipayabu hatu inākubainaibu ha betsabu hawa hayama hau hawē binūbū bestību tibi hatu pashkashūkubainibukiaki. ³⁶Haskanibu betsakiri mia yuinū nīkawe. Hanua Levī baba betsa natukā Chipre anua kaīni hawē kena Josē hatubetā ikūwāyā Jesusū kuxipayabū kena betsa wakī Barnabé wanibukiaki, nukū hātshawē kenarā: “Xinā txākāwanika bakeki”, akinā. ³⁷Ha hunī hawē bai haya huni betsa inātā hawē taeshū pei bitā beshū Jesusū kuxipayabu hatu inānikiki, hawē hau ikūwaību betsabu hatu merabewanūbunā.

Ananias inū hawē aī Safirā Deusū Yushī Pepa parāpai eskanibukiaki, na hātcharā

5 ¹Ha haskaibutiā huni betsa hawē kena Ananias inū hawē aī Safirā hatū bai huni betsa inātā hawē taeshū pei bitā ²hawē aībe yubakatā pashkashū dabukū hawena wakī arutā hatiri Jesusū kuxipayabu anu bushū ināyā ³hanushū Pedrō yuikī:

—Ananiasī, mĩ bai inātā pei bitā pashkashū dabukū arutā haskakī Satanásā mia txakabuwamaya nuku yui Deusū Yushī Pepaki mĩ txani txakai? ⁴Mĩ bai mĩ hatu ināriama minayushuki. Ha inū, pei mia inābu minariayushuki. Haka mĩ pei mĩ pashkashū nuku inākī mĩ nuku paraīnā, mĩ nuku akamaki. Mĩ Deus paranū ika ikaii. Hawai eiskirā mĩ haskatuxiai?— aka

⁵Ananias haska yuiāi nīkatā tī itā mawaya haskai nīkatā dasibibu dateaibū ⁶hanua berunā dabe hushū hawē yura yabutā bushū maiwai buabū

⁷hakimamari trêš hora binuaya Ananiasĩ aĩnĩ haskashu nĩkariama hatũ hiwe anu hikiaya ⁸Pedrõ yukakĩ:

—Matũ bai inãtã hati pei besti mã bishu mũ benẽ ea inãshumẽ?— aka Safirã kemakĩ:

—Heẽ, habiati besti hawẽ karuki— akaya

⁹Pedrõ yuikĩ:

—Haskai Deusũ Yushĩ Pepa parãkatsis iki mã yubakarabekãshumẽ? Mĩ bene parananaĩwẽ taea ma mawa maiwatani bekanikiki. Mĩ miari mawaya mia maiwariai bukanikiki— akaya

¹⁰habiatiãri hawaira hari mawai Pedrõ tae namã di ikaya hanua ha hawẽ bene maiwatani berunã dabe hikitã hawẽ aĩ ma mawaria betxitã hawẽ yura hari bushũ hawẽ bene dapi maiwarianibukiaki.

¹¹Hanua ikũwaĩbu itxapabu inũ dasibibũ haskashu kakaiibu nĩkatã date paepanibukiaki.

Tsuã haska watiruma wakĩ Jesusũ kuxipayabũ haikaimas isĩ teneaiibu hatu shushawanibukiaki, na hãtxarã

¹²Deusũ hawẽ kuxipa hatu yunua Jesusũ kuxipayabũ yurã kaiã merabewakĩ dami atimaska haikaimas betsa betsapa akaibũ hatu bana nĩkatã hatube itxai bebirã bebiranaibũ hanu Templo hemaĩti anu hanu bari kuaya utamisbu hawẽ kena Salomão anu ikũwaĩbu betsabu hatuki dasi itxakubainibukiaki. ¹³Hanua hatiritũ hatũ yusĩa nĩkai itxakatsi ikabumabia hakia dasibibũ ikũwaĩbukiri pe xinã bestikubainibukiaki.

¹⁴Haskabiaibũ ana mirimabũ hatubetã hatũ Shanẽ Ibu ikũwaĩ huni itxapa inũ aĩbu itxapa hatuki dasikubainaibũ ¹⁵hanua betsarã, tsuabũra hatunabu isĩ teneaiibu hawẽ dakatiki iweshũ bai keshu hanu Pedro huai anu xinãkĩ hau ha kawãkĩ hawẽ yura baka utawẽ hau shushawashunũ isĩ teneaiibu hanakubainabu Pedro hanu kakĩ ha isĩ teneaiibu bestibu hatu shushawakubainaya ¹⁶hanua ha dikabi hanu Jerusalém dapi hiwebaunabũ hatũ yurabu isĩ teneaiibu inũ yushĩ txakabũ betsa betsapawẽ hatu nuitapawamis habu Jesusũ kuxipayabu anu hatu iweriabirãbiranaibu dasibibũ ea akaibu haburi hatu shushawakĩ keyurianibukiaki.

Jesusũ kuxipayabũ hau ana yusĩyamanũbũ shanẽ ibubũ ana hatu nemapai inibukiaki, na hãtxarã

¹⁷Ha hatu haska waibutiã Deusbe hawenabu hãtxashunika shanẽ ibuhaira inũ saduceu habũ txibãmisbu habianushũri Jesusũ kuxipayabu hatu uĩ hatũ kuxipawẽ kemubiai hatuki sinatakĩ ¹⁸Templo mekenikabu hatu yunua atxitã hatũ mae meketi hiwe merã hatu bitxiabũ ¹⁹hanushũ mexu merã Deusũ nai tsuma hushũ habũ mekeabu hatu unãmamatã bitxiti hiwe beputi bepẽtã hatu kaĩmatã yuikĩ:

²⁰—Nenua ẽ matu kaĩma bushunã, ha Templo hemaĩtĩ anu hikitã hanushũ Deusũ kakape hiwekuĩmati hãtxa dasibi hatu yusĩritãkãwẽ— hatu wa

²¹haska hatu yuia nĩkabaĩ penaya Templo hemaĩtĩ anu bushũ hatu yusĩkĩ taewaibũ

habiatĩari ma kaĩbainabu unãmabia Deusbe hawenabu hãtxashunika shanẽ ibuhaira hawenabube itxatã Israelbu shanẽ ibu betsa betsapabu Sinédrio dasibi hatu itxawashũ hatũ meketi hiwe anua Jesusũ kuxipayabu hatu bitxixinabu hau itanũbũ hatũ mekenikabu yunuabu ²²bushũ meketi hiwe anu hikishũ ma kaĩbainabu hawa hatuki nukuama benatã txitũbaĩ ha kaka hatu ²³yuikĩ:

—Hanu meketi hiwe anu nũ hikia beputi tibi bepui pea policiabũ pe mekeabu uĩtã hatu iwẽnũ, ishũ hawẽ hikiti beputi bepõtã ana tsua ha merã hayama nũ uĩtanaii— hatu wabu

²⁴hatu haska yuiabu nĩkatã Templo mekenikabu shanẽ ibu inũ Deusbe hawenabu hãtxashunika shanẽ ibubu yuka iki: “Haskaxinabumẽ?” iki hawa xinãtima yuinameaibũ ²⁵ha haskaibutiã haskarapanãbũ huni betsã hatu uĩbirã hikishũ hatu yuikĩ:

—Ha hunibu mã hatu bitxixinarã, ũ unu Templo hemaĩtĩ anushũ ma hatu yusĩkanikiki— hatu wa

²⁶hanua mekenika shanẽ ibu hawẽ tsumabube bushũ ana hatu itanũ ika kashũ yurã kaiãki datei: “Nuku mãkãwẽ tsaka tsaka akana”, ika hawa hatu meama ²⁷Sinédrio anu hatu iweshũ hatu bebũ nitxĩtuxiabu Deusbe hawenabu hãtxashunika shanẽ ibuhairatũ hatu yuikĩ:

²⁸—Ha huni akimabukiri mã hatu yusĩaibu nũ matu nemahairabiaxina nukũ hãtxa hawa nĩkama haskakĩ Jerusalém anuabu hatu itxawakĩ mã ha hunikiri yusĩkĩ heneamamẽ? Haska wakĩ ha huni nukukiri yuikĩ: “Mã hatu tenãmaimaki”, akĩ mã nuku hawẽ taeshũ yuãkĩ mã nuku hatu dake wamakubainaii— ikaibũ

²⁹haskaibũ Pedro inũ Jesusũ kuxipaya betsabũ hatu kemakĩ:

—Haska Deusũ xinaĩ nũ txibanũ nuku yunumis nũ akatsis ikaii. Hunibũ yunuawẽ taea nũ beshteketirubumaki— iki ³⁰ana hãtxa txitxibaikĩ yuikĩ: —Jesus cruzki mã hatu mastamashũ hatu tenãmabia ha habias Deus nukũ shenipabũ kẽwãpaunibu habiatũri tenãbu nuku bestẽwãshuĩmaki. ³¹Deusũ haska watã nai anu ainitã hawẽ yusiuri nuku tsaũshunimakẽ ha nukũ mekenã inũ nukũ yusĩnã nũ ma hayaki. Haskawẽ taea nũ Israelbu shukua tibi tsuabũra nukũ txakabu henetã Deus anu txĩtuĩ nũ xinã betsaibu nuku hawenabu wakĩ Deusũ nukũ txakabu buatã ana xinãmaki. ³²Na haskarã, Deusũ haska waima nukũ besti nũ unaiĩ. Ha dikabi Deusũ Yushĩ Papatũ unãriaikiki, haska habũ nũ txibaĩbu Deusũ nuku inaĩmarã— hatu wabu

³³hatu haska waibu nĩkatã hatu abuama hatuki sinatahairakĩ hatu detekatsis ikaibũ ³⁴hanua habianuri Deusũ hãtxa kenenibu yusĩnanãmis

huni betsa fariseu dasibibũ nĩkakĩ hakiri pe xinãmisbu hawẽ kena Gamaliel hatube shanẽ ibubu hanu itxabu anuri hatube tsauwa benikaũ policiabũ hau Jesusũ kuxipayabu hatu kaĩmayunũbũ hatu yunua iyuaibũ ³⁵hanushũ Gamalielĩ habube shanẽ ibubu hatu yuikĩ:

—Israelbuĩ, na hunibu kupikatsis ikĩ mã haska wairã, xinãkĩ uĩrakãwẽ. ³⁶Eskaki, matu yuinũ nĩkakãwẽ. Huni betsa Teudas shanẽ ibunũ, ishũ hatu binunũ ikĩ nukunabu parãyã 400 hunibũ hawẽ hãtxa nĩkakĩ txibaĩ haki shukuabu soldadobũ atxishũ ha huni deteabũ habũ txibaĩbu datei dasibi pashai sa iki keyunibukiaki, hanu beshtekei keyuirã. ³⁷Hanua txipu César Augustõ hawenabu hau hatu tananũbũ yunua tanaibutiã huni betsa Galiléia anua Judas shanẽ iburianũ, ika Romanobu nemanũ ika mẽsisipakaũkĩ hatu yusiayã itxapabũ hawẽ hãtxa nĩkakĩ txibaĩbũ ha Judasri soldadobũ atxishũ tenãriaibũ dasibi habũ txibaĩbu pashai sa iki keyurianibukiaki. ³⁸Haskawẽ taeshũ matu xinãmakĩ yuinũ nĩkakãwẽ. Ha huniburã, hatu meyamayukãwẽ. Habũ hatũ yusia ibubis ikaiburã, hamẽ hawama binushanikiki. ³⁹Hakia Deusũ hatu yunua ikaiburã, mã hawa hatu nematirumaki. Txanima habũ Deusũ hãtxa kayabi yusiãĩbu hatu nemakĩ mã binutirumaki. Deus nemanũ ika mã haskatirumaki. Haskakẽ xinãkĩ uĩrakãwẽ— hatu wa hawẽ yusia txibãkĩ pe nĩkatã:

⁴⁰—Peki— iake iaketã Jesusũ kuxipayabu hatu ana kenashũ itxakawakĩ hi siriwẽ hatu kuxa kuxa ama bestitã ana hau Jesuskiri hatu yusiymashanũbũ ha akĩ hatu nemahaira bestitã hatu nitxĩkĩ heneabu ⁴¹shanẽ ibubũ besuuria Jesusũ kuxipayabu kaĩbaini yuinamei: “Hawẽ bake Jesus Cristõ kakapekiri nũ yusiayã Deusũ hawẽ nuku unãti watã nuku duawakatsi hatu yunua habuwẽ datei nũ beshtekẽnũ nuku akanikiki”, iki benimabaini buxishũ ⁴²hatu yusĩkĩ hawa heneama Templo hemaĩtĩ anushũ inũ hiwe betsa betsapa anushũ shaba betsa tukuma Messias Jesus Cristokiri kaka pepakiri hatu tapĩmakubainibukiaki.

Sete merabewanikabu katunibukiaki, na hãtxarã

6 ¹Ha bari haskaibutiãri mirimabũ ana ikũwaĩ hatuki dasii itxakubainaibũ habianuri judeububia hatũ hãtxa Grego hãtxawẽ besti hãtxamisbũ ha hatubetãri ikũwaĩ judeubũs hãtxa Hebreowẽ besti habu hãtxamisbu hatube ha ikĩ yuikĩ:

—Dasibibũ nũ Jesus matubetã ikũwãbiaibũ shaba tibi nuku pimakĩ nukũ aĩbu beneuma enaumabu piti nesheshũkinã, mã hatu pashka pewashunabumaki. Matunabu Hebreobu besti piti itxapa hatu nesheshũ inãkĩ nukunabu Grego hãtxawẽ nũ hãtxamis ha nukũ aĩbu beneumabu piti eskarabes nesheshũ hatu inãkĩ mã hatu nuitapawakubainaii. Haskarã, txakabuki— ikaibũ ²haskaibu hatu yuiabu nĩkatã ha 12 Jesusũ kuxipayabũ dasibi ikũwaĩbu hatu itxawashũ hatu yuikĩ:

—Nukũ nũ matu piti pashkashũkĩ mekeshuna bestirã, nukunarã, pemaki. Ha dikabi matu haska besti wakĩ Deusũ hãtxa yusĩkĩ nũ henea pamariki.

³Haskakenã, ê betsabu inũ ê puibuũ, hau huni betsabũ piti matu pashkashũkĩ inãkĩ pewakubainũbũ sete huni xinãyã inũ unãnepabu Deusũ Yushĩ Papatũ kuxipayabu hau habũ matu pashka pewashunũbũ benakĩ katushũ ha daya hatu yunukãwẽ. ⁴Hakia nukubunã, Deusbe hãtxakĩ heneama hanushũ hawẽ hãtxa pepa matu inũ betsabu yusĩkĩ nũ henetirumaki— hatu wabu

⁵haska hatu yuiabu nĩkatã dasibitũ habias xinãwãtã hanushũ hatu katukĩ huni xinãyã inũ unãnepabu Deusũ Yushĩ Papatũ kuxipayabu katukĩ hati anibukiaki. Estêvão inũ, Filipe inũ, Prócoro inũ, Nicanor inũ, Timão inũ, Pármenas inũ, nawa betsa Antioquia mae ewapanu hiweshũ judeubũ beya tapĩni Nicolau hati hatu katubaĩ ⁶Jesusũ kuxipayabu anu hatu iyuabu hanushũ hatu unãti wakĩ mamepishũ Deus hatu yukashũkĩ hatũ merabewanikabu hatu wanibukiaki.

⁷Hanushũ Deusũ hãtxa Jesuskiri kakape hatu yusĩpakekubainaibũ hatũ hãtxa nĩkakĩ Jerusalém anushũ ikũwaĩ itxai pakubainaibũ ha haskaibũ habiatiãri Deusbe hawenabu hãtxashunika itxapabũri Jesus ikũwãrianibukiaki.

**Estêvão hawamahairabiakẽ atxishũ shanẽ
ibubu anu iyunibukiaki, na hãtxarã**

⁸Estêvão Deusũ duawakĩ kuxipa paeya wakĩ pepawanikiri mia yuinũ nĩkawe. Hawenabũ berubi Estêvãoõnẽ dami tsuã atiruma atimaska wakĩ hatu uĩmakubainaya ⁹hanua itxati hiwe hawẽ kena “Escravo Tsumawanibu Ana Tsumauma” hanu betsabu itxamisbu inũ, huni betsari mae Cirene anuabu inũ, mae ewapa Alexandria anuabu inũ, Cilícia mai pakea anuabu inũ, mai pakea Ásia anuabu habu Estêvãoõbe ha iki yuinameaya ¹⁰Deusũ Yushĩ Papatũ Estêvão unãnepa wakubainaiwẽ taeshũ tsuã Estêvão maemakĩ hãtxawẽ binũtirubumakẽ ¹¹hawawẽ haska watima haki yubakatã habu betsã huni betsabu pakakĩ yuikĩ:

—Nukũ shanẽ ibubu parãkĩ eska hatu yuitãkãwẽ: “Ha Jesuskiri yusĩmis Estêvãoõnẽ hãtxa txakabu yuikĩ Moisés inũ Deus dayuikĩ yuaĩkiki”, atãkãwẽ— hatu wa ¹²hatu haska wabu bushũ huni itxapabu yuikĩ mae shanẽ ibubu inũ Deusũ hãtxa kenenibu yusĩnanãmisbuki txani txakakĩ habu hatu sinatamabũ yurã kaiã ha iki berukui itimaskabaikĩ hanushũ Estêvão atxitãshũ shanẽ ibubu dasibi Sinédrio anu iyushũ ¹³hanushũ hau Estêvãoõkiri txani txakatanũbũ parã hãtxa katutã huni betsabu hatu parãmakĩ yuimãkĩ:

—Na huninã, nukũ Templokiri inũ Moisés nuku yusĩni hãtxakiri yuaĩ hãtxai heneama nũ nĩkaii. ¹⁴“Jesus Nazaré anuatũ Templo yamawatã nukũ beya betsa betsapa Moisés nuku yusĩni betsa washanikiki”, ikai nũ nĩkariakubainaii— hatu wabu

¹⁵hanua shanẽ ibubũs Sinédrio anu tsaushũ Estêvão nia uĩkĩ hawã ikama hawẽ besu shabakabihaira Deusũ nai tsumã besu keska beisnibukiaki.

**Hatú shenipabukiri Estêvãoñe shanê ibubu
hatu ana xinâmanikiaki, na hâtstarã**

7 ¹Haska uítã hanushû Deusbe hawenabu hâtshashunika shanê ibu binuatû Estêvão yukakî:

—Na haska mikiri yuiaiburã, txanimamê?— aka

²nîkaibû Estêvãoñe hatû yukai kemakî:

—Ë shanê ibubu inû enabuû, matu yuinû nîkakãwê. Mesopotâmia mai pakea anu nukû shenipabu Abraão Harã mae ewapanu kariama bebûkiri nukû Epa Deus kuxipa pepatû yubakî unâmakî hanu hiweshanai anu ³yunukî yuikî: “Mî mai inû minabu henebaini mai bena ã mia uîmashanai anu hari kashãwê”, aka ⁴hanua Abraão kaîkaikî Caldêia henebaini Harã anu kaima dakayukê hanua hawê epa ma mawaimakê hanushû na habia mai mã hanu hiwea anu Deusû Abraão iweshû ⁵hanu hawê mae ibubis bitã hanu hiwepaketirumabiakê Abraão bebûkiri yubakî bakeyariamabiakê hau hanu hawê bababu hanu hiweshanûbû hatu inãti hatuki tanamanikiaki, Abraão mawakê hawê bababu patã ibu wakî hau bishanûbû yubakinã. ⁶⁻⁷Hanushû ana yubakî: “Mai kesua betsa anu mî bababu hatube hiwei buimabu harishû nawabû habû escravo dayaru hatu washû 400 ano hatu dayamakî hatu itxakawakubainaibu atimas ã hatu kupiaya mî bababu haria kaîbirani beshû na mai ã mia yubai anu hiweshû ea duawakubaîshãkanikiki”, ayamashû hanushû Abraão hawê yubaka xinãmati wakî Deusû yunukî: “Dasibi minabû huni bake tibi kaîyã hawê hina kubitxi meshtekî bikubaîshãwê”, aka ⁸habe hâtshakî nîkayamashû hawê huni bake Isaque kaîyã oito dia shabatiã hawê hina kubitxi binikiaki, haska yubani taewakinã. Hanua hawê bake Isaque bakeyatãri hawê bake Jacó birianikiaki. Hanua Jacó, hawê kena betsa Israel, hawê 12 huni bakebu kaîaî habiaskari wakî hatu biriakubainikiaki. Ha 12 huni bakebu habu tibi anua nû habia hawê bababuki.

⁹Hanua ha nukû shenipabu Israelî huni bake betsa José hawê betsabû danaî haki sinatakî hau tsuma wabaî Egito mai pakea anu iyutanûbû hawê taeshû pei bikî nawa betsabu inãbu iyuyamabu harishû Deusû duawakî José merabewaya ¹⁰habu anushû bika tenebiaya Deusû nemakî unãnepa wakî Egito shanê ibuhaira Faraó abumaya hawê shanê ibu betsa wakî José shanê ibu wakî hawê mai hirabi inû hawê hiwe hawêrua ewapa mekei hau dasibi shanê ibushunû yununiki.

¹¹Hanua Egito anua José shanê ibuaya Egito mai pakea anu inû Canaã mai pakea anu dasibi ana yunu beneamakê Israelî bakebu nukû shenipabu nuitapai hawa pitibumakê ¹²hanua Egito anu shekiwã haya txaniaibu Jacó nîkatã hau hawê bakebû nukû shenipabû hari bushû hau piti bikî taewatanûbû hatu yunua butanibukiaki. ¹³Ana ha

katxu betsatiã bunitxakayamakĩ ana piti bitanũ ika buabũ hanushũ Josẽ hatu unãmakĩ hãtxa wakĩ yuikĩ: “Ë matũ betsa Josẽki”, akĩ hatu unãmaya Egito shanẽ ibu Faraõnẽ nĩkatã: “Josẽ hawa nawamẽ?” itã xinãxĩkẽ ¹⁴txipu betsatiã Josẽ shanẽ ibuwẽ taeshũ hau hawẽ epa inũ dasibi hawenabu hau ishũtanũbũ hatu yunua hawenabu 75 ishũtãkĩ Egito anu iwenibukiaki. ¹⁵⁻¹⁶Haskawẽ taea Jacó, hawẽ kena betsa Israel, Egito anu kaima hiwea hanua mawa hanu maiwati tãpe Hamorĩ bakebũ hawẽ hutxi Abraão peiwẽ inãnibu Siquém anu hawẽ yura bushũ maiwatãnibukiaki. Israelĩ bakebu inũ hawẽ baba itxapaburi Egito anuari mawakubainibukiaki— iwanã,

¹⁷Estẽvãonẽ judeu shanẽ ibubu hatu yuikubaĩkĩ ana yuikĩ:

—Abraõnẽ bababu, Israelburã, Canaã anu ana hatu txitũmakatsi Deusũ yubani ha baritiã ma hatu tashnimabaĩkatsi iki kemaya Israelbu Egito anu hiwea pai itxai mirimakubainaibũ ¹⁸hanua Egitonawa shanẽ ibu bena Faraõ ikimashũ haska wakĩ Josẽ Faraõnẽ enabu hatu merabewakubaini unãma ¹⁹ha shanẽ ibu Faraó benatũ nukũ shenipabu parãkĩ hatu itxakawakĩ hatũ huni bake dama kaĩãibu hau tenãnũbũ hatu yunukĩ hatu putamakubainaya ²⁰ha hatu haska waibutiã Moisés kaiyã hawẽruahaira pixtakẽ abuhairakĩ hawẽ ibubũ hiwe anushũ hune ewa wakĩ ushe dabe inũ besti huneshũ yumewai ²¹ana haska washũ hunetima datekĩ hau mawanũ hene kesha basi anu txitxãkĩ hene hikitima wakĩ buiwẽ pepushtã nanetã nũtãtã shunũbirana Egito shanẽ ibũ aĩbu bakẽ betxishũ neshewanimashũ hawẽ bake keska wakĩ yumewakĩ ²²haska wabainimashũ Egitonawa unãnepatũ Moisés yusikĩ unãnepawakĩ tapĩmakubainabu hãtxapai huni kuxipakĩ haska yunuabu hatu ashũkubainikiaki.

²³Ma hanu Moisés 40 bariyatũ hawenabu Israelbu xinãkĩ uĩbaunũ ika baii kashũ ²⁴hanushũ Egitonawã Israelbu betsa itxakawakĩ kuxai uĩkĩ hawenabu merabewanũ ika kashũ nemakĩ hatũ itxakawai tenãshunikiaki. ²⁵Hanushũ Moisés xinãkĩ: “Ë kuxipaiwẽ Deusũ ea merabewaya enabu Israelbu hatu merabewakĩ Egito anua hatu pashawatã unãnuma ã hatu hiwemashanaii”, ibiaya hakiri haska hawenabũ xinãma inibukiaki. ²⁶Hanua mexukiri betsatiã Moisés ana kashũ hawenabu Israelbu dabe ana detenameibuki nukutã daewakĩ hatu nemanũ ikaĩ hatu yuikĩ: “Matu dabe mã huni betsamaki. Haskai mã detenamei ikanai?” hatu wa ²⁷ha hatũ hawenabu deteitũ Moisés tu akĩ shututã yuikĩ: “Mĩ nuku uĩnũ tsuã mia shanẽ ibu wakĩ nukũ pewanika mia waxinamẽ, nuku anurã? ²⁸Egitonawa detexishũ mĩ eari habiaskari wanũ ika ikai, tenãkinã?” aka ²⁹haska wa nĩkatã datei txai kai Moisés pashai mae betsa Midiãnawabu anu hari kani haria nawa keskai hiweshũ aĩbu bitã huni bake dabe wanikiaki.

³⁰Hari Midiãnawabu anu 40 ano Moisés ma hatube hiwea binukainaya Mati Sinai hanu tsua hiweabumanu Moisés kashũ uĩayã hi mashu kui

menui keskai here hi hi ikai anu Deusū nai tsuma nia ³¹ uī e itā namai keskakī shabakabi ana uī pewanū ika kemai ha dapi kaya Deusū yuikī: ³² “Earā, ē matū shenipabū mekenika Deuski, Abraão inū, Isaque inū, Jacō mekenika Deusrā”, akai nīkai Moisés datei saki saki ikī hari uīkatsi ikamakē ³³ hanushū Yavé Deusū ana yuikī: “Na mī nia anu ē niriaki. Haskawē taea na shaba turu meribi meseki. Mī bitxi tae pekayuwe”, aka hutsekeshunaya ³⁴ ana yuikī: “Enabu Egito anushū bika tenetxakayamai saī iki kashai hawawē haskatima ikaibu txanima shabakabi ē uīmis hatu merabewanū ika ē butushuki. Uīwē. Haskawē taeshū Egito anu hari ē mia yunukatsi ikai”, akī Deusū Moisés yuiniaki.

³⁵ Uatiā ha habias Moisés danākī hawenabū yuikī: “Mī nuku uīnū tsuā mia shanē ibu wakī nukū pewanika mia waxinamē, nuku anurā?” abianibu habias Moisés shanē ibu wakī hatū merabenā wakī hawenabu merabewamakatsi ha nai tsuma hi mashu kui menui keska here hi hi ikai anua hātxamakī Deusū Moisés yununikiaki. ³⁶ Deusū Moisés haska waimakē Moisés nukū shenipabu Egito anua hatu kaīmabaikatsi ikī Egitonawabu anushū hatu dami betsa betsapa washūtā hanua hatu iyukī ha Iānēwā Taxipa hau pukebainūbū damiwakī hene bai wakī hatu pashkashūtā hanu tsua hiweabuma anu nukū shenipabu Egito anua hatu iyuimashū 40 ano dami betsa betsapa hatu unāti wamakeatanikiaki, Moisés hatu tashnimabainishunā. ³⁷ Hanushū habias Moisés Israelbu hatu yuikī: “Hawē hātxa ē matu yusīnū Deusū ea katuni keska wakī habia matunabu anuari Deus yuishunika betsa kuxipa ea keska matu anu yunushanikiki”, anikiaki. ³⁸ Haska inū, hanu tsua hiweabuma anu ha habias Moisés nukū shenipabu hatu itxawabainimashū hanua ka Mati Sinai anua Deusū nai tsumabe hātxakī haska hiwea kayabi nū bishanai Deusū hātxa nīkatani nukū shenipabukiri txanikirākiranikiaki, Moisésrā.

³⁹ Haska hatu yusikī unāmabiakubaina nukū shenipabū txibākatsi ikama Egito anu ana txītūkatsis ikī Moisés danākī ⁴⁰ hawē betsa Arão yuikī: “Egito anua nuku iwebiaima Moisés Mati Sinai anu kaima ana huamaki. Haskaima nū unāmaki. Haskakenā, yushī betsa dami wakī ha kēwāti nuku ashūwē, hau hatū nuku yunukī iyukubaishanunā”, akabu ⁴¹ hanushū mane damiwakī ina awa bake itsa hatu washūxina kēwākī txashuwā bake deteshū kua keyui hatūmebi hatū mekenē axiāwē taea haki besikī duawai benimahairanibukiaki. ⁴² Haskaibuwē taea Deus Israelbuki sinatakī nai anua bixi besti hau kēwānūbū ha hatuwē nuiiai beshtenibukiaki. Haskakubiranibukiri hawē hātxa yuishunika Amós Deusū hātxamakī yuima:

‘Israelbuū,

hanu tsua hiweabuma anu 40 ano hiweshū

ina awa inū txashuwā bake deteshū kua keyubiakī earā,

ea kēwākī mā hawa ea inākī ea kēwāma ikubiranibuki.

⁴³ Eūbia haskatimabiakē

yushī betsa hawē kena Moloque mā damiwaima kēwākī
hawē kēwāti tari hiwe putakatsi ikama
iashū bekubirākī yushī betsa hawē kena Renfā kēwākī
hawē bixi kēwāti ibubis damiwaimashūri
hari mā kēwākubainibuki.

Haska wakī mā txakabuwakubainibuwē taeshū matu kupinū, iwanā,
matū mai anua txaihaira matu nitxīkī

nawabū mai pakea betsa Babilônia anu ē matu yunushanii’,
aka keneshuniki.

⁴⁴Hakia hanu tsua hiweabuma anu nukū shenipabu buaketākinā, Deusū
hawē hatu yubakī xināmati tari inū bitxi hiwe hatu amaima hayanibuki,
haska Moisés Deusū uimākī yunuima keska hatu amaimarā. ⁴⁵Hanushū
nukū shenipabū ha tari inū bitxi hiwe mekekubainaibū Josué hatū shanē
ibutā nawa betsa betsapabu hatube detenamemaya Deusū hatu merabewakī
hatū mae tibi mebīkī hatu nitxīmatā hatu ibu wamaya ha tari inū bitxi
hiwe Deusū hatu amani pekashū iatā bekubiranibukiaki. Haskaibutiā
ha hiwe bebūshū Deus kēwākubainibukiaki. Habias hiwe hayayukē
Davi hatū shanē ibu iriakūkainikiaki. ⁴⁶Hanua Davi shanē ibukī Deus
benimawakubainaiwē taeshū ana duawanū, iwanā, Jacó hawē kena betsa
Israel hawenabū Deuski nukuti kayabi mixki hiwe hawērua washūshanū,
iwanā, Davi yukabia Deusū nemayunikiaki. ⁴⁷Hakia Davi bake Salomão
shanē iburiatā hatū Templo mixki hiwe Deus hatu amashunikiaki, ⁴⁸hanu
hunibū hiwe wabu anu ha Deus dasibi binu keyua hiwetirumabiakenā.
Habiaskari Yavé Deusū hawē hātxa yuishunika hātksamakī:

⁴⁹⁻⁵⁰ ‘Nai anurā, ē shanē ibui hanu tsauwa

inū ē tae hanu maiki ē tapakea maiki paiaki.

Eānā, dasibi ē damiwaniwē taeshū ea huirukūmanū, iwanā,
haska washū tsuā ea hawa hiwe washūtirubumē?

Tsuā ea hawa hiwe washūtirumaki’,

aka keneshuniki— iwanā,

⁵¹Estêvãoē Sinédrio ana hatu yuikubaikī:

—Dasibi kuxipa Deus haya mesebiakē matū shenipabu ipaunibu keskai
matuburā, matū besu inū, matū huīti inū, matū pabīki kuxikē Deusū
Yushī Papatū matu yusībiakubainaya mā nīkaisbumaki, nawabū Deus
unābuma keskarā. ⁵²Haska inū, Deusū Katua pepa hushanai Deusū hātxa
yuishunikabū bebūkiri hakiri txanibiakubainaibū hawa nīkakatsi ikama
matū shenipabū hatu dasibi danākī hatu itxakawakī detekubainibuki,
hatu tenākinā. Hanua natiā Deusū Katua huni hawa kaneisma hakiri
matu yuīnibu ma nuku anu huni xināma nawabu atximatā mā ha huni
pepa Jesus hatu tenāmaraimaki. ⁵³Deusū hātxa hawē nai tsumabū nukū
shenipabu yušini haya tapībiakī mā txibaīsbumaki— hatu wa

Estêvão tenānibukiaki, na hātcharā

⁵⁴haska xarabu hatukiri shanē ibubu txiteai nīkatā Estêvãooki sinatatzakayamai bene bene iki sheta yēsh yēsh akaibū ⁵⁵hakia Deusū Yushī Papatū Estêvão merabewakī kuxipa waya nairi teskāshū uīkī Deus txasha kuxipahaira anu hawē yusiuri Jesus nia uītā ⁵⁶dateama hatu ana yuikī:

—Uīkāwē. Teskātā nai bepemana anua Deusū yusiuri nukū Huxi Kayabi Iuwa Jesus nia ē uīaī— hatu waya

⁵⁷habū hawē hātxa ana nīkakatsi ikama pabepukui keyubaī hakiri kuxi biski ibaī atxitā ⁵⁸⁻⁵⁹mae anua tashnimakī sharabaī habu Estêvãooki txani txakaibū ha dukūtū tsakanū itā hatū tari txaipe pekatā huni betsa hawē kena Saulo mekematā itxapabubetā mākāwē tsaka tsaka akaibū Estêvãoonē Jesus yuikī:

—Shanē ibu Jesusuū, menā ē yushī ea hari biriwe!— atā

⁶⁰hanua dāti ika dakashū bis ikī hui kuxipawē ana yuikī:

—Shanē Ibuū, na ea txakabuwaibuwē taeshū hatu kupiyamashāwē— atā di iki mawanikiaki.

8 ¹Hanushū Estêvão hau tenānūbū Saulō habiaskari xināyā anibukiaki.

Jesus ikūwaību Saulō hatu itxakawakubainikiaki, na hātcharā

Habias shabatiā Jerusalém anushū Jesus ikūwaību habū ikūwābumā hatuki sinatakī itxakawatzakayamakī taewaibū Judéia mai pakea anu inū Samaria mai pakea anuri Jesus ikūwaību dasibi pashai sa ibainaibū habu Jesusū kuxipayabu besti kaīama inibukiaki. ²Hanua tsuabura huni duapabu Estêvãoowē nui haya kashabetanā maiwanibukiaki. ³Ha hatu haska waibutiā Saulo hawē haibuaibubetā Jesus ikūwaību itxakawakī hatū hiwe tibi anu hikishū huni inū aību itxapa pashariabuma hatu atxishū kaīmakī hatu sharabaībaīkī bitxiti hiwe merā hatu bitximakī habū Jesus ikūwaību hakimawanū, iwanā, Saulō Jesus ikūwaību yamawakī keyupai inikiaki.

Samaria anushū kakape hatu yusīnibukiaki, na hātcharā

⁴Hanua habu Jerusalém anua pashai kaībainimashū hanira mae tibi anu hikishū Deusū Messias Cristo mekenā hawē kakapekiri hatu yuikubainaibū ⁵merabenā betsa Filipe mae ewapa betsa Samaria anu kashū Messias Cristokiri hatuki txanikī taewakī ⁶hanushū haska tsuā atiruma dami atimaska betsa betsapa hatu ashuaī uīkī ha yurabu itxashū Filipē hātxa dasibibū nīkahairaibū ⁷yushī txakabū yura betsa betsapabu hatu nuitapawamis Filipē hatu shushawakī kaīma ha yushī txakabu bis iki tashnibainaibū hatu kaya wakī yura betsaburi babunibu

inū biyushkinibu hatu kaya waya ⁸ha mae anushū Filipē hatu haska washunai uī hawē xinā txākaī benimahairanibukiaki.

⁹Hamē betsarā, Filipē hatu yusī kariamakē huni betsa Simão ha mae Samaria anushū hawē mukawē unākī hawē hatu shuū akī yurabu paraī keī shanē ibukī hatu mesewamistū ¹⁰⁻¹¹bari itxapa hawē mukawē hatu parākubainaiwē taeshū hakiri yura dasibi shanē ibubu inū hatube hiweabu dasibibū txibākī kēwaī hakiri yuinamekī:

—Simāonā, Deusū kuxipa itxapa hayaki— ikī hawē hātxa nīkakī ashūpakemisbū

¹²hakia Deus shanē ibuaikiri inū Jesus Cristō kakapekiri Filipē hatu yuiyai nīkatā ana Simão nīkama huni itxapabu inū aību itxapabūri Jesus ikūwaību Filipē hatu naximaya ¹³hanushū Simāonē dikabi ikūwāyā naxima Filipebe kakūkaūkī haska tsuā atiruma dami atimaska betsa betsapa akai uī Simão e ikūkainaya

¹⁴hanushū haska habū Samaria anushū Deusū kakape Jesuskiri hātxa ikūwākī ma txibaībū haska kakaiibu Jerusalém anushū nīkatā Jesusū kuxipayabū hau Pedro inū Joāonē hatu merabewatanūbū hatu hari nitxiābu buabū ¹⁵⁻¹⁶tsuabūra Jesus ikūwaību Filipē bebūkiri hawenabu unāti wamakī Shanē Ibu Jesusū kenawē hatu naximaxina habu betsa Deusū Yushī Papatū hatu atxiriamakē haska hatu wabu buxīshū ha Samaria anushū ikūwāxinabu hatukiri Pedro inū Joāonē Deus hau hawē Yushī Pepa binūbū hatu yukashūtā ¹⁷hanushū hawē Yushī Pepa atximakī hatu mamepishū hatu yukashunaya ha Yushī Papatū hatu merabewai hatuki hikiakeakenikiaki.

¹⁸Hanushū Jesusū kuxipayabū ikūwaību hatu mamepiaya Deusū Yushī Pepa hatuki hikiai Simāonē uī: “Eāri ha kuxipa peiwē binū”, iwanā, Pedro inū João ¹⁹yuikī:

—Na haska kuxipa eari ē hayanū ea inākāwē, mā hatu akai keska wakī yura betsaburi mamepishū Deusū Yushī Pepa ē hatu hikimashununā, na pei itxapa ē matu inainā— hatu waya

²⁰hanushū Pedrō kemakī:

—Deusū kuxipa inākuīki. Peiwē taeshū mī bikatsis ikaiwē taea mī peiya hanu txiwē ikūwābuma Deusū hatu kupishanai anu mī katiruki. ²¹Haska inū, mianā, mī xinātxakai Deusū unaīwē taeshū hawē kuxipa mī bitirumahairaki. ²²⁻²³Eā haska ē mia unāiī. Haska yushī txakabū muka mī bini mī heneriamakē mia merāshū ha mī txakabū mia neshayuaki. Hakia xinā betsa watā mī txakabu mī putaya hau Deusū mia buashunū mī yuka mī txakabu mia buashūtirumēkaī— aka

²⁴Simāonē kemakī:

—Txanima ē kanehairashuki. Ea Deus yukashūkāwē, hau haska mī ea yuiyai keska wakī ea kupiyamashanunā— iki haska txaniaya hau Deusū hawē txakabu buashunū yukashūtā

²⁵habianushūri Deusū hātxa yusīkī kakape Jesuskiri hatu yusī menetā Jerusalémkiri ana txītūbirākī mae betsa betsapa Samaria mai pakea anushū Jesuskiri hatu yusīkubirani Jerusalémkiri txītūbaini bui hikinibukiaki.

Etíopianawa shanē ibu betsaki Filipe nukushū yusīnikiaki, na hātẓarā

²⁶⁻²⁸Ha haska wawāxinabutiā Deusū nai tsuma betsā Filipe yunukī yuikī:

—Benitā Jerusalém anua kai sulkiri ha bai tanabaini Gazakiri kawē katāwē— aka

Filipe benitā kai hanu tsua hiweabuma anu bai tanabainaya bai namaki Etíopianawa aību shanē ibuhairatū tsuma huni hawē pei mekeshunikatū Jerusalém anushū Deus kēwātani hawē mae anu ana txītūkaini cavalo dabetā tarābainai nawa ina tsaushū Deusū hātẓa Isaíasī keneni yuikubiranai betxitā uāyā ²⁹Deusū Yushī Papatū Filipe yuikī:

—Kakaī haki kemai nukutāwē— aka

³⁰haska nīkatā hawaira kaī haki nukuaya Deusū hātẓa yuishunika Isaíasī keneni yuiāi nīkakī Filipē yukakī:

—Ha kene mī yuikubiranairā, mī nīkai?— aka ³¹Etíopianawā nīkatā kemakī:

—Haskatā tsuā ea hakiri yusī pewai ē nīkatirumaki. Miā mī unaīmēkaī? Ebe inatā kakī ea tapīmabaīwē— aka

—Peki— itā inatā habe tsaukainaya

³²habias kene yuishu Etíopianawā ana Filipe yuishūkī yuikī:

‘Txashuwā detenikatū detenū, iwanā, iyumis keska wakī tsuā nemama iniki.

Ha inū, txashuwā bake dani dameshteabu

txashuwā hawā ikama pesmis keskai hawa yuiama iniki.

³³Hanushū itxakawakī nuitapawabu hawa yuiamakē

tsua hawē nuikī merabewamari iniki.

Haska wakī bakeuma tenābu

tsuā hanishū hawē bababukiri hakiri hātẓatirubumaki,

haska wakī hawē hiwea mebīkī mai anua mesha keska wakinā’,

akī yuishuna ³⁴Filipe yukakī:

—Tsukiri ha Deusū hātẓa yuishunikatū kenenimē? Ibusikirimēkaī? Huni betsakiriraka? Menā ea yuiriwe— aka

³⁵Filipē unāmakī Deusū hātẓa dama yuishurā, hawē yusī taewakī kakape Jesuskiri Etíopianawa tapīmakī nīkamakubaina ³⁶⁻³⁷ma hatishūra ka iāki kemakī haska Filipē dama yusīshu Etíopianawā yuikī:

—Uīa. Ma mī ea yuikubiranai ē ikūwaīwē taeshū ana ē hawamamē, na hene anu mī ea naximatirurā?— atā

³⁸hatū cavalo tarāmabainai hau niti anū hawē tsuma yunua niti amaya buturabekāi henē pukutā Filipē shanē ibu naximakī menetā ³⁹hene anua neshekerabebiranaibū hanushū Deusū Yushī Papatū Filipe dami wabaikī yamawabainaya ha shanē ibū Filipe ana uīyama hawē tarābaītiki inatā ha kaikiri kai benimahairakainaya ⁴⁰hanua Filipe Yushī Papatū iyushū mae betsa Azoto anu butea hanua mae tibi anu hikiakeakekaikī Deusū Katua Jesus mekenākiri kakape hatu yuikubaini atimas mae ewapa betsa Cesaréia anu hikinikiaki.

Jesusū Saulo xinā betsa wamanikiaki, na hātẓarā

(At 22.6-16; 26.12-18)

9 ¹Hanua habiatīāri Shanē Ibu Jesus ikūwaibuki pubēkī Saulō hatu itxakawakī tenākī heneriama haskawē taea Deusbe hawenabu hātẓashunika shanē ibuhaira hatu binua anu Saulo kashū ²haska xināi yuikī: “Damasco anu kashū ha Bai Bena Jesuskiri hatu tapīmaibu huni inū aibu atxitā Jerusalém anu ē hatu iwekatsis ikaii, nenu hatu bitxinū, iwananā. Haskakē mī kuxipaya kanū, iwanā, ē mia yukai huaii. Ea kuxipa wakī Damasco mae ewapanua hanu nukunabu itxamisbu hiwe anu ē kakē hau shanē ibubū ea merabewashanūbū mī kuxipa hatu yunuwe, ē buairā”, aka: “Peki”, ishū keneshūtā haya yunua ³hanua Saulo haska wa kai Damasco bai tanabaini ma kemaya nai anua bī kuxipahaira peshekirā Saulo datxashaya ⁴hanua Saulo maī di ikaya hui tashnikī yuikī:

—Saulō, Saulō, haskakī mī ea hatu itxakāwai?— aka

⁵Saulō dateyabi yukakī:

—Shanē ibuū, mī tsua ikai?— aka

hanushū ha hui tashniaitū Saulo ana yuikī:

—Habia ea ikūwaibu mī ea hatu itxakāwainā, ē eaki, Jesusrā.

⁶Benikaini kai Damasco anu karitāwē, harishū mī haskakūkaishanai tsuāra mia yuishanikikirā— akaya

⁷ha hunibu Saulobe buaibū hawē hui nīkabiai tsua uīyama datehairaibū ⁸hanua Saulo maī daka benikawā ma bepeshebia hawa uītirimakē ha habe buaibū metsūshū Damasco anu Saulo iyubu ⁹haskakaixina haria ma shaba dabe inū besti kaya hawa uīyama datekī Saulō hawa piama hawa nushuamakē

¹⁰ha Damasco mae anu hiweshū Jesus ikūwaī betsa hawē kena Ananias nama keskaiwē uīayā Shanē Ibu Jesus hushū ha bebūshū kenakī yuikī:

—Ananiasī— aka

kemakī:

—Shanē Ibuū, ē nenuki. Mī hawa ea yuiāi?— aka

¹¹Shanē Ibu Jesusū yuikī:

—Benikaini kakī ha bai hawē kena Kayatapia anu kashū Judasī hiwe anu hikitā hanua huni betsa Tarso anua kaīni huxiā hawē kena

Saulo yuka itāwē, Deusbe hātxaikikirā. ¹²Namai keskawē huni hawē kena Ananias hikitā mamepishū hau ana uī benawanū, merabewai ma uīshuki— aka

¹³Ananiasī nīkatā Jesus yuikī:

—Shanē Ibuū, Jerusalém anushū minabu meribi mī hatu wai ha hunī mia hatu itxakāwāmiskiri itxapabū hakiri hātξakī txakabu ea yuimibuki. ¹⁴Hatu haska wakubaini Deusbe nukunabu hātξashunika shanē ibubū kuxipayaya bexiābukiki. Nū habū mī kenawē taeshū Deus yukaibu dasibi nukuri nenua atxitā Jerusalém anu nuku iyushū bitxinū ika huxiākiaki— aka

¹⁵haska yuibiaya Shanē Ibu Jesusū ana yuikī:

—Hē iyamai dateama katāwē. Ha huni kaīriama ē katunitū ekiri txanikī nawa shukua betsa betsapabu hatu yusikī inū, hatū shanē ibubu yusīriakī inū, Israelburi ea hatu yusīriashūkubaīshanikiki, ¹⁶ea txibaīwē taea haskai nuitapakūkaīshanai ē unāmashanairā— aka

¹⁷nīkabaini Ananias kai hanu Saulo ika anu hikikaī mamepitā yuikī:

—Saulō, Jesus ikūwaī ma mī nukū betsaki. Mī bai tanabiranai habias Shanē Ibu Jesus miki nukuxinatū hau mī beru mī ana uī pewanū inū hawē Yushī Papatū hau mia atxitā kuxipa wanū mia anu Jesusū ea yunushuki— akaya

¹⁸⁻¹⁹hakīmamari hawaira Saulō beru anua baka shaka keska niri ikaya ana uī pewatā benikaī ma hatubetā Jesus ikūwāyā naximatā iyushū pimabu ana kuxipatā usha eskarabes Damasco anua ikūwaībube hiweyunikiaki.

Damasco anushū Saulō Jesuskiri yusikī taewanikiaki, na hātξarā

²⁰Hanu hatube hiweyushū hanu judeubu itxamisbu betsa betsapa anushū Saulō hatu yusī taewakubaūkī:

—Jesusrā, Deusū bake kayabiki— akī hatu yuikubainaya ²¹dasibibū nīkai e iki yuinamei:

—Na huninā, Jerusalém anushū ikūwaību hatu itxakawamisshū nenuri hushū nū habū Jesusū kenawē taeshū nū Deus yukaibu nukuri habiaskari wakī nuku atxishū Jerusalém anu Deusbe nukunabu hātξashunika shanē ibubu anu nuku iyunū ika huxianā, ha hunirā, hamamē?— ikaibū

²²hanua Saulo ana hawa dateama Deusū kuxipawē shabakabi judeubu Damasco anu hiweabu hatu yusikubaikī: “Jesus Deusū Katua Messiaski”, akī Deusū hātξa kenenibuwē hatu unāmakubainaya hanua judeubū uī e iki hakiri harakiri xinātima ikaibū

Judeu shanē ibubū Saulo detepanābū pashanikiaki, na hātξarā

²³usha itxapa hatu yusikubainaya judeu shanē ibubu Sauloki sinatakī detekatsis iki hakiri hātξai yubakaxinabū ²⁴Saulō nīkatā unāyā hanu

kaĩkainai atxinũ ika yubakaxinabu bariri inũ mexu merã ha mae ewapa mixki kenebaunibu hikiti shui anu manakakĩ kesheabũ ²⁵hanua hatũ mae anu mixkiwẽ kenekĩ keyatapa wanibu hanu uĩti shui anu Saulõ habu hatu yusĩa Jesus ikũwaĩ haki txiti ikaibu betsabũ mexu merã Saulo kuki ewapaki nanetã buteabu ha mae anua kaĩkaini pashanikiaki.

Saulo ana Jerusalém anu txitũkainikiaki, na hãtxarã

²⁶Hanua pashai kai Jerusalém anu ana hikixina hanishũra Jesus ikũwaĩ betsabube itxanũ ika dasipanã haska hatu itxakawatxakayamakubaĩxinawẽ taea dasibibu haki mesei ikũwãma ikai dabanẽ xinaĩ: “Jesus ikũwãmabia Saulõ nuku beparãtã anũ ika ikimẽkaitsa”, ika haki dateaibũ ²⁷hakiri mesebiaibũ Barnabẽ Saulo Jesusũ kuxipayabu anu iyushũ hatu unãti wamakĩ yuishũkĩ:

—Ana haki meseyamakãwẽ. Damascokiri kakĩ nukũ haibu Saulõ Shanẽ Ibu Jesus uĩ habe hãtxaimaki. Hanushũ Jesus ikũwãtã hawẽ kuxipawẽ Damasco anushũ hawa dateama Jesuskiri hatu dasibi yusĩbaũxinaki— hatu wakĩ hatu beya wamakĩ tapĩmaxinawẽ taea ²⁸hanu hatu anu niti iyuxina haskai hiweyushũ Jerusalém anu Jesusũ kuxipayabube hiwea hawa dateama nukũ Shanẽ Ibukiri yusĩ Saulo hatube hãtxakũkaĩkĩ ²⁹judeubu Grego hãtxawẽ hãtxamisbube hatube hãtxai yuinamekĩ hatu yusĩayã hawẽ yusĩa danaĩ haki sinatakĩ tenãnũ ika yubakaibũ ³⁰hakiri haska xinaĩbũ ikũwaĩbu betsabũ hune nĩkashũ Saulo merabewanũ, iwanã, iãnẽwã kesha Cesaréia anu iyuxishũ harishũ hawẽ mae Tarso anu niwe shashu ewapawẽ nitxĩkĩ yununibukiaki.

³¹Ha haskaibutiã ikũwaĩbu Judéia mai pakea anuabu inũ, Galiléia mai pakea anuabu inũ, Samaria mai pakea anuabu itxakawakĩ ana tsuã hatu meabuma unãnuma hawama hiwei hanua ikũwaĩbu kuxipai Deus kuxipaki meseaibũ hawẽ Yushĩ Papatũ hatu merabewaya ana itxapabũ ikũwaĩ mirimabu hatuki dasikubaini hiwenibukiaki.

Pedrõ Enéias kaya wanikiaki, na hãtxarã

³²Hanushũ Pedrõ ikũwaĩbu hatuki bakĩ hatu yusĩ kakũkaũkĩ mae betsa Lida anu hiweabu anuri Deusũ enabu meribi anu hatuki bai hikishũ ³³hanua huni betsa hawẽ kena Enéias hawẽ yura babuniwẽ taea ma oito ano kabia benisma dakasa Pedrõ betxitã ³⁴yuikĩ:

—Enéiasĩ, Jesus Cristõ mia kaya waikiki. Benitã ha mĩ haki dakamis pewariwe— aka

hawaira Enéias benitã hawẽ yura damestëtã nikaunaya ³⁵ha mae dabe Lida inũ Saronã anu hiweabũ ha huni Pedrõ kaya waxina uĩkĩ Shanẽ Ibu Jesuskiri nĩkakĩ dasibibũ xinã betsa wanibukiaki.

Dorcã mawa Pedrõ bestẽwanikiaki, na hãtxarã

³⁶Ha bari haskaitiã mae betsa txaima Jope anushũ aĩbu betsã Jesus ikũwaĩ hawẽ kena Tabita, Grego hãtxawẽ hawẽ kena Dorcasrã,

aĩbu duapatũ hawauma nuitapaibu hatuwẽ dabanã ikĩ hatu merabewakubaĩmis ³⁷e iskaũ hawaira isĩ bitã mawakẽ hawẽ yura datxushũ manaũri hiwe keyatapa dĩtu anu iabaĩ mapemashũ datãtanabũ ³⁸ha mae urama Lida anushũ Pedrõ hatu yusĩaĩ Jope anuabũ ikũwaĩbũ nĩkatã hau habũ ha yuishũtanũbũ huni dabe nitxĩkĩ hatũ hãtxa hatu yuikĩ:

—Pedro yuikinã, eska watãkãwẽ: “Menaã, hawairakiaki. Jope anu huriwe”, atãkãwẽ— hatu wa bushũ yuiabu

³⁹hanua Pedro iyuabu hatube kai hikitanaya hanua Pedro ana uke merã iyukĩ hanu yura mawa datãbu anu hikimaibũ ha aĩbu beneuma nuitapaibũ keshebauna kashakĩ Dorcas hiweshũ hatu batxi washũmis Pedro uĩmai ana kashatxakayamaibũ ⁴⁰hatuwẽ nuikĩ dasibi hatu kaĩmataã dãti ishũ Deus yukashũtã aĩbu mawa beiskĩ yuikĩ:

—Tabitaã, benirikirãwẽ— aka bepeshetã Pedro uĩtã tsauwaya ⁴¹Pedrõ metsũshũ benitã hanushũ aĩbu beneuma nuitapaibu inũ ikũwaĩbu betسابu hatu kena beshũ ma aĩbu ana hiwema uĩaĩbũ ⁴²dasibi Jope mae ewapanu hiweabũ Pedrõ haska waxina nĩkaxishũ itxapabũ Shanẽ Ibu Jesus ikũwãnibukiaki. ⁴³Hatu haska washũxina hanu hatũ ina awa bitxi payukĩ pewamis hawẽ kena Simãonẽ hiwe anu hiweyushũ Pedrõ hatu yusiyukubainikiaki.

Cornéliõ Pedro kena hawẽ hiwe anu kanikiaki, na hãtxarã

10 ¹Cesarĩa mae ewapanushũ Romano capitão hawẽ kena Cornãlio inikiri mia yuinũ nĩkawe. Hawẽ 100 soldadobu shukuwaya hatu kenamisburã, Italiana wamisbu ²ha huni pepa enayamistũ hawẽ hiwe anu hatube hiweabubetãs Deus kãwãkubainikiaki, hanushũ judeubu nuitapaibuwẽ nuikĩ merabewanũ, iwanã, hatu pei inãshuni inũ Deusbe hãtxai heneismarã. ³Hanua shaba betsatĩa ma bari kai 3:00 da tardekẽ nama keska uĩayã Deusũ nai tsuma betsa hawẽ dĩtu merã hikikaikĩ shabakabi Cornãlio uĩmabaĩ yuikĩ:

—Cornãlioõ— aka

⁴hakiri besushũ uĩ datehairakĩ yukakĩ:

—Shanẽ ibuũ, hawamẽ?— aka

hanushũ nai tsumã yuikĩ:

—Deus kãwãkĩ mĩ dayuimis inũ haska dasibi nuitapai hawa hayabuma mĩ hatu merabewamis Deusũ nĩkatã ma miwẽ benimaikiki. Haskawẽ taeshũ mia yuinũ nĩkawe. ⁵Ha mae Jope anu tsuara yunuriwe, hau Simão Pedro mia ishũtanũbunã. ⁶Ha Simão betsã hatũ bitxi pewakĩ pukumistũ hiwe anu iãnẽwã kesha dapi Simão Pedro habe hiwea haki nukui bukanikiki— abaini

⁷ha nai tsuma habe hãtxatã kakẽ hawẽ tsuma dabe inũ soldado betsã Deus kãhairawariakĩ Cornãliõ hãtxa nĩkashũmis hatu kenashũ ⁸dasibi

haska nai tsumã yuishu hatuki txanitã hatu nitxiã bari kabiaya Jopekiri bui

⁹hanua bai putxinĩ ushaxini ana bui ma Jope kemai ma bari mananãbi hikiriama bui bai tanayubainaibũ habiatiãri Pedro Deusbe hãtxanũ ika mai bawa hiwe sapa sheni anu mapeketã ¹⁰bunikĩ pinũ ika ibiaya hatũ bawamistũ dama pewashunaya usha nama keskakĩ Pedrõ uĩkĩ ¹¹nai bepẽmanakainai uĩayã tari ewapa keshema ha dabe inũ dabe deshũ tibi dispiwẽ neshabauna mai anu Pedro bebũ buteaya ¹²ha tariki uke merã yuinaka tae dabe inũ dabeya inũ, mã sharamisbu, inũ peiyabu mata judeubũ pisbuna Pedrõ uĩayã ¹³hanushũ nai anua hui tashnikĩ Pedro yuikĩ:

—Pedrõ, benitã haratura ha yuinaka mã uĩã betsa deteshũ piwe— aka nĩkatã

¹⁴Pedrõ nemakĩ yuikĩ:

—Shanẽ Ibuũ, ea haska wayamawe. Nukũ shenipabũ beya txibãkĩ yuinaka betsa betsapa atimapa haska nũ pitirumahaira Moisés nuku nemani ã pismahairaki— aka

¹⁵ana hawẽ hui tashnimakĩ yuikĩ:

—Deusũ hawara dasibi na mia pewashũshuwẽ taeshũ ana: “Deusũ mia nemamis”, yuikĩ ana danãyamawe— atã ¹⁶ana dabekĩ habiaskari Pedro yuikĩ nemaya hawaira ha tari ewapa nai anu ana hawẽri ainibainaya ¹⁷Pedrõ dama haska uĩshuwẽ taea: “Haskara ea yui ishume?” ika xinaĩ hawẽ dabanã nuihairaya hanua Cornélio anua bea Simãonẽ hiwe yuka ikubirani hawẽ hiwe anu kematã ¹⁸unãshubima yuka ikĩ:

—Na hiwe anurã, Simão Pedro hiweame?— ikai bũ ¹⁹ha kenaibu nĩkama Pedrõ haska uĩshu unãnũ ika xinã heneriamakẽ Deusũ Yushĩ Papatũ yuikĩ:

—Uiwẽ. Huni dabe inũ bestitũ mia benakanikiki. ²⁰Ë hatu yunuxinawẽ taea benikaĩ bututã hawawẽ nuiama hatube katãwẽ— aka

²¹Pedro bututã Cornéliõ hatu yunuxina Pedrõ hatu yuikĩ:

—Ha mã benairã, ã eaki. Hawa wanũ ishũ mã ea benai?— hatu wa

²²habũ Pedro yuikĩ:

—Nukũ shanẽ ibu capitão hawẽ kena Cornéliõ nuku yunuxina mia anu nũ hushuki. Huni duapa pepatũ Deus kẽwãriamiski. Haskawẽ taeshũ judeubu dasibibũ abukĩ hakiri pe xinãmisbuki. Hanushũ hau mã hãtxa nĩkashanũ Deusũ nai tsuma betsa yunua nĩkaxĩshũ hawẽ hiwe anu mã kanũ mia kenaikiki— akabu

²³habianu Simãonẽ hiwe anu Pedrõ hatu baxia hanu hatube ushaxini penaya Pedro hatube kaya ikũwaĩbu betsabu ha Jope anu hiweabũ Pedro banawabainaibũ

²⁴hatube kai ana bai putxinĩ ushaxini bui ma Cesaréia anu hikitã buaibũ Cornéliõ hawenabus inũ hawẽ haibu habe duanamemisbu hatu

ishū hawē hiwe anu hatu itxawashū hatubetã Pedro manaya ²⁵hawē hiwe anu Pedro hikinū ika kaya Cornéliō itanū ika kaikaĩ kēwai Cornélio ha bebū dāti itã mepia dakakē ²⁶hanushū Pedrō nemakī metsūtã benikī yuikī:

—Eki haskama beniriwe. Ē hawamaki. Mia keska ē huni bestiki— atã ²⁷hanua habe nia hãtxarabetã hanua hawē hiwetã bitxibaina hawē dītu ewapa merã yura itxapa hanu itxabu anu hatuki nukutuxitã ²⁸Pedrō hatu yuikī:

—Nū judeubu nukū shenipabū beya txibaĩ judeubumabe nū itxatirumahaira inū matū hiwe anu nū hikitirumahairari mā unaiĩ. Nū haskabiamiskē ē ana matu danāyamanū Deusū ea unāmakī yusīxinawē taeshū ²⁹mī ea kenaxikē hawa matu ana danaĩ mesei teai niti ikama mia anu ē hushuki. Haskanū ishū mī ea kenaxinamēkaĩ ea yuiriwe— aka ³⁰Cornéliō kemakī:

—Ma shaba dabe inū dabetiã ka na habia baritiãri 3:00 da tardekē ē hiwe anua samakekī Deus kuxipa ē ea akaya ē besuuria Deusū nai tsuma betsa tari hushupa txashahaira sawea nishū ³¹ea yuikī: “Cornélioō, mī Deusbe hãtxakī dayuimis inū haska dasibi nuitapaibu mī merabewamis Deusū uikī xinākubaĩmisshū ma miwē benimaikiki. Haskawē taeshū mia yuinū nīkawe. ³²Ha mae Jope anu tsuara yunuwe, hau Simão Pedro mia ishūtanunã. Ha Simão betsã hatū bitxi pukukī pewamistū hiwe anu iãnēwã kesha dapi Simão Pedro habe hiwea haki nukui bukanikiki”, ea wa ³³hau mia itanūbū hawaira ē hatu yunua buxīshū mia iweabu txanima nukuwē nuikī mī nuku pewabirāshuki. Haskawē taea natiã Deusū nuku uīayã hawē hãtxa nīkanū ika nū ma itxaki. Hawara mī Deusū mia yunua mī hatu yusīmis nukūri nū nīkakatsis ikai nuku yusīriwe— aka

Cornélio inū hawenabu Pedrō hatu yusīnikiaki, na hãtxarã

³⁴hanushū Cornéliō hiwe anu itxabu Pedrō hatu yusīkī taewakī yuikī:

—Natianã, txanima mai hirabi anu shukuabu tibi nuku damiwanirã, nū habiaskas shabakabi ea ma uĩmaxinaki. ³⁵Na mai anu hiwebaunabu tsuabūra Deus nīkai haki mesekī txibã pewaibu Deusū hawa hatu danaĩsma ea yusīxina na habiatiã ē ma tapīaiĩ. ³⁶Hamē dasibibū Shanē Ibu Jesus Cristōnã, Israelbu anu dukū hau habu yusīnū Deusū yununiki. Hanushū tsuabūra hawē hãtxawē unānuma hiwetirubukiri Jesus hushū hatu yusīkubaĩyamaki. ³⁷Hanushū ha dukunã, Naximanika Joãonē Deusū hãtxa hatu yusīayã nīkatã hatū txakabu henetã hawenabu unāti wamaibu Joãonē hatu naximakubainaya Jesusū Galiléia anushūri yusī taewakī Judéia mai pakea anu yusīkubaunaikiri kakaiibu txanima mā nīkayamaki. ³⁸Hanushū Jesus Nazaré anua hawē Yushī Papatū kuxipawē Deusū Jesus kuxipahairawa ha meranua merabenākūkainaya habu

diabo Satanásã itxakawakĩ isĩ betsa betsapa hatu tenemamis nuitapaibu Jesusũ hatu shushawakĩ pewakĩ hatu merabewakubaĩyama mã nãriaii. ³⁹Haskarã, nukunã, ibubis nũ uĩkubirãyamaki. Hanua Jerusalém anushũ inũ mae betsa betsapa Judéia mai pakea anushũ Jesusũ haska wakubainai atxishũ cruzki mastashũ tenãyamabuki. ⁴⁰Hanua shaba dabe inũ bestitiã Deusũ ana bestẽwãxina hanua Jesus nuku ana uĩmakĩ ⁴¹ana yura itxapabu hatu uĩmama hatibu Deusũ bebũkiri ma nuku katuni besti ana nukuki nukutã nuku uĩmayamaki, mawa ana bestẽxinakiri nũ hatukiri txanikubaĩshanũbunã. Ha Jesus mawa ana bestẽkaĩxina hiwearã, ana habetã pikĩ nũ habetã nushukubaĩyamaki. ⁴²Hanua bari hawẽ heneaitiã haska yura dasibi mawabu tibi inũ hiweabu tibi Jesus shanẽ ibukĩ hatu unãti washanai nũ hatu yusĩkubaĩshanũbũ Jesus habitũ nuku yunubaĩyamaki. ⁴³Haska inũ, uatiã habias Jesuskiri Deusũ hãtxa yuishunika dasibibũ bebũkiri hatu yusĩkĩ: “Deusũ Messias tsuabũra ikũwaĩbu hawẽ taeshũ habũ txakabu Deusũ hatu buashunũbarikiki”— akĩ

Judeubumabiabũ hawẽ Yushĩ Pepa Deusũ hatu inãrianikiaki, na hãtxarã

⁴⁴Pedrõ hatu yusĩ hãtxai heneriamakẽ hanua ha habũ hawẽ hãtxa nĩkaibu anu Deusũ Yushĩ Pepa hatuki hikiaya ⁴⁵⁻⁴⁶nawã hãtxa betsa betsapa tsuã hatu yusĩriamawẽ hãtxai taekĩ Deus kẽwaĩbu ha ikũwaĩbu Jope anua Pedrobe bekãshu hatu nĩkai: “Habaa! Habu judeubumabiakẽ Deusũ hatu haska hãtxamakĩ hawẽ Yushĩ Pepa haburi ma hatu inãshuki”, ikaibũ ⁴⁷judeubu habe bekãshu Pedrõ hatu yuikĩ:

—Na judeubuma haskaiburã, “Na yurabu hatu naximayamanãwẽ”, iki nemai nũ itirumaki. Nuku keskari wakĩ Deusũ hawẽ Yushĩ Pepa ma hatu inãshuki— itã,

⁴⁸dasibi Jesus Cristo habũ ikũwãkãshu hau hawẽ kenawẽ taeshũ hatu naximanũbũ Pedrõ hatu yunua hatu naximanibukiaki. Hanushũ Pedro ea akĩ hau usha eskarabes hatube hiweyunũ baxiyunibukiaki.

**Judeubumã ikũwãxinabukiri Jerusalém anushũ
Pedrõ hatu banabimanikiaki, na hãtxarã**

11 ¹Hanua nawã mae anushũ judeubumabiabũ Jesuskiri Deusũ hãtxa nĩkatã ikũwãxinabũ kakaiibu Judéia anushũ Jesusũ kuxipayabu inũ ikũwaĩ betsabũ nĩkaxinabũ ²hanua Pedro Jerusalém anu txĩtũkirani hikixikẽ ikũwaĩbu betsa betsapabũ judeubũ beya abuhairamisbu haki ha ikĩ txitekĩ ³yukakĩ:

—Haskai judeubuma anu hatu uĩ kashũ mĩ hatubetã pixiãmẽ, nukũ beya ana txibãma kanekinã?— akabu

⁴hanushũ Pedrõ hatu kemakĩ haska iki taekaĩxina dasibi hatu yuikĩ:

⁵—Ha mae Jope anua Deusbe hãtxai usha namai keskakĩ ẽ uĩayã nai bepẽmanaya tari keshema ewapa dabe inũ dabe deshũ tibi dispawẽ

neshabauna ea anu buteaya ⁶habia tariki uke merã yuinaka tae dabe inũ dabeya betsa pianãbu inũ, maĩ sharamisbu inũ, peiyabu mata judeubũ pibsuma ã uĩayã ⁷hanushũ nai anua hui tashnikĩ ea yuikĩ: “Pedroõ, benitã haratura ha yuinaka mĩ uĩãã betsa deteshũ piwe”, ea waya ⁸eã kemakĩ: “Shanẽ Ibuũ, ea haska wayamawe. Nukũ shenipabũ beya txibãkĩ yuinaka betsa betsapa atimapa haska nũ pitirumahaira Moisés nuku nemani ã pismahairaki”, ã aka ⁹hanushũ nai anua hawẽ hui tashnikĩ ana ea hãtxa wakĩ xinã tapĩmakĩ ea yuikĩ: “Deusũ hawara dasibi na mia pewashũshuwẽ taeshũ ana: ‘Deusũ mia nemamis’, yuikĩ ana danãyamawe”, ea watã ¹⁰ana dabeki habiaskari ea yuikĩ nemaya ana hawẽri naiuri ana ainikĩ buaya ¹¹ẽ haska uĩayã huni dabe inũ bestitũ Cesaréia anushũ hatu yunua bexishũ ã hanu ikanu ea benaibũ ¹²hanushũ Deusũ Yushĩ Papatũ ea yunua hawa teama ã hatube kaya na seis nukubetã Jesus ikũwaĩbu ebe mapuabu ebe buriatãxinabuki. Hatube kai nawã hiwe anu nũ hikiaya ¹³hanushũ nawã nuku yuikĩ: “Ë hiwe anu ã hiwekẽ Deusũ nai tsuma betsa hushũ ea yuikĩ: ‘Ha mae Jope anu tsuara yunuwe, hau Simão Pedro mia ishũtanunã. ¹⁴Ha huni hushũ kakape mĩ hawẽ pashashanai mia inũ minabuya mia yusishanikiki’, ea wa ã mia kenaxinaki”, ea waya ¹⁵hanushũ Jesuskiri kakape ã hatu yusĩ taewayã Deusũ Yushĩ Pepa ha dukũ nuku anu huyama keskai habu anuri hushũ hatuki dasikĩ hatu atxixinaki. ¹⁶Hanushũ hatu haska waya haska bebũkiri nukũ Shanẽ Ibu nuku yuibaini ã xinãxinaki: “Txanima Naximanika Joãonẽ henewẽ hatu naximakubaĩxinaki. Hakia Deusũ Yushĩ Papatũ matu naxima keska wakĩ matu kuxipa washanikiki”, akĩ Jesusũ nuku yuibaini ikai ã uĩxinaki. ¹⁷Hanushũ nukũ Shanẽ Ibu Jesus Cristo nũ ikũwãã hawẽ kuxipa nuku inãyama keska wakĩ ha nawabũri ikũwaĩbu Deusũ habiaskari waya eã haska washũ Deus ã nematiruma xixiãki— hatu wa

¹⁸Deusũ hatu haska waxina Jerusalém anua ikũwaĩbũ nĩkatã ana Pedro ha akama nesetã Deus kẽwãkĩ yuikĩ:

—Judeubuma dikabiwẽ nuikĩ hatu xinã betsa wamakĩ txanima Deusũ hatu hiwekuã inãriaikiki, ikibi imakinã. Pehairaki— anibukiaki.

Antioquia anushũ kaka pepa nĩkakĩ ikũwãnibukiaki, na hãtxarã

¹⁹Ha shabatiã Estêvão tenãtã habiatiãri dasibi Jesus ikũwaĩburi hatu itxakawai berukubaunaibuwẽ taea datei Fenícia mai pakea anu inũ, Chipre natukã anu inũ, Antioquia mae ewapanu pashai buimashũ judeubuma yusĩama hatunabu judeubu besti Jesuskiri kakape hatu yusĩãibũ ²⁰hakia ha haskaibũ ikũwaĩ betsabu Chipre anuabu inũ Cirene mai pakea anuabu Antioquia anu bushũ Gregoburi Deusũ kakape Shanẽ Ibu Jesuskiri hatu yusĩrianibukiaki. ²¹Hanua habu Deusũ Yushĩ Papatũ hatu kuxipa waya hatũ yusĩawẽ taeshũ Gregobu itxapabũ hatũ xinã sheni henetã hiwea bena nukũ Shanẽ Ibu Jesuskiri ikũwãnibukiaki.

²²Hanua Antioquia anushũ judeubumã ikũwaĩbukiri Jerusalém anushũ ikũwaĩbũ hatu nĩkatã Barnabẽ hau hatu merabewatanũ yunuabu ²³Barnabé kai hikixĩshũ habu Deusũ hatu duawakĩ hatu kuxipa wakĩ pepawai uĩ benimahairakĩ hatu ana yusĩ pewakĩ hau dasibi hawa txakabayabi husiama nukũ Shanẽ Ibu Jesus ikũwaĩ txĩtuãma txibãkubaĩkĩ apakenũbũ hatu yusĩã ²⁴Barnabé huni pepa duapa Jesus ikũhairawamis Deusũ Yushĩ Papatũ kuxipa hayakẽ hawẽ yusĩã nĩkai itxapabu nukũ Shanẽ Ibuki dasikubainibukiaki.

²⁵Hatu haska watã tsube merabetima: “Hau Saulõ ea merabewayunũ”, ika Barnabé Tarso anu benai kaxiã ²⁶Sauloki nukutã Antioquia anu iyui habe hari kaimashũ hatu yusĩkĩ ano bestitxai nitxĩkĩ yura itxapabu kaka pepa Jesus Cristokiri hatu yusĩkubainaibũ ha mae anushũ nawabũ Jesus ikũwaĩbu hatukiri xinãkĩ kenakĩ: “Naburã, habũ Cristo txibaĩbuki”, iwanã, hatu kena taewanibukiaki, nawã hãtxawẽ kenakinã, “Cristãos”, hatu wakinã.

²⁷Ha haskaibutiã Deusũ hãtxa yuishunika betsabu Jerusalémkiria Antioquia anu bushũ ²⁸betsa hawẽ kena Ágabo ikũwaĩbu itxabu anu hatu yuinũ ika benishũ Deusũ Yushĩ Papatũ merabewakĩ hãtxamaya bebũkiri haskashanai hatu yuikĩ: “Mai hirabi anu piti hayama dasibibu bunihairashãkanikiki”, hatu wayama Roma maiwã anua Cláudio César shanẽ ibuhairaya haska Ágabõ hatu bebũkiri yuiyama haskanibuki.

²⁹Haskaibũ Judéia anushũ ikũwaĩ nuitapaibu hatu merabewanũ, ishũ, yuinametã hatu pei itxawashũkĩ pei itxapayabũ itxapa inãkĩ eskarabes hayabũ eskarabes inãkĩ hatu itxawashütã hanua ³⁰Judéia anushũ ikũwaĩbu mekenikabu hau pei hatu habũ inãtanũbũ Antioquia anushũ ikũwaĩbũ Barnabé inũ Saulo katutã yununibukiaki.

Tiago tenãtã Pedro Herodesĩ hatu bitximanikiaki, na hãtxarã

12 ¹Ha haskaibu habiatiãri shanẽ ibu Herodesĩ ikũwaĩbu betsabu hatu itxakawakĩ taewakĩ ²soldadobu hatu yunua Joãonẽ betsa Tiago nupe txaipawẽ detekĩ tenãxinabũ ³haska waibu judeu shanẽ ibubũ uĩkĩ abuxinabũ Herodesĩ unãtã judeubũ misi shashama besikĩ pimisbutiã Pedrori hatu atximashũ ⁴bitxiti hiwe merã Jerusalém anu hatu bitximatã habu tibibũ hau mekekĩ keshebainũbũ soldadobu quatro shuku tibi habu quatro soldadobũ habuã hau mekenũbũ hatu yunutã xinãkĩ: “Judeubu Páscoa nawai besi keyuaibũ Pedro unãti washũ ẽ hatu tenãshũriashanaii, judeu shanẽ ibubu benimawakinã”, ixĩkẽ ⁵Pedro kene merã bitxixinabu hatu keshe pehairawamabũ hanua ikũwaĩbu hawẽ nuikĩ hau tashnimanũ hakiri Deusbe hãtxakĩ yukatxakayamashũkĩ heneabumakẽ

Pedro bitxiti hiwe anua haskabiamawatã nai tsumã tashnimanikiaki, na hãtxarã

⁶hanua Pedro bitxishũ ushãxĩkĩ penaya yurã kaiãnẽ berubi uĩaĩbũ Herodesĩ Pedro unãti watã tenãkatsi ikĩ manaya hanua Pedro soldado

dabebe mane dispi txiwetameyawē habe meneshekea mekea habe ushabū, hanua daberu kini hawē beputi kesheshū uīhairaibū ⁷hanua bitxiti hiwe merā Deusū nai tsuma damii hiki txashai shabakaī bitxiti dītu merā shaba wa nitā nai tsumā Pedro usha bestēwākī tima tima aka besteī tekuitanai yuikī:

—Menaā, hawaira beniriwe— akaya ha Pedro mane dispi soldadobube meneshekea hawaira hamebi txurekei niri ikaya ⁸nai tsumā ana yuikī:

—Mī nanesheketi sawetā mī bitxi tae saweriwe— aka

Pedrō haska waya nai tsumā ana yuikī:

—Mī tari bemakia peyabukutā ea txibābirāwē— aka

⁹hatxū kakī txibābaīkī xinaī: “Ē haskai? Ē txanima ma besteā daka kai ikai? Na ea nai tsumā eska wairā, ē daka usha namai ikai?” ishū xinābaini ¹⁰ha dukū soldado betsa daībaini ana betsāri keshea ha katxu daīriabaini kai bitxiti hiwe hawē henea beputi anu mane beputi kuxipawē bepuabuki kemaya hamebi bepēmanaya hanua kaīkaini tashnirabetā bai tanabaīkī nai tsumā ha besti henebaina ¹¹hanushū Pedrō xinā kayatiwakī unātā:

—Herodes inū judeu shanē ibubū dasibi ea haska wakatsi ikaibu nemanū, iwanā, txanima ē Shanē Ibū hawē nai tsuma yunua hushū ea tashnimashu xinākī ē unaiī— itā,

¹²haska xinābaini João Marcōs ewa Mariā hiwe anu ikūwaī mirimabu itxashū Deus hakiri yukashunaibu anu Pedro kashū ¹³hiwe hemaītī kenenibu hanu hikiti shui beputi tsā tsā akaya Mariā tsuma aibu hawē kena Rode:

—Tsua ikimēkaī?— ika kaīkaī uī kashū ¹⁴Pedrō hui nīkatā benimahairai bepēshūyuama kuxikaī uke merā hiwetā hikishū hatu yuikī:

—Pedrorā, ua ma beputi kesha nia ē nīkatanaiī— hatu wa

¹⁵hawē hātxa ikūwāma habūri yuikī:

—Hamabiakē mī humei ikaiī— akabu

—Ē txanīwaī ikai dabanē mā ikaiī. Haskamaki— ikaya habū ana yuikī:

—Hamaki. Hatū mekea hawē nai tsuma mī nīkatanamē ikai?— ikaibū

¹⁶Pedrō hatu kenakī tsā tsā akī heneamakē hanua bepēshū betxitā uī e iki teku iki keyuaibū ¹⁷hanushū hikitā hawē mekenē hatu nemakī hatu hātxa nesematā haska hawē Shanē Ibuā bitxiti hiwe anua tashnimakī pashawashu hatu yuitā ana yuikī:

—Haskatā ē kaīshu Tiago inū ikūwaību betsabu ea hatu yuishūshākāwē— hatu watā hanua hune kaīkaini mae betsa anu iruyui kakē

¹⁸hanua ma penai shabaya Pedro haskatā kaīkaina unāma bepushui bitxiti hiwe anua soldado uīnikabu haskatima datehairaibū ¹⁹hanushū

hawẽ soldadobu betsa Herodesĩ yunua benabaũkĩ Pedro betxiabumakẽ ha soldadobũ Pedro mekexinaibũ Herodesĩ hatu yuka hawa yuitirubumakẽ hatũ hãtxa abumahaira ha habũ meke txakaxina soldadobu kupikĩ hau tenãnũbũ soldado betsaburi yuntã hanua Judéia henebaini kai Cesaréia anu Herodes hiwei kanikiaki.

Haskatã Herodes mawanikiaki, na hãtxarã

²⁰Hanua Tiro anuabu inũ Sidom anuabuki Herodes hatuki sinataya Tiro inũ Sidom yurabũ piti Herodesĩ maiwã anua bimisbuwẽ taeshũ shanẽ ibu Herodes daewakatsis iki habe shanẽ ibu beshmas Herodes merabewamis Blasto anu beshũ hau hatu merabewakĩ daewamashanũ haibu watã yukaxinabu ²¹hanua shaba betsatiã Herodesĩ hatu hãtxa wakatsi hatu kenaxina bea shanẽ ibu betsaburi beria itxa maniabũ hatũ besuuri Herodesĩ itxati tari hawẽruahaira sawea hanushũ yunumis anu tsaushũ hawẽ hãtxa hatu yuikĩ taewaya ²²hanushũ hunibũ habũ hawẽ hãtxa nĩkakĩ abukĩ unãshubima yuikĩ kẽwãkĩ:

—Na Herodes hãtxairã, huni keskamaki. Ha deus betsa keskai hãtxaikiki— akaibũ

²³Herodesĩ haska waibu unãkĩ nĩkabiakĩ hatu hawa nemama hatũri Deus kẽwãkatsi ikamawẽ taeshũ hawaira Deusũ nai tsumã Herodes kupikĩ isĩ tenemaya nami shenã kaiãnẽ pia mawanikiaki.

²⁴Haskaxikẽ Deusũ Messias Cristo mekenãkiri mae betsa betsapa tibi hiweabu anu hatu yuikubainibũ nĩkakĩ ana itxapabũ Jesus ikũwãkubainibũ

²⁵hanua Antioquia anua ha pei hatu itxawashũtã bushũ Jerusalém anu Jesus ikũwaĩbu mekenikabu hatu inãtã harishũri hatubetã Jesuskiri hatu yusikubaikĩ keyutã txitũkirãkĩ João Marcos Antioquia anu iwei Barnabé inũ Saulo bunibukiaki.

Barnabé inũ Saulo Deusũ hatu yunua txai yusikĩ taewai buaibu hatu nitxĩnibukiaki, na hãtxarã

13 ¹Antioquia anushũ ikũwaĩ itxaibu habũ hatu yusiãinã, eska hayanibukiaki, Deusũ hãtxa meshtãmanikabu inũ habũ kakape Jesuskiri hãtxa yusĩnanãmisbu betsa betsapaburã. Hatũ kenarã, Barnabé inũ, Simeão hawẽ kena betsa Mexupa inũ, Cirene anua huni betsa Lúcio inũ, Galiléia shanẽ ibu Herodesbe ewani Manaém inũ, Saulo inibukiaki. ²Hanua ana shaba betsatiã habu itxatã samakekĩ Deus kẽwaibũ Deusũ Yushĩ Papatũ hatu yuikĩ:

—Barnabé inũ Saulo daya betsa ma ã hatu kenani ã hatu yunukatsis ikaya hau dayatanũbũ meribi hatu nitxĩkãwẽ— hatu wa

³hanushũ samakeyabi hau Deusũ hatu mekekubaĩshanũ habũ hatu yunuaibũ yukashũtã hau dayatanũbũ meribi wakĩ mamepishũ hatu nitxiãbu

Natukā Chipre anushū Barnabé inū Saulō hatu yusīnikiaki, na hātẓarā

⁴hanushū Deusū Yushī Papatū Barnabé inū Saulo Antioquia anua nitxīkī yunua hatū merabewanika João Marcos iyui iānēwā maikiri kesha anu mae betsa Selêucia anu hikitā natukā ewapa hawē kena Chipre anu kakatsi pakatā niwe shashu ewapawē inatā besusi pukei kai ⁵mae betsa Salamina bai butuatū keti itā hanu hikixīshū hanu judeubu itxamisbu tibi anushū Deusū Messias Cristo mekenākiri hatu yusī taewatā hatu yusīkubauni ⁶hanua natukā mae tibi anu Barnabé inū Saulo uī bukubaini atimas ha natukā shanē ibū mae hawē kena Pafos anu hikiabu hanu judeu betsa hawē kena Barjesus, hawē Grego kenarā, Elimas, huni mukayai txani txakai: “Deusū hātẓa yuishunika nikapai ē hawē kuxipayaki”, ikī hatu parāmīs ⁷hanu Romano shanē ibu Sérgio Paulobe ha huni mukaya ha dayashūmis hiwekē ha shanē ibu unānēpa xinā pepayatū Barnabé inū Saulokiri kakai bu nīkatā Deusū kakape Jesuskiri hātẓa nīkakatsis ikī hau hatu ishūtanūbū yunua hatu iweabu beshū ⁸hanushū hatu yuikī taewaibū Romano shanē ibū Jesus ikūwaī nemanū ika huni mukayatū Barnabé inū Saulokiri hātẓai daketapakī hatu ha akaya ⁹hakia Saulo, hawē kena betsa Paulo, Deusū Yushī Papatū kuxipayatū beri ikama beishairakī ¹⁰huni mukaya Elimas yuikī:

—Diabo Satanásā bakeē, parananaī txani txakai dasibi pepaki mī sinatamiski. Haskai Yavé Deuskiri txani txakai Deuskiri bai mī nuku yushtu wamakatsis ikai? ¹¹Mī haskaiwē taeshū natiā Yavé Deusū mia kupikī bari txasha mī uīyamanū mia bekūwāyuikiki— akaya

hawaira mexū bepua hawa uīyama hanua: “Tsuā ea metsūbainimēkaī?” iki mexā atanikiaki, ma bekūwanā. ¹²Haskai uītā inū Jesuskiri yusīaī pepa ma hatu nīkatā: “Habaa!”, ikī Romano shanē ibu Sérgio Paulō Shanē Ibu Jesus ikūwānikiaki.

Paulo inū Barnabé Antioquia mae ewapa Pisídia mai pakea anushū hatu yusīnibukiaki, na hātẓarā

¹³Hanua Paulo hawē haibuaibube Pafos anua niwe shashu ewapaki inabaini iānēwā besusi pukei mai pakea betsa Panfília anu kai mae Perge anu keti iki kai buaibū hanushū João Marcōs hatu henebaini Jerusalém anu ana txītūkiranaya ¹⁴hanua Perge mae anu niti ikama bui mai pakea betsa Pisídia kapukebaini mae ewapa betsa Antioquia anu hikixinabū hanua huīrukūti sábadotiā hanu judeubu itxamisbu anu hikia hatube tsauwabū ¹⁵hanushū Moisés kenei inū Deusū hātẓa yuishunikabū kenei bu una anua yusīkī hatu yui menetā habū yusīmisbu shanē ibubū Paulo inū Barnabé yuikī:

—Ē betsabuū, mā hawa nuku yusītanū ika huxiāmēkaī? Nukunabube benimawakī ikis nuku yuirikāwē— hatu wa

¹⁶hanua Paulo benitã hau pesnübü hawẽ mekẽ sanãtã hatu yuikĩ:

—Israelbu inũ dasibi nawabu habu mã Deusũ kuxipaki mesemisbuũ, matu yuinũ ñikakãwẽ. ¹⁷Habias Yavé Deusũ nukũ shenipabu katunishũ habiatũri Egito anu hatu iwenishũ nawabu keska hiwemakĩ harishũ hatu pahairawa hanu hiwekubainaibũ hanushũ hawẽ kuxipawẽri nawabu nematã ha mai anua hatu tsekabirãkĩ ¹⁸hanu tsua hiweabuma anu hatu iweimashũ iake iakemakĩ 40 ano nitxĩkĩ Deus bikawabiabu hawa hatu danãma hatu mekekubainikiaki. ¹⁹Hanushũ mai pakea betsa Canaã anu sete nawa shukua tibi hatu mebĩmakĩ hatu yamawamatã ha mai nukũ shenipabu ibuwani ²⁰ha habu haska wakubirãkĩ 450 ano nitxiĩ bikanibukiaki.

Hau hatu merabewayunũ mekenikabu besti wakĩ Deusũ habu yunukubaĩmis hawẽ henea Deus hãtxashunika Samuelĩ hatu mekeriaya ²¹hanushũ habuã hau hatũ mai hirabi mekẽnũ huni hatũ shanẽ ibuhairawanũ ika Deus ea akaibũ Benjamimnẽ baba Quisĩ bake Saul Deusũ katushũ yunua shanẽ ibukĩ 40 ano nitxiãyã ²²hanushũ Saulõ Deus ana pe txibãmawẽ taeshũ ana Deusũ merabewama hawẽ kuxipa mebĩtã hanushũ Jessẽ bake Davi hau ha mai hirabi shanẽ ibunũ, iwanã, kẽwãkĩ Deusũ yuikĩ: “Davi haska ẽ akatsi ikai akĩ ea benimawamistũ ẽ hãtxa txibãkĩ hatũ Israelbu pe mekekubaishanikiki”, hatu waniki. ²³Haska yubakanishũ Davi bababu anua betsã Israelbu dasibi hau hatu merabewakĩ hatũ txakabu buashütã mekeshanũ— iwanã —yuini natiã Deusũ Jesus yunuyamaki. ²⁴Hanua Jesusũ hatu yusĩriamakẽ Naximanika Joãonẽ ha dukütũ hawẽ kaka pepakiri Israelbu hatu yusĩkĩ yuikĩ: “Matũ xinã betsa watã Deuskiri mã txakabumis henerikãwẽ. Mã haskaya ẽ matu naximashanaii”, hatu wakubaini ²⁵ma hawẽ daya menei kawãkĩ Joãonẽ ana hatu yuikĩ: “Ha matũ merabenã Deusũ yunushanai yuiniburã, ẽ, eamẽ mã ea xinai? Ẽ hamaki. Hakia shanẽ ibu kuxipahairatũ ea binũa txipu hushanikiki. Haskawẽ taea earã, hawẽ tsumapã hawẽ daya ashũmis keska wakĩ ẽ hawẽ hawaumahairatũ eã merabewakĩ ẽ duawatirumaki, hawẽ bitxi tae meshpũ tsitaushũ ẽ pekashütirumarã”, hatu waniki.

²⁶Abraãonẽ bababũ enabu inũ dasibi nawabu mã Deusũ kuxipaki datemisbuũ, nukũ txakabuwẽ taeshũ hau Deusũ nuku kupiyamashanũ hawẽ bakekiri kakape nukunaki. Matu yuinũ ñikakãwẽ. ²⁷Huĩrukũti sãbado tibitiã hanu itxamisbu anushũ Deusũ hãtxa yuishunikabũ kenenibu hatu yuimisbu inũ habuã hatu yuibiamisbũ hawa tapiãma Jerusalẽm anuabu inũ hatũ shanẽ ibubũ xinãkĩ hawa unãma Jesus hau tenãnübũ, iwanã, danãnibuki, haska hawẽ hãtxa yuishunikabũ bebũkiri yuini keska wakĩ menekinã. ²⁸Hanushũ hawawẽ taeshũ tenãtirubumabia haska watima hau tenãnübũ Romano shanẽ ibu Pilatos yunuabu ²⁹Pilatõs hawẽ soldadobu yunua haska bebũkiri hakiri kenenibu keska wakĩ cruzki mastashũ tenãbu hanushũ hawẽ yura butetã bushũ maiwanibuki. ³⁰Hakia

Jesus tenāxinabu Deusū ana hiwemakī bestēwākē ³¹ Jesus Galiléia anua kaya Jerusalém anu habe buimabu hatu uīmai shaba itxapa hawētxaīs Jesus hatuki nukukirākiranaiwē taea ma hiwea unātā habuā natiā Jesuskiri yurabu hatu yusīkubaīkanikiki.

³² Na habias kaka pepa bexīshū nū matu yuiairā, Deusū nukū shenipabu yubanirā, ³³ nuku ma ashuīmaki, nū hawē bababu anurā. Haska bebūkiri hawē xināmati wakī shanē ibuhaira bena Deusū katua tibi hau shanē ibui taenū hawenabū yunua hawē tsauti anu ainikubainibuki. Haska keskari wakī Deusū hawē bake kayabi katua huni Salmos 2 anua yui ai keska wakī yuiki: “Mī ē bakerā, natiā ē hiwea mia inākī ē mia yunuaii”, anirā, nuku ma ashuīmaki. ³⁴ Deusū ma bebūkiri yui txaniniwē taeshū hawē yura txaputimawakī ana bestēwaniki. Haska bebūkiri hawē hātxawē pewakī yuiki: “Hawa kaneama Davi ē yubani keska txanima ē matu washanaii”. ³⁵ Haska inū, Davi Salmos kene betsa anuri mā haya yuiki: “Mai anua hau hawē yura txapuyamanū mī tsuma pepa abuhairakī mī heneama ishanaii”, abiani ³⁶ txanima Deusū Davi yunua shanē ibukī hawenabu merabewakubaini atimas mawa maiwabu hawē shenipabuki nukutā hawē yura beniamā txapuni natiā mā unaiī. ³⁷ Hakia Jesus mawa Deusū bestēwātā hawē yura ana hawa txaputimawaniki— iwanā, ³⁸⁻³⁹—Enabuū, Moisés nuku keneshuniwē nukū txakabu buakī nukū xinā xarabu pewatirumaki. Hakia Jesuswē taeshū Deusū hau matū txakabu matu buashūshanū unākī ha txibākawē. Hanushū tsuabūra Jesus habū ikūwaību Deusū hatū txakabu buashūkī hatu pepawakī keyushanikiki. ⁴⁰ Haska Deusū hātxa yuishunikabū kenenibu keskai ibubis matū txakabuwē mā Deus kupimaturuki. Uīrakāwē, haska kenenibu keska wakī:

⁴¹ ‘Matunā, uīrakāwē.

Deusū atimaska betsa betsapa akubainikiri matuki txanibiaibū nīkabiakī

danaī Deuski kashei shetxakakī mā ikūwākatsi ikamaki’, atā nuku keneshunibuki— hatu watā

⁴² hanua hanu judeubu itxamisbu hiwe anushū hatu hātxa menetā Paulo inū Barnabé hatube kaībainaibū Paulō hātxa ana nīkakatsis ikī yurabū yukakī: “Huīrukūti sábadō betsatiā hanu nū itxamis anushū habiaskari nuku ana yusīshāwē”, akaibū ⁴³ hanushū judeubu itxapabu inū nawabū judeubū beya txibāmis itxapabūri Jesuskiri kakape hātxa ikūwākī Paulo inū Barnabé nīkakubainaibu txītuāma hau pepawē Deus benimawakubaīshanūbū hatu yusīnibukiaki.

⁴⁴ Hanua ana sábadō betsatiā Jesuskiri kaka pepa hātxa nīkanū ika ha mae ewapanua keyu bebiai hatiri niti ikabū habu beabū kakape nukū Shanē Ibukiri nīkaibū ⁴⁵ hanua judeu shanē ibubū haskaibu uīkatsi ikama Paulō hatu haska wai abuama haki sinatakī ha itxabu shabakabi hatu ha

akī: “Txani txakakī matu paraĩkiki”, ikaibũ ⁴⁶hanua Paulo inũ Barnabé hawa dateama dasibibũ nĩkaibũ judeu shanē ibubu haskaibu hatu kemakī:

—Deusũ kakape hawē bakekiri mā judeubu dukũ nũ matu yusĩ taewanũ Deusũ nuku yunukĩ nitxĩbiaimake nũ matu yusĩa nukũ yusĩa danākĩ hawē pepai hiweibi hiweti mā bikakatsi ikabumaki. Mā haskaya matu henebaĩ nawabu judeubuma anu nũ hatu yusĩ kaii. ⁴⁷Hamē bebũkiri nukukiri Yavé Deusũ Isaías hãtxamakĩ yuini nĩkakãwē:

‘Nawa betsa betsapa txaihaira hiweakeakeabu haskai hiwekuĩtirubu mĩ hatu yusĩkubaũshanũ mia yunukĩ ē mia bĩ keska waii, hau mĩ hãtxa shabakabi mai hirabi anushũ nĩkashanũbunã’, akaya Isaíasĩ nĩkatã nuku keneshuniki— hatu wa

⁴⁸hanushũ hatu haska wai nĩkatã judeubumã nĩkai xinã txãkai benimakĩ yuikĩ:

—Deusũ kakape pehairaki— ikaibu dasibi habu Deusũ katushũ hiwekuĩa hatu inãshanai habuã Jesus ikũwãnibukiaki. ⁴⁹Haskabiaibũ Deusũ hãtxa nukũ Shanē Ibukiri ha mai pakea anu nati ikĩ hatu yusĩkubainaibũ ⁵⁰Paulo inũ Barnabé hãtxa judeu shanē ibubũ danākĩ hau hatu nitxinũbũ, iwanã, aĩbuaibu pepa inũ huni shanē ibubu hatunabubetã txani txakakĩ hatu sinatamatã hanushũ Paulo inũ Barnabé hatũ mai pakea anua hatu putamaibũ ⁵¹hatu haska wabu Paulo inũ Barnabé hau hawa unãma habiaskasi hiwekubaĩshanũbũ hatu unãti wakĩ Antioquia anuabuki hatũ bitxi tae pekatã hatuki mai mixpu tabaini mae betsa hawē kena Icônio anu bunibukiaki. ⁵²Hakia habũ Jesus ikũwaĩbu Antioquia anuabu Deusũ Yushĩ Pepatũ hatu merabewaya benimahairakubainibukia ki.

Paulo inũ Barnabé Icônio anushũ hatu yusĩnibukiaki, na hãtxarã

14 ¹Icônio anu Paulo inũ Barnabé buxiã hanu judeubu itxamisbu anu hatube hikitã Jesus mekenã bestikiri shabakabi haska nĩkaisbuma hatu pe yusĩkĩ meshtãmaibũ judeubu itxapabu inũ judeubuma itxapabũri nĩkakĩ ikũwaĩbũ ²hanushũ ha judeu betsabũ hatũ hãtxa danākĩ nawabuki txani txakakĩ Jesus ikũwaĩbuki xinã txakakĩ hatukiri txakabu yuibaunaibũ ³hatu haska wabiabu Jesusũ kuxipayabu Paulo inũ Barnabé habube shaba itxapa hiweyushũ nukũ Shanē Ibuki txiti itã hawa dateama Jesuskiri txani txakama hawē hãtxawē hatu ashũkĩ haska Deus nuikipakiri txanikĩ hatu unãmaya, hanushũ Deusũ hatu merabewakĩ kuxipa wakĩ dami atimaska betsa betsapa hatu ashũkĩ uĩmaya ⁴Icônio anu hiweabu yurabu pashkatã hatiritũ judeubũ hãtxa nĩkakĩ Jesusũ kuxipayabu Paulo inũ Barnabé danaibũ betsabu hatiritũri habũ hatu nĩkakĩ ikũwaĩbũ ⁵hanua nawabu inũ judeubu mae shanē ibubube hatube yubakatã nuitapawakĩ itxakawakĩ mãkãwē hatu tsakanũ ikaibu ⁶hanushũ

Paulo inũ Barnabẽ banabitã pashai mae Listra inũ Derbe inũ mae betsa betsapa Licaõnia mai pakea anu bushũ ⁷harishũri Deusũ hãtxa kakape hawẽ bake Jesuskiri hatu yusĩriaibũ

Listra anushũ mākãwẽ Paulo tsakanibukiaki, na hãtxarã

⁸ha mae Listra anu huni betsa tae dabe txakabu habiaska kaĩni hawa haska nisma tsaushũ ⁹Paulõ yusĩã nĩkahairaya: “Ha hunĩ ikũwãã ã kaya watiruki”, ikĩ hawẽ xinã uĩhairatã ¹⁰Paulõ hui kuxipawẽ yuikĩ:

—Ha mĩ tae mĩ habiaska kaĩnirã, beniriwe— aka

ha huni dashka iki ixtxutã ti itã nikaunaya ¹¹yurã kaiãnẽ Paulõ haska wai uĩkĩ kẽwãĩ hatũ Licaõnia hãtxa kuxipawẽ yuinamei:

—Nai anua na yushĩ dabe hunikirã nuku anu damitã butuxinabuki. Pehairaki— iki

¹²Barnabẽ metukĩ yuikĩ:

—Harã, nukũ mekenika yushĩ Júpiterki— akĩ Paulo meturiakĩ: —Ha hatũ nuku hãtxa wairã, nukũ mekenika yushĩ Mercúrioki— akaibũ

¹³ha Júpiterbe hawenabu hãtxashunikatũ hawẽ kẽwãti hiwe mae hikiti anua ina awa bene dabe huawẽ dauwabu beshũ hawenabubetã Paulo inũ Barnabẽ ha yushĩ dabe kẽwãkĩ benimawanũ, iwanã, detetã kuakĩ hawẽ kẽwãnũ ikaibũ ¹⁴haska washunaibu uĩkĩ tapitã ha Jesusũ kuxipayã dabetã yurabu hatu kẽwãmakatsi ikama hatũ tari uxnitã yurabu naxui ikaĩ nemakĩ hui kuxipawẽ Gregõ hãtxawẽ hatu yuikĩ:

¹⁵—Hunibuũ, hawakĩ mã nuku haska wai? Nuku haska wayamakãwẽ.

Nukurã, matu keskari nũ habias huniki. Ha yushĩ dabe mã kẽwãmistũ matu hawa washütirumaki. Haskawẽ taeshũ mã kẽwãmis henetã Deus hiweatũ nai inũ, mai hirabi inũ, iãñewã dasibi inũ, hanu hiweabu dasibi damiwani matũ xinã betsa watã mã kẽwãkubaĩshanũbũ hakiri hawẽ bakekiri kakape matu yusitanũ ika nũ huxiãki. ¹⁶Û unu bari betsatiã mai hirabi anu yura betsa betsapabũ hatũ xinãñes hawara txibãkubainaibu Deusũ hatu beruwẽs uĩyukubaĩbiakĩ ¹⁷hawa matu heneama haska pepawamiswẽ shabakabi naiuria ui matu imashũkĩ mibã mã banaima matu pe benemashũkĩ mã piaibu matu yaniwamakĩ betsa betsapawẽ matu benimawakubaĩmiski. Haskawẽ taeshũ Deus hiwea besti kẽwãkubaĩkãwẽ— iwanã, ¹⁸hatu haska wabia nĩkamas ina awa bene deteshũ yushĩ dabe benimawati kuashũyupanãbũ betsa betsa wakĩ hatu beshteabũ

¹⁹ha hatu haska waibũ judeubu Antioquia anua inũ Icõnio anuabu beshũ Paulo inũ Barnabẽkiri txani txakakĩ yurabu parãkĩ hatu xinã betsa wamatã hatu itimaska wamabaũkĩ Paulo besti betxishũ mākãwẽ tsaka tsaka akabu Paulo di ikaya: “Ma mawaki”, ishũ txaka urẽmisbu anu sharabaĩ urẽtanabu dakakẽ ²⁰hanua ikũwãibu itxashũ Paulo kebaũshũ uĩaĩbũ Paulo besteĩ benitã hune ha mae anu hikia habianu ushaxini hanua bestetã Barnabẽbe mae betsa Derbe anu kashũ

²¹harishūri Deusū hātxa hawē bakekiri kakape hatu yusīa hanushū Derbe anushū hatū hātxa abukī itxapabū nīkakī ikūwaībū haria txītūkirani Listra inū, Icônio inū, Antioquia anu bekubirākī ²²mae tibi anushū hau habū hatu yusīshanūbū ikūwaību yusīkī hatu mestēwākī yuikī:

—Eskaki, nīkakāwē. Deus shanē ibuaiki nū dasishanaibu nuku itxakawakubaīshākanikiki. Habiaskaki. Habiaskabiakē hawa datei txītuāma Jesus ikūwāpakeshākāwē— akī menetā ²³hanu ikūwaību itxamisbu tibi anua mekenikabu hatu katutā hatube samakekī Deus dayuikī habū Jesus ikūwaību hau nukū Shanē Ibu Jesusū hatu merabewakubaīshanū Paulo inū Barnabē kuxipa hatu yukashūkubiranibukiaki.

**Paulo inū Barnabé mae ewapa Antioquia mai pakea
Síría anu ana txītūbiranibukiaki, na hātcharā**

²⁴Hanua bei mai pakea betsa Pisídia kapukebirani mai pakea betsa Panfília anu hikixīshū ²⁵hanushū mae betsa Perge anushū Jesuskiri kakape hatu yusītā hanua mae betsa Atália anu hikixína ²⁶hanua Antioquia anushū hau yusītanūbū Deus hatuwē nuiai anu hari hatu yunuimabu anu bukubaūkī Jesuskiri hatu yusīkubaūtani menebirani hanua niwe shashuki nanetā Antioquia anu txītūbirani ²⁷keti itā mapekexinabū hanushūri Jesus ikūwaībube itxashū bukubauni haskatāxinabu inū habu judeubumā hau habūri Jesus ikūwanūbū natiā Deusū hatu kenaya shabakabi haska hatu yusīkubaūtāxinabu dasibi hatuki txanitā ²⁸habianu hatube baxikuyuima Paulo inū Barnabé ushe itxapa ikūwaību hatu yusī hiweyuaibū

**Yusīa betsa betsapa husiaibu pewai Jerusalém anu
Jesusū kuxipayabu itxanibukiaki, na hātcharā**

15 ¹habiatīāri habū Jesus ikūwaī judeubu betsa Moisés yusīa txibākī abuhairamisbu Judéia anua Antioquia anu buxīshū Jesus ikūwaību habūri hatu yusīkī: “Judeubumā tsuabūra mā nukubetā Jesus ikūwaīburā, Moisés nuku yununi beya habū hina kubitxi biabumarā, Deusū hatu meketirumaki”, iki hatukiri hātchaiū ²hanushū Paulo inū Barnabē haska hatu yusīaību danaī hatube yuinamei ha itxakayamai itimaskaibū haska abuama atimas ikūwaību itxatā Paulo inū Barnabé inū ikūwaī betsabu katushū hau haska yusīa husiaibu pewakī Jesusū kuxipaya betsabu inū mekenikabu Jerusalém anuabubetā pewai hau hatube hāttxatanūbū hatu yunukī ³nitxiābu bui Fenícia mai pakea inū Samaria mai pakeakiri bukī judeubumā haska hatū xinā txakabu henetā Jesus txibāxinabukiri hatuki txanikubainaibū mae tibi anushū ikūwaībū haska waxinabukiri habū kaka nīkai benimatxakayamakubainaibū

⁴hanua Paulo inũ Barnabé inũ hatube buaibu Jerusalém anu hikiabu Jesusũ kuxipayabu inũ, mekenikabu inũ, dasibi Jesus ikũwaĩbu betsabũ hatu i pewatã hatube itxabu Deusũ hatu merabewaya judeubuma Jesuskiri hatu yusiayã habũri ikũwãkubaĩxinabukiri Paulo inũ Barnabébe hatuki txaniaibũ ⁵hatu haska yuiaibũ judeu shuku betsa fariseubũ Moisés hãtxa txibãhairabiamisbũ ma hatiribũ Jesus ikũwãkĩ txibaĩbu betsa benikawã hatu yuikĩ:

—Mã haskakiri hatu yuairã, nawabu Jesus mã hatu ikũwãmaiburã, haska Deusũ Abraão yununi keska hau hatũ hina kubitxi binũbũ hatu yunukãwẽ. Ha inũ, Moisés nukũ shenipabu yununi beya hau txibãrianũbũ hatu yunuriakubaĩkãwẽ— hatu wa

⁶haskai nĩkatã ha beyakiri hatu husimapaiabu ha unãnepabu Jesusũ kuxipayabu inũ mekenikabu besti pewanũ ika ana itxatã ⁷haikaimas xinã betsa betsapaibu Simão Pedrõ hatu nĩka keyutã atimas hari benitã hatu yuikĩ:

—Ë betsabu inũ ã puibuũ, Deusũ kakape hawẽ bake Jesuskiri judeubumãri hau ikũwanũbũ matu anua Deusũ ea katushũ ea yunushũ ea hatu yusĩmayama mã unaiĩ. ⁸Ha Romano shanẽ ibu Cornéliõ hiwe anushũ ã hatu yusiayã habũ Jesus ikũwaĩbu Deusũ dasibi nukũ xinã unãmistũ ha judeubumari hawenabu wakĩ ikũwãmakĩ nuku keskari wakĩ kuxipa wakĩ hawẽ Yushĩ Pepa hatu inãkĩ hatu atximayamakĩ. ⁹Nukunã, nũ Jesus ikũwaĩbu Deusũ nukũ huĩti pepawamis keska wakĩ habũri Jesus ikũwaĩbu Deusũ hawa hatu danãma hawa nuku pashkakĩ betsa wama habiaskas xinã hatube nuku waikiki. ¹⁰Haskawẽ taeshũ ha Moisés nukũ shenipabu yusĩni beya habũ txibãtiruma ipaunibuki. Habiaskari nũ Israelbũ nũ txibãtirubumariki. Haskakĩ Deusũ hatu haska wamabiakẽ matu Deus keskakĩ judeubumã Jesus ikũwaĩbu mã hatu yunuai? Hatu haska wayamakãwẽ. ¹¹Natiã nuku inũ habukiri xinãnanãkãwẽ. Nukubũ nũ ikũwaĩ mekea hayarã, hawama hamẽhaira nũ ikanaii. Haska keskari wakĩ habu judeubumari habias nũ ikai keskari wakĩ nukũ Shanẽ Ibu Jesusũ habu duawaikiki, hawẽ pepawenã— hatu wa

¹²hanua dasibibũ haska nĩkai pes nesei keyutã ana hawa yui hãtxabumakẽ hanushũ Barnabé inũ Paulo Deusũ hatu merabewaya judeubuma anushũ dami atimaska betsa betsapa hatu uĩmakubainimakiri hatu yuikĩ ¹³meneaya Jesusũ betsa Tiagõ itxabu hãtsiri hatu yuikĩ:

—Ë betsabu inũ ã puibuũ, eãri matu yuinũ nĩkakãwẽ. ¹⁴Jesus ikũwaĩbu Deusũ hawenabu hatu wariakĩ merabewani hau nukube ikubaĩshanũbũ haska bebũkiri tatesmakĩ Deusũ judeubumari katuyama Simãonẽ ma nuku yuishuki. ¹⁵Eãnã, habiaskari bebũkiri Deusũ hãtxa yuishunikabũ kenenibu ã haska xinaiĩ, Deusũ hãtxa haska yuairã:

¹⁶‘Israelbu kupitã ana hushũ

Davi shanẽ ibu ini keska wakĩ

hawē baba betsa merabewakī kuxipa wakī
ha hiwe di ini keskabu ē ana hatu benishanaii.

¹⁷ Ē hatu haska waya nawa shukuabu tibibu inū
tsuabūra ē Yavé Deusū kenayabū ea yukai habū ea benatirubuki.

¹⁸ Haska bebūkirihaira ē Yavé Deus hātxakī hatu yubairā,
txanima ē hatu ashunūbariaii’,

ikai nīkatā nuku keneshuniki— iwanā

¹⁹—Haskawē taeshū nū xinānūbū matu yuinū nīkakāwē. Judeubumā
hatū xinā txakabu henetā Jesus ikūwākī Deus txibaību haska nū
judeubu nukū beya txibaī nū hiwemis yunukī hatu bikawayamanākāwē.

²⁰⁻²¹ Hakia bari itxapa ma hari judeubu judeubumā mae tibi anushū
huīrukūti tibitiā haska Moisés hatu keneshuni hatu yusī hatube
beyamisbuwē taeshū hau judeubumā judeubu hawaira hau berabī
dabeyamanūbū na besti nemakī hatu keneshunākāwē, eska besti hatu
beshtekinā. Yushī dami betsa kēwākī nami ināmisbu hau piyamanūbū
inū, habu aīyākinā, haska Moisés hatu nemani hau txibanūbū inū,
yuinaka teneshabu mawa hau piyamanū inū, yuinaka himi hau
ayamanūbū haska besti hatu nemakī keneshū judeubuma dasibi anu
bumanākāwē— hatu wa

**Judeubuma yusīkī hatu bikawaibukiri hatu
kene bumanibukiaki, na hātxarā**

²² hanushū Jesusū kuxipayabu inū mekenikabu inū ikūwaī dasibibū
Tiagō hātxa nīkakī abutā Antioquia anu Paulo inū Barnabébe hau
butanūbū habubetā ikūwaību anua huni dabe unānepa Judas hawē kena
betsa Barsabás inū Silas katutā

²³ hatu bumakatsi hatu keneshūkī:

“Nū Jesusū kuxipayabu inū mekenikabu nū matubetā ikūwaībunā, nū
matu kene bumai uīkī nīkashākāwē. Judeubuma mā Antioquia mae
ewapanu hiweabu inū, Síria inū, Cilícia mai pakea anu hiweabū
nukubetā Jesus mā ikūwaību nū matu xinaī. ²⁴Haskakē nenuari
nukunabu nū hatu yunuamabia buimashū hatū beyakiri matu
yusīkī matu itimaska waibu nū nīkaxinaki. ²⁵Haskawē taeshū
nukū nū matu merabewanū ishū habias xinā itxawatā nukubū
nū xinā pekē hau habūri haskakiri matu merabewashanūbū ishū
nuku anuari huni dabe katutā nukū haibu Barnabé inū Paulobe
nū habube nitxiaī. ²⁶Nukū haibu Barnabé inū Paulō hatū hiwea
yauxiama bikahaira mesebiakē nukū Shanē Ibu Jesus Cristo
dayashūkī yusīkubaīmis mā unaiī. ²⁷Habu nū matu anu yunuai
haska nū matukiri xinaī Judas inū Silas hikitā matu shabakabi yusī
pewashākanikiki. ²⁸Hakia haska mā judeubumāri Jesus ikūwaī
unānuma mā hiwenūbū Deusū Yushī Papatū nuku xināmaya ana

nukū beyakiri hawa betsa matu yunuama na besti nū matu nemai nīkakāwē, mā judeubube berabinārabeyamanūbunā. ²⁹Yushī dami betsa kēwākī nami ināmisbu ana piyamakubaishākāwē. Ha inū, yuinaka teneshabu piyamariashākāwē. Ha inū, yuinaka himi ayamariashākāwē. Ha inū, aiyākinā, haska Moisés nuku nemani ha txibāriakubaishākāwē. Haska besti mā mekearā, hawa txakabuma mā pe besti hiweshākanaii. Hau Deusū matu pe mekekubainūwē”, hatu washūtā

³⁰habu butanūbū keneya hatu nitxīkī yunu pewabu Antioquia anu hikixīshū ikūwaību itxawashū kene hatu inābu

³¹hanushū ikūwaībū ha kene bitā yui hatuwē nuikī hatu daewaibu nīkai benimaibū

³²Jesusū kuxipayakī Judas inū Silasī Deusū hātxa pe hatu meshtamamīswē taeshū ikūwaību hatu merabewakī hatu benimawaya ikūwaībū habū hātxa abuhairāibū ³³hanushū hau hatu yusīyunūbū ushe itxapama baximashū ma buaibū ha habū hatu yunuimabu anu habu hiwei peabu hau hatu yuitanūbū, iwanā, unānuma hau butanūbū hatu nitxiā buaibū

³⁴⁻³⁵hanua Paulo inū Barnabé Antioquia anua ana kama niti iki baxikuyuimashū ikūwaību betsabubetā kakape Jesuskiri yurā kaiā hatu yusīpakekubainibukiaki.

Paulo Barnabébe kūyā irabetā pashkabainibukiaki, na hātcharā

³⁶Hanua Antioquia anu usha itxapa Paulo hiweyukī Barnabéki txanikī: —Hanu Jesuskiri nū yusīkubaūtānima anu ikūwaību haskaramēkaī ana hatu uīkubaināwē— aka

³⁷Barnabē kemakī:

—Kakinā, João Marcos nū ana iyutirumē?— aka

³⁸bebūkiri hatubetā yusī ka Panfília anushū hatu shunūbirākī henebiranimawē taeshū Paulō ana iyukatsi ikamakē

³⁹hanua hawē taea iyunū ika habe kūyā irabetā pashkai henenamerabetā Barnabē Marcos iyui Chipre anu niwe shashuwē inatā kaya

⁴⁰haska wabainaya Paulō hawena meribis xinātā Silas iyukatsis ikī katutā ikūwaībuki txaniaya habū yuikī:

—Mā haska kainairā, peki. Mā hatu yusī kaya nukū Shanē Ibu matuwē nuikī hau matu merabewakubainūwē— akī hatu nitxīkī yunuabu hanua kaībaini mā bui ⁴¹Síria inū Cilícia mai pakea kapukekubaikī Jesus ikūwaību itxati hiwe tibi anushū hatu yusīkī hatu benimawakubauni kai

Paulo inū Silas buaibube Timóteo hatube kanikiaki, na hātcharā

16 ¹hanua Paulo inū Silas kakūkaikī Derbe inū Listra ha mae dabe anu yusī Listra anua Jesus ikūwaī betsa hawē kena Timóteoki

nukunibukiaki. Hawē ewa judeu aībū Jesus ikūwāyā hawē epa Gregonawā Jesus ikūwāmakē ²hanua ikūwaību Lистра inū Icônio anushū Timóteo Jesus ikūwaī pe hiwekūkaīmiskiri txaniaibū ³Paulō nīkatā hau ea merabewai ebe kanū, ishū hawē epa judeumabiakē hawē ewa judeuwē taeshū hau judeubū Timóteo danāyamashanūbū hawē berabītirubukē hatū beya txbāki hawē hina kubitxi Paulō hatu meshtemanikiaki. ⁴Hanua bukubaīki judeubu inū judeubumā Jesus ikūwaību mae tibi anua hau hatū beyakiri yusī bikanameyamakubainūbū Jesusū kuxipayabu inū mekenikabu Jerusalém anushū hatu nemakī keneshunimabu hatu yusī txanikubainaibū ⁵hanua ikūwaībū haska nīkatā hatū xinā pewakī mestēwākubainaibū yura betsabūri Jesus ikūwaī shaba tibi ana itxapabu hatuki dasikubainaibū

**Paulo usha namaya Macedônia anu hau kanū
huni betsā kenanikiaki, na hātẓarā**

⁶mai pakea betsā Ásia anu Paulo inū, Silas inū, Timóteo Jesuskiri hatu yusī hari bunū ikaibū Deusū Yushī Papatū hatu nemaya mai pakea dabe Frígia inū Galácia anuabu hatu yusī kapukebauni ⁷mai pakea betsā Mísia kemai Bitínia mai pakea betsā anu hikinū ishū xināyā Jesusū Yushinī hatu ana nemakē ⁸hanua Mísia kapukei bai txai tanabaini mae betsā iānēwā kesha anu bei butubirani Trôade anu hikiabū ⁹habianuri ē Lucas ē hatuki nukukē mexu merā Paulo usha namaya huni betsā Macedônia anua damia nishū Paulo yuikī: “Macedônia anuri hushū nuku merabewayuwe”, ikai ¹⁰nīkatā bestēshū ha namapā uīshu nuku yuiaya Macedônia anushū Jesuskiri kakape nū hatu yusī kanū Deusū nuku yunuai unātā nukū mabu pewaxītā

Filipos mae anushū Paulo inū Silasī hatu yusīnibukiaki, na hātẓarā

¹¹hanua Trôade anua penaya niwe shashu ibu peiwē pakatā nanekaini natukā hawē kena Samotrácia anu kayābis kai pukei hanu keti itā hanu ushaxini ana bestēkaini mexukiri habias shashuwēri pukei mai pakea betsā Macedônia anu mae betsā Neápolis anu hiki keti itā ¹²hanua mananā mapekekaini Romano mae ewapa mae tibi binua txaima Filipos anu nū hikixina hawa wariama hanu usha eskarabestā ¹³hanu judeubu itxamisbu hiwe hayamakē sábadu huīrukūtitiā mae anua kaīkaini hene keshashū Deus kēwākī hanushū Deus kuxipa yukamisbu anu kai aībus itxamisbuki nukutuxitā hatube tsaushū Deusū Katua Jesus mekenākiri nū hatu yusīkī taewaibū ¹⁴ha aībuaibu itxa betsā Deus kēwāmis hawē kena Lídía mae betsā Tiatira anua hunishū tari pepa bishū pukukī nanke mexupa duakabi washū hatu ināmis nukū Shanē Ibū merabewakī nīka pewamakī hawē xinā betsā wamaya Paulō hātẓawē Jesus Lídíā ikūwāyā ¹⁵hanushū habubetā hawē hiwetāshū ikūwaībuwē taeshū unātā nū hatu naximakī keyua Lídíā nuku yuikī:

—Txanima nukū Shanē Ibu Jesus ē ikūwaĩ mā ea xinaĩnā, ē hiwe anu iyui bekāwē— akī nuku ea akī ana nuku ena wanū ikaya

—Peki— itā hari ka nū habe hiweyuniki.

¹⁶Hanua shaba betsatiā hanu Deusbe hātxamisbu anu ana Deusbe hātxanū ika nū kaya txipax yushinī bebūkiri unāmamiskē ha txipax huni betsabū tsumapā hatu unāshūkī hawē tsumabu pei mirima hatu bishūmiskē txaima haki nukutā nū daĩbainaya ¹⁷nuku txibābaĩkī metubaĩkī mapuabu dasibi unāshubima hui kuxipawē hatu yuikī:

—Ha huniburā, Deus kuxipa dasibi binua hawē tsumabū ha dayashūkanikiki. Hanu kupiaitiā tsuāra matu nemashūtiru hawē txanima pashati bai matu unāmakanikiki— akī ¹⁸shaba tibi hawētxais bestikima nukukiri yui hātxakūkainaya Paulō haska nīkai ma bika teneshū dabeketā ha txipaxki yushī hikini yuikī:

—Jesus Cristō kuxipawē ē mia yunuai ha txipax anua kaĩriwe— aka haska was ha yushinī hawaira henebainaya

¹⁹ana ha txipax yushiyāki pei ana hatu bishūtiruma hawē tsumabū ana hawawē haskatima unātā Paulo inū Silaski sinatakī atxibaĩkī hatū mae namakis hemaĩtī anu hatū shanē ibubu bebū iyukī sharabaĩ ²⁰hanushū shanē ibu pewanikabū besuuri hatu nitxītā yuikī:

—Na judeubunā, nukū mae anushū yusīkī harakiri xinātimawakī dasibibu nuku itimaska wakanikiki. ²¹Hatū beya haska hiwemisbu nuku yusiaĩbu nū Romanobū nū txibābaĩtirubumaki, haska nuku yusinū ika ikaiburā— hatu waya

²²hanushū yurā kaiā mapubaunabūri haska nīkai sinatai habūri hatu txiteaibū hatukiri haskaibuwē taeshū hatū shanē ibu pewanikabū hau hatū tari pekatā hi siriwē hau hatu kuxa kuxa anūbū hatu yunuabu ²³habū hatu kuxa kuxa atxakayamatā bitxiti hiwe anu hatu bitximatā mekenikatū uĩ pewakī hau mekehairanū yunubiranabu ²⁴nīkatā ana dītu uke merāhaira Paulo inū Silas mistushū hau haska pashayamanūbū hi shui dabeyawē hatū tae bitaush arabetā mekekē

²⁵ha haska wabu habias mexu yamenapū Deus dayuikī Paulo inū Silasī hawē kēwāti Deuskiri nawaibū ha habu dukū hatu bitximabū hatu nīkaibū ²⁶haskabiama e iskaū hawaira patxa sakui mixki bitxiti hiwe wanibu takash takash akaya ha haska waya beputi tibi hamebi bepēmanai keyuaya huni tibi mane dispiwē meneshekeabu hamebi txurekei niri iki keyuaya ²⁷hanua mekenika bestēkawā beputi tibi ma bepēmana uītā xinaĩ: “E hee! Mī haskati kemaĩ. Dasibi ma kaĩbaini pashabubī! Iubusbī ē mawai!” itā hawē nupe txaipa sitā ibubis tenukuyupanā ²⁸hawaira Paulō hui kuxipawē yuikī:

—Mimebi ibubis txakabuyamawe. Nuku dasibi nū hani kamaki— ikaya

²⁹hanushū hawē tsumabu bī yukatā Paulo inū Silaski datei saki saki iki kuxikaĩ kēwai hatu namā dāti itā ³⁰hanushū kaĩmatā hatu yukakī:

—Shanē ibubuū, hanu kupiaitiā ē Deus daewakatsis ikaii. Haskapa, hau ea mekeshanunā?— hatu wa

³¹hanushū habū kemakī:

—Shanē Ibu Jesus ikūwāwē. Mia inū mī hiwe anu mibe hiweabubētās mā haska waya Deusū matu mekekubaīshanikiki, kupiamarā— hatu waya

³²hawaira bitxiti hiwe mekenika inū dasibi habe hiweabu nukū Shanē Ibu mekenākiri hatu yusiāi ³³nīkatā mexubiakē hatu kuxaxinabu su ika hene habaibu hawaira ūpashwē hatu txukatā hanushū habe hiweabubētās Jesus mekenā ikūwākāshuwē taeshū Paulo inū Silasī hatu naximabu ³⁴hanua habe hiweabubētā Deus ikūwābaini benimahairabaikī hatū hiwe anu hatu iyushū hatu pimaxinaibū

³⁵hanua penaya shanē ibu pewanikabū hatū tsumabu hatu hātxa bumakī yuikī:

—Ha huni dabe atxiabu mā hatu bitxixinaburā, ana hatu hawa wama hau kaīnūbū yuitākāwē— akabu bushū bitxiti hiwe mekenika yuiabu ³⁶hanushū Paulo yuikī:

—Ē matu hawa wama kaīmanū shanē ibubū ea yunukāshukiaki. Haskakē unānuma burikāwē— hatu waya

³⁷hakia Paulo kaītā shanē ibū tsumabu yuikī:

—Nuku dabe Romano documento nū hayabiakē txanima nuku hawa yuka pewama e iskaū huni dasibibū berubi nuku kuxa kuxa matu amatā nuku bitxixinabuki. Ikis natiāri hunerī nuku kaīmakatsis ikanimēkaī? Haskamaki, hau habū ibubis nuku kaīmai benūbū hatu yuitākāwē— hatu wa

³⁸hanua hatū tsumabu bushū haska Paulō hatu yuia nīkabaī hatū shanē ibubu yuiabu nīkatā:

—Romano documentoyabu daka— iki datei ³⁹haska hatukiri nīkabirani beshū daewakī hawē bitxiti hiwe anua kaīmatā nitxīkī Paulo inū Silas yuikī:

—Matu haska wakī nū kanexinaki. Nukū txakabu xināma unānuma burikāwē, nukū mae henebainirā— hatu wa ⁴⁰bitxiti hiwe anua tashnibaini bui Līdiā hiwetā hikia bayukī hanushū ikūwaibu hatu xinā txākāwātā Paulo inū Silas buaibū Timóteo hatube kaya hakia ea Lucas habianu ē baxikuyuniki.

**Paulo inū Silas Tessalōnica anushū hatu yusiāyā
hanua itimaskanibukiaki, na hātcharā**

17 ¹Filipos anua Timóteo iyui Paulo inū Silas txipekebaini bui mae Anfīpolis anu ushaxini ana bui mae Apolōnia anu ana ushariakaini hanua bui mae betsa Tessalōnica anu hikixina hanu judeubu itxamisbu hiwe hayawē taea ²Paulo ma haskamis beyawē taea hanu

sábadotiã semana dabe inũ besti Paulo judeubube itxashũ Messias kiri Deusũ hãtxa yuishunikabũ kenenibu betsa betsapa yuiaibube hatube yuinamekĩ:

³—Deusunã, hawẽ Messiasrã, hau mawayushanũ yununiki. Mawatã ana bestẽshanikiki, akĩ hakiri keneniburã— akĩ Paulõ hatu yusĩ pewatã ana hatu yuikĩ:

—Ha Jesuskiri matu yui ã txanikũkainairã, Deusũ Katua Messias Cristoki— hatu wa

⁴hanushũ judeubu hatiritũ inũ Gregonawabũ Deus kẽwãmisbu itxapabu inũ aĩbuaibu pepa hakiri pe xinãmisbu mirimabũri Jesus ikũwãkĩ Paulo inũ Silaski dasiaibũ ⁵hakia judeu shanẽ ibu betsabu habũ ikũwãkatsi ikama Paulo inũ Silasĩ hatu binuaiwẽ taeshũ hatuki sinatakĩ huni txakabu txikixbu hatu itxawatã hatu pei inãtã yura dasibibubetã hau hatu itimaska wabaĩ Paulo inũ Silas atxishũ mae shanẽ ibubu hau inãnũbũ hatu yunuabu haskai berukubaĩkĩ hatu mesewakĩ datebaĩkĩ dasibi itimaskakaĩ Jasomẽ hiwe anu ha hunibũ Paulo inũ Silas benakeakebaini ha hiwe anu hikitã ⁶hatu betxiana Jasom inũ ikũwaĩ betsabu besti atxibaĩ mae shanẽ ibubu anu sharabaĩkĩ hatu iyushũ hãtxa kuxipawẽ ha akĩ txitekĩ:

Ha huni Paulo inũ Silasinã, Romano mai hirabi anu buaketãkĩ hatũ yusiawẽ hatu itimaska wakubaũkĩ nenuri bexishũ habiaskari wai ⁷Jasomẽ hiwe anu hatu ixinakiaki. Habũ nukunabu yusĩkĩ Jesus hatũ shanẽ ibu benakiri yusĩkĩ nukũ shanẽ ibu Romano Césarn nemati hãtxa danãti wakĩ binumakanikiki. Txakabuhairaki— hatu wakĩ ⁸yurã kaiã inũ mae shanẽ ibubu haska hatu yuiaibu nĩkatã hamẽmẽs daketapakĩ Jesus ikũwaibuki hatu sinatahairamaibũ ⁹nĩkatã hau hune kaĩbaĩyamashanũbũ hawẽ yubakati pei itxapa Jasom inũ ikũwaibũ betsabuna biãyushũ txipu ana hatu nĩkakatsi hatu hawa wama heneyuabu

Beréia anushũ Paulo inũ Silasĩ hatu yusiãĩ nĩkanibukiaki, na hãtxarã

¹⁰haskaibũ hawaira mexu merã hau hunebaĩtanũbũ ikũwaibũ Paulo inũ Silas inũ Timóteo mae betsa Beréia anu hau pashanũbũ hatu nitxiãbu bui Beréia anu hikixina hanua hanu judeu itxamisbu hiwe anu hikitã ¹¹Deusũ Messias Jesus mekenãkiri hatu yusiabu Tessalõnica anua judeubu keskama Beréia anu judeubu pepabũ nĩkakatsis ikĩ: “Paulõ hãtxa txanimẽkaĩ? Txanimamẽkaĩ?” ikĩ Deusũ hãtxa kenenibu anua shaba betsa tukama tibi itxashũ tapĩkatsis ikĩ abukĩ uĩkubainaibũ ¹²haska wakĩ judeu itxapabu inũ Gregonawabu hunibu inũ aĩbuaibu pepabu hatukiri pe xinãmisbũri habũ Jesus ikũwaibũ ¹³hatu haska wamaya Beréia anushũ Deusũ Messias kakapekiri Paulõ hatu yusiãĩ judeubu Tessalõnica anubũ nĩkakĩ unãtã hawairabirani beshũ Paulokiri txani txakabaũkĩ Beréia anu hiweabu hatu xinã betsa wamakĩ yurabu hatu itimaska

wai berukubaunaibū ¹⁴haska nīkatā ikūwaibū merabewakī hawaira hau Paulo pashanū iānēwā kesha anu iyuaibū hokia hatu anu Silas inū Timóteo baxikuaibū ¹⁵hanua ikūwaĩ betsaburi Paulobe niwe shashuwē bui mae ewapa betsa Atenas anu txaihaira iyushū nitxītanabu Paulō hatu yuikī:

—Silas inū Timóteo hau hawairabirā hau eki nukuri benūbū ea hatu yuishūtākāwē— hatu wa txītūbainaibū

Atenas mae ewapa anushū Paulō hatu yusīnikiaki, na hātẓarā

¹⁶hanua Paulo Atenas anushū Silas inū Timóteo manakī ha mae ewapanu dami yushī wanibu itxapa kēwāmisbu uīkubauni hatuwē nui bika tenehairai ¹⁷haskawē taea judeubu inū Gregonawa bestibu habū Deus kēwāmisbu hatū itxati hiwe anua shaba tibi hikītā Deusū Messias Jesuskiri hatube yuinamei hātẓakūkaini inū mae hemaīti ewapa anushūri dasibi maniaibu habiaskasri Jesuskiri hatu yui hatube hātẓanameriakūkainaya ¹⁸hanua huni betsa unānepabu epicurebū yuikī: “Tsuawē nuiama hawara mī abuai besti aki pe hiwekūkaītiki”, ikī xināmisbu inū huni betsa unānepaburi estóicobū yuikī: “Hawawē benimama, hawē yurawē nuiama pe hiwekūkaītiki”, ikī xināmisbu Paulobe yuinamei kemaneriaibū habu betsa txitekī yuikī:

—Na txikix hātẓāwainā, harakiri hātẓai ikimēkaī?— ikaya betsa yuikī:

—Paulonā, eska yui ikikiaki. Deusū Messias Jesuskiri inū yurabu dasibi mawa ana bestēshanaibukiri txanirā— ikaya haskakenā:

—Mekenika yushī betsa betsapa nū hawa unāriabumakiri hawē nuku benimawanū ika ikiraka?— ikaibū

¹⁹haska wabaikī Mati Areópago anu hana unānepabu itxamisbu anu Paulo iyushū yukakī:

—Nū tapīnū ha yusīa bena mī bexianā, nuku unāmariwe. ²⁰Haskakiri txanikī mī nuku bepushuma kayairā, nū tapīkatsis ikai nuku yuiiriwe, haskara kayakiri yuia mī yui ikimēkainā?

²¹Haska habu yuka ikirā, Atenas anu hiweabu inū nawa betsa hana hatube hiweyuabu tsuāra yusīa bena beabu yuiaibu nīkakatsis imisbukē

²²yusīnā unānepabu itxashū kebaunabu namakis Paulo benia nishū hatu yuikī:

—Atenas anua hunibuū, txanima hātẓa matu yuinū nīkakāwē. Yushī betsa betsapaki mesekī mā kēwākubaīmis ē matu uīaiī. ²³Hanushū mā yushī dami betsa betsapa tibi duawakī kēwāmis anu ha txi tapu fogāo betsakia uībaūkī betsa hawē kene nea: “Yushī tsuā ha unāmaki”, ika netāni ē uīxinaki. Haska hawē kene unāriamabia mā kēwāmisrā, hawē kenarā, Yavé Deuski. Haskakiri matuki txanitanū ika ē huxiāki. Ea nīkakāwē.

²⁴Yavé Deusunã, mai hirabi inũ dasibi nũ hanu hiweabu Deusũ damiwanirã, dasibi hawenaski. Ha nai anua inũ mai anua dasibi mekei shanẽ ibuaya hunibũ haska wakĩ duawanũ, iwanã, hatũ xinãnẽ templo hawẽ kẽwãti hiwe washunabu anu besti hiweamakiaki. ²⁵Ha inũ, dasibibu Deusũ nuku hiwemashũ huĩsinamamis inũ hamapai tibi nuku inãkĩ merabewakubaĩmiswẽ taeshũ hawara yurabũ Deus ashũtirubumahirakiaki.

²⁶Xinãkãwẽ, eskakirã. Na mai hirabi anu nũ hanu hiwebaũshanũbũ Deusũ huni bestitxai dukũ Adão dami watã hawẽ taeshũ dasibi nawa betsa betsapa pawanikiaki. Na nenu mai anu hatiãra inũ hanira nũ hiweshanũbũ ma hanu tibi nuku mae pewashuni anu nũ ikabuki, na habia mae anu nũ hiweaburã, ²⁷⁻²⁸Deus benai yurabũ haki nukutiruburã. Txanima Deus nuku tibi anu benãtamabiakẽ Deuskiri tapĩnũ ika hawa txai kama nũ hanubi haki nukutirubuki. Matunabu unãnepa miyui hawẽrua unaĩbũ yuikĩ: “Nukurã, nũ deusũ bakebuki”, anikiaki. Txanima haska yuini keska nũ habia Deusunabuki. Haskawẽ taea Deuswẽ nũ hiweabu inũ nũ hawẽ hamapaiyaibu inũ nũ hayabuki. ²⁹Nũ haskai Deusunabukĩ nũ haska xinãtirubumabiakẽ hunibũ xinã txakakĩ Deus haska keska dabanẽ hatũ xinãwẽ habũ deus wakĩ ouro inũ prata inũ mixki dami wamisbuki. ³⁰Õ unu bari betsatiã yura betsa betsapabũ hawa unãbumakẽ Deusũ hatu beruwẽs uiyukubainiki. Hafia natiã ana haska wama mai hirabi anu hiwebaunabũ hau hatũ xinã betsa watã hakiri hau xinãnũbũ Deusũ hatu yunuikiki. ³¹Huni betsa katushũ yurabu anu yununi mawa bestẽwãkĩ yurabu dasibi hawẽ kuxipa hatu uĩmaniki. Haskawẽ taeshũ ha shaba ma Deusũ katuni anu ha huni katuniwẽ taeshũ yura dasibi mai hirabi anu hiwebaunabu hatu unãti wakeakekĩ keyutã Deusũ hawa kaneama hatu kupishanikiki— hatu wa

³²mawa ana bestẽtirubukiri nĩkatã betsabũ kashe waibũ hanushũ betsabũ kashe wama yuikĩ:

—Nũ ma haska nĩkashuki. Betsatiã nũ ana mia nĩkatiruki— akaibũ

³³hanushũ Paulõ hatu henebaini kaya ³⁴hanua yura eskarabesbũ txibãbaini haki dasishũ ana nĩka pewatã Jesus ikũwãnibukiaki, Areópago anua unãnepa yununika betsa hawẽ kena Dionísio inũ, aĩbu betsa hawẽ kena Dãmarisrã, ha inũ, ana hatirabunã.

Corinto mae ewapanushũ Paulõ hatu yusĩnikiaki, na hãtxarã

18 ¹Hanua txipu Paulo Atenas anua kaĩkaĩni kai mae ewapa betsa Corinto anu hikitã ²judeu betsa Ponto anua kaĩni hawẽ kena Áquila inũ hawẽ aĩ Priscila dama duakabi Itália mae ewapa Roma anua hau judeubu kaĩbainũbũ Romano shanẽ ibuhaira Clãudiõ hatu kaĩma beimabu hanu Paulo hatuki bai ka hari ka hatuki nukunikiaki. ³Ha Áquila hawẽ aĩbetanã, habias daya Paulõ amisri akĩ tari hiwe

wamisbukē haskawē taea hatube dayanū ika hatu anu baxikuima Paulo hiwea ⁴hanua sábadō huñrukūti tibitiã hanu judeu itxamisbu hiwe anushū Jesuskiri hatu yusīkī hatu tapīmakī ikūwāmai judeubu inū Gregonawabube Paulo hāttxanamekūkainaya ⁵hanua mai pakea betsa Macedônia anua Silas inū Timóteo haki nukui ma bexiábū hanushū hawē daya henei datā Paulō Jesuskiri besti judeubu hatu yusīhaira bestiyunū ishū ana daya kayabi akama hatu yuikī:

—Ikūki. Deusū Messias nukū Shanē Ibu nū manakubañmisburã, Jesuksi— akī hatu unāmai ⁶nīkatã judeu itxapabū ikūwākatsi ikama danaī habi aki haki shetxakai ha ibaunaibū Paulō hatu henebañkatsis ikī Deusū hāttxa danaī hau habiaskasi hiwenūbū habu unāti wakī hawē tari anua mai kuru datakakī hatu yuikī:

—Deusū Messiasikiri ē matu yusīa nīkama matūmebi ibubis matū txakabuwē mā benu kayabiai. Haskawē taeshū ea akama matu besti Deusū kupishanikiki. Haskakē judeubu ana yusīama natiã unuri judeubuma besti ē yusīkubainai— hatu watã

⁷hanua judeubū itxati hiwe anua kaīkaini hanu judeu itxamisbu hiwe dapi huni betsã Deus kēwāmis hawē kena Tito Justō hiwe anu hikixīshū Paulō hatu yusīkubainaya ⁸hanu judeu itxamisbu hiwe hatū mekea shanē ibu hawē kena Crispō habube hiweabubētās nukū Shanē Ibu ikūwanibuki. Ha dikabi Corinto anushū itxapabūri Paulō hāttxa kakape yuiiai nīkatã Jesus ikūwāriaibū hau hatu naximanūbū ikūwaī betsabu Paulō yunua hatu naximanibuki. ⁹Hanua mexu betsatiã Paulo usha namaya Jesusū yuikī:

—Datei hāttxa neseama ekiri ē kakape yusīkī heneyamawe. ¹⁰Na habia mae anushū yura itxapabu ē katuaiwē taeshū hawa miki sinatakī tsuã mia txakabu watirumaki, ē mia putamakirã— akima ¹¹hanu Corinto anu niti ikimashū hanushū ano bestitxai ana betsa namakis nitxī Paulō Deusū Messias Jesuskiri hatu yusīkubainaya

¹²hanua ha mai pakea Acaia anu hatū Romano shanē ibu Gáliō hatu shanē ibushunaya judeu shanē ibubū Paulo ha akī txitenū ishū atxishū hanushū Gáliō tsaushū hatu unāti wamis anu Paulo iyushū ¹³judeubū itxati hiwe mekenika shanē ibu Sóstenesī txitekī Romano shanē ibu yuikī:

—Na huninã, Moisés hāttxa nukū shenipabu yusīni ana hatu txibāmama haska wakī hau Deus kēwānūbū yusīa benawē na huni kakūkaūkī nukunabu yusī txakaikiki— akaya

¹⁴judeu shanē ibubu nemanū ika Paulo hāttxayupanã shanē ibu Gálionē hatu kemakī:

—Judeubuū, na haska mā ea hakiri yuiairã, na hunī hawara txakabu waxina kasmāi huni detexīkē ē matu nīkakeanai. ¹⁵Hakia kena betsa betsapa inū, matū shenipabū yusīni hāttxa inū, hāttxa bena matu yusīaīwē nuikī ē pewakatsi ikamaki. Matūmebi mā haska akatsis ikai pewarikāwē— hatu watã

¹⁶hawē soldadobu hatu nitxīmaya ¹⁷hanua yurabu itxashū judeubū itxati hiwe mekenika shanē ibu Sóstenes atxishū Romano shanē ibū berubi mekenē deteaibū Gálionē uíbiakī hau xināshū anūbū hatu hawa nemamakē

**Antioquia anu txitūkiranima ana hatu yusī
Paulo kakūkainikiaki, na hātcharā**

¹⁸hanua ana usha itxapa hatu yusī baxikuima Corinto anua Paulo kakatsi Deusū hau hatu mekekubaīshanū ikūwaību Deus kuxipa hatu yukashūtā Priscila inū Áqüilabe maī kai mae betsa Cencreía iānēwā kesha anu hikitā Corinto anua kai Paulō Deusū hau ea mekekubainū, iwanā, haska habe yubakaima ma menexina Paulō Deus benimawakī kēwaī hawē bu txai waxina mashtekei mākutā hanua niwe shashu ewapawē inatā Síria mai pakeakiri hariri bui iānēwā pukebaini ¹⁹Éfeso mae ewapanu keti itā habianu Áqüila inū Priscila baxibaini hanu judeubu itxamisbu hiwe anu Paulo ha mesti kashū Jesuskiri yusī hatube hātcharameaya ²⁰habū ea akī:

—Habianu baxikushū nuku yusīyuwe— akī yukabu nīkatā hanu niti ikatsi ikama hatu nematā ²¹Paulō hatu yuikī:

—Jerusalém anu hatube besiyutanū ika ē kayuaii. Hakia Deusū ea ana yunua matuki ē ana bayutiruki— iwanā, hatu yuibaini niwe shashu ewapawē Éfeso anua Paulo inakaini ²²Cesaría anu keti itā hanua butukaini maī kai mananā mapeketā Jerusalém anuabu ikūwaībuki nukukunātā hatu banabimatā hanua ana txitūi Antioquia anu maī kai hikixina ²³hatuki dasixina semana eskarabes ikūwaībube hiwetā ana hawēri tashnikaini kakūkaūkī ikūwaību mai pakea dabe Galácia inū Frigia mae tibi anuabu hatu xinā txākāwākubaikī hatu yusiakeakeaya

Éfeso inū Corinto anushū Apolō hatu yusīnikiaki, na hātcharā

²⁴ha haskaitiā judeu betsa, mae ewapa Alexandria Egito mai pakea anua kaīni, hawē kena Apolo Éfeso anu huxīshū Deusū hātcha kenenibu unāhairakī shabakabi hātcha pepa hawēruawē hatu yusī pewakī ²⁵Jesus mekenākiri unāmaimabu ikūwākī haska Joāonē besti hatu naximani ha besti unākī hawa dateama benima paēwē yusīkī haska Jesus hiwekūkaīni mawa ana besteni shabakabi hatu yusiāyā ²⁶hanu judeubu itxamisbu hiwe anushū Priscila inū Áqüilā Apolō hatu yusiāi nīkashū tari ha besti pashkabaī iyushū haska Jesusū kenawē taeshū Jesus ikūwaību hatu naximamisbu inū haska txibaību Deusū hatu hiwekuīmamiskiri ana shabakabi Apolo yusiabu nīkatā ²⁷hanua mai pakea betsa Acaia anu hawē mae ewapa Corinto anu Apolo kanū ika pukekatsis ikaya habianushūri ikūwaībū hau Apolo hatu anu hikiai i pewatā hau Apolo merabewashanūbū Efeso anushū ikūwaībū keneshū haya yunuabu niwe

shashu ewapawẽ pukekaini Corinto anu hikixina hanushũ habũ Jesus ikũwaĩbu hatu merabhairawanikiaki, Deusũ hatu duawaiwẽ taeshunã. ²⁸Habu judeubũ Jesus ikũwãbuma hamakiri yuiaibu Deusũ hãtxa kenenibuwẽ hatu yusĩkĩ: “Deusũ Messias Shanẽ Ibu mã manahairamistrã, Jesuski”, akĩ dasibi itxabu besuubishũ judeu shanẽ ibubũ hatu yusĩmis ana nemakĩ danãtirubuma hatu wanikiaki, hatu shabakabi unãmakinã.

Éfeso anushũ Paulõ hatu yusĩnikiaki, na hãtxarã

19 ¹Apolõ Corinto anushũ hatu yusĩayã hanua Paulori mati matipa anu kapukei Ásia mai pakea anu kakũkaĩni Éfeso anu hikitã ikũwaĩbuki nukushũ ²hatu yukakĩ:

—Hanu mã Jesus ikũwãkĩ taewairã, hawẽ Yushĩ Papatunã, ma matu atxitã matuki hikimamẽ?— hatu wa habũ yuikĩ:

—Deusũ Yushĩ Pepakiri tsuã hakiri hawa yusĩkĩ nuku nĩkamariamaki— akabu

³hanushũ Paulõ ana hatu yukakĩ:

—Haskatã tsuã yununi kuxipawẽ matu naximabu mã ikimamẽ?— hatu wa habũ kemakĩ:

—Haska Naximanika Joãonẽ hatu naximakĩ yusĩniwẽ taeshunã— akabu

⁴Paulõ ana hatu yuikĩ:

—Joãonẽ hatu naximakĩ hau hatũ txakabu henekĩ hatũ xinã betsa watã hau Deus anu benũbũ aniki. Hanushũ hatu ana yuikĩ: “Kuxipahaira ea katxu txipu huikiki. Ikũwãshãkãwẽ”, hatu wakubaĩnikiaki. Ha kuxiparã, Jesuski— hatu wa ⁵hatu haska wa nĩkatã:

—Haskakenã, Shanẽ Ibu Jesusũ kena kuxipawẽ ea naximawe— akabu hawenabu dasibi hatu unãti wamakĩ Shanẽ Ibu Jesusũ kenawẽ taeshũ Paulõ hatu naximatã ⁶⁻⁷hatu haska watã ha 12 hunibuki hatuki mamepikũkaunaya Deusũ Yushĩ Pepa hatuki butuakeakeaya hanua habu tibiki nawã hãtxa betsa betsapawẽ hãtxaisbumabiakẽ hatũ hãtxawẽ Deusũ hãtxa hatu yuimakĩ meshtãmanikiaki.

⁸Hanushũ ushe dabe inũ besti nitxĩ hanu judeubu itxamisbu hiwe anu hikitãtani dateama shabakabi hatube hãtxanamekĩ hawẽ Messias Jesus nukũ mekenãwẽ taea Deus shanẽ ibushanaikiri Paulõ hatu ikũwãmakatsis ikũkaĩnaya ⁹hanua judeubu hatiri huĩti kuxikĩ Jesus mekenã Bai Bena ikũwãkatsi ikama dasibibũ nĩkaibũ hãtxa txakabukĩ txakabu yuiaibuwẽ taea hanua Paulo ana hatube itxama hatu henebaikĩ ikũwaĩbu tari hatu iyushũ Tiranõ escola anushũ hatu itxawashũ Jesuskiri yusĩ shaba tibi hatube hãtxanamekũkaikĩ ¹⁰ano dabe nitxiãyã ha mai pakea Ásia anu hiweabu dasibi judeubu inũ judeubumã Shanẽ Ibu Jesus mekenãkiri yusĩãĩ nĩkakubaĩnaibũ ¹¹hanushũ Deusũ Paulo merabewaya dami tsuã

atiruma betsa betsapa waya ¹²Paulo Deusū kuxipa haya unākī hawē tari tuashwē buneshexina inū hawē dayati tari saweshū pekaxina bushū isī teneai bu hawē hatu dakukī hawē tariwē betsabu shushawakī betsabu anuari yushī txakabubu kaīmakī kaya wapakeaibū

¹³hanushū judeubu betsabū pei binū ishū bai namakishū Deusū hātixa kenenibuwē yushī txakabu kaīmakubaīmisbu Paulō akai keskari wanū, iwanā, Shanē Ibu Jesusū kena kuxipawē yushī txakabu yunukī: “Jesusū kena kuxipawē Paulō amis keskari wakī ē matu yunuai kaīrikāwē!” hatu wakubainaibū

¹⁴hatiri shukuabu betsabu Deusbe hawenabu hātixashunika shanē ibu Cevā sete huni bake mukayabū haska wakī yura betsabu anua yushī txakabu kaīmabiamisbuwē taea ana kuxipanū, iwanā, Shanē Ibu Jesusū kenawē kaīmakī yunukī:

—Haska Paulō amis keska wakī ē mia yui ai Jesusū kuxipawē taea kaīwē— akī ¹⁵abiamisbu betsatiā yushī betsa kaīmapanābū yushī txakabū hatu kemakī:

—Deusū Katua Jesusū kuxipawē ē dateai. Paulokiri ē unāriai. Hamē maturā, mā tsuabu iki ikai? Tsuā kuxipa mā hayamē?— hatu wa

¹⁶ha hatu haska watā huni yushī txakabuyatū hatu detekī yushī txakabū kuxipawē hatu itxakahairawakī hatu nuitapawaya tariuma himi habai hiwe anua txītu kuxibaīnabu ¹⁷Éfeso anuabu dasibi judeubu inū judeubumā nīkatā datehairakī Shanē Ibu Jesusū kena kuxipa unai itsakī: “Nū hamē datākeaketirumaki”, ikī Jesusū kena pawanibukiaki.

¹⁸Hanu ikūwaību itxabu anua betsabu benishū haska wakī txakabuwakubaīnimabu hatuki shabakabi txanikubaīnaibū ¹⁹betsabu habu mukayakī unāmisbū Jesus txibanū, iwanā, hawē mukayakī unāti una beshū dasibibū besuuri mātixishū tanakī hawē pei karu 50.000 prata pei heshe tanashū hawē nuiama kuakī keyunibukiaki. ²⁰Haska waibū Shanē Ibu Jesusū kaka pepa inū hawē kuxipakiri betsabū hatu unāmakī dasibibu hatu nīkamakī keyukī nati anibuki.

²¹Hanushū Paulō xinākī yuikī:

—Macedōnia inū Acaia mai pakea anu kashū ikūwaību ana uīkubaūtani Jerusalém anu ana ē kashanai. Hari kashū hatu uītani Roma anuaburi Deusū ea yunuaiwē taea ē hatu uī kakatsis iriai— itā ²²hanua hau bebūkiri Macedōnia anu bunūbū hawē merabewanika dabe Timóteo inū Erasto yunutā ana usha eskarabesi Paulo Ásia mai pakea anu baxikuyuaya

Éfeso anuabu itimaskanibukiaki, na hātixarā

²³⁻²⁴ha hatu haska wakī Jesusū Bai Benakiri hatu unāmaibū hanua prata mane hushupa dami wanika hawē kena Demétrio yushī hawē kena Diana hawē kēwāti hiwe dami mixtī wamistū habe dayaibū pei

itxapa bimisbuwē taeshū Demétrio Paulō yusīa bena abuama yurabu Éfeso anuabu hatu itimaska wakī ²⁵habu habias keskari dayamisbu hatu itxawashū yuikī:

—Ebe dayamisbuñ, haska nukukiri txakabu yuiaibu matu yuinū ea nīkairakāwē. Nukū dayawē pepai nū hiwemisbu mā unaiī. ²⁶Ha yusīnā Paulō hatu yuikī: “Mekenē hunī damiwarā, yushī kuxipa deusmaki”, akī yurabu habū bimisbu nuku putamakanikiki. Nenu nukū mae Éfeso anu bestima hakia Ásia hirabi anushū hatu yusīkubaunai nīkakī hatu haska wai mā unaiī. ²⁷Haskarā, meseki. Nū damiwai dayakī nū hawē pei bimisbu nuku meshteabu nū ana hawa hayatirumaki, danaībuwē taearā. Haska bestimarā, nuku merabewamis yushī dami aību nai anua kawani Diana inū hawē kēwāti templorā, habu Ásia anu hiweabu inū mai hirabi anuri hiweabūri ikis abukī kēwāmisbuki. Hakia Paulō hātxa nīkakī Diana ana kēwāma hawē kēwāti hiwe benukī danāshākanikiki, Paulō yusīa besti nīkakinā— hatu wa

²⁸hatu haska wa nīkatā Pauloki sinatakī bis iki sai ikī hui kuxipawē yuikī:

—Éfeso anu nukū yushī Diana pepahairaki!— ikī yui heneabumakē

²⁹haskaibu yurā kaiānē nīkatā Efeso mae hirabi anua dasibi itimaskai berukuakeakebaūkī Macedōnia anua Paulobe beimabu Gaio inū Aristarco atxibaikī hanu dasibi itxa tsaumisbu anu hatu sharabaikī iyuabu ³⁰hanua dasibi ma itxabu anu Paulo naxui ikaī hatu hātxa wai kapanā ikūwaibū hari nitxiāma nemabu ³¹ha dikabi Ásia mai pakea shanē ibubu Paulō haibuabū hatū hātxa bumakī: —Mesekanikiki. Hau huyamanūwē— akī Paulo habuā nemariabu ³²hanua ma itxabu itimaskahairakī hātxa kuxipa betsa betsapa yui bis iki xā xāki iki itimaskaibū itxapabu hawa unāma bea itxabu yuka ikī:

—Haskai nū itxa ikanai?— ikaibū ³³hakia haratutūra itxabu hau judeubukiri hawa txakabu hayama hau hatu unāmaki daewanū judeu shanē ibu betsa Alexandre itxabu anua yunukī shutubaī hatu bebū nitxiābu hau pesnūbū hawē mekē hatu sanāshuna ³⁴hakia Alexandre judeu uīkī hatunabuma unātā danākī hawē hātxa nīkakatsi ikama hātxa kuxipawē bis iki yuikī:

—Éfeso anu nukū yushī Diana pepahairaki!— ikī yui yane heneama duas hora habias hātxa kuxipawē yuiaibū ³⁵atimas hatū mae shanē ibu betsa hatū hatu keneshūmistū hatu nesewashū yuikī:

—Éfeso anua enabuñ, matu yuinū ea nīkakāwē. Nukū yushī Diana hawē dami nai anua kawani inū hawē kēwāti templo hawērua nū mekehairamis mai hirabi anuabū unā keyukanikiki. ³⁶Haska txanimawē taea pestā xinā pewama mā haskatirumaki. Uīrakāwē. ³⁷Na huni dabe mā iweatunā, nukū yushī Diana kēwāti templokiri hawa atimapa wai inū hawa hakiri txakabu yuiabumaki. ³⁸Hakia Demétrio habe dayamisbubetā txitekī

hatu ha akatsi ikinã, na hatu haska waibu nukũ shanẽ ibu pewanikabu itxashũ hatũ hãtxa nĩkashũ habubetã unãti watirubuki, haska habuã amiskirirã. ³⁹Hakia matũ hawara betsa mã pewakatsis ikairã, nukũ mae shanẽ ibu pewanikabube itxashũ hawara mã abuama mã yuka hatubetã mã pewariatirubuki, hatube itxashunã. ⁴⁰Hamẽ haskawẽ taema itxa mã itimaskahairabu natiã haskakiri mã pewama Romano shanẽ ibubũ matu ha atirubuki. Matu haska waibũ nemakĩ nũ hawa matukiri yuitirumaki. Ana haska hãtxayamakãwẽ— ⁴¹hatu watã hatu nitxĩnikiaki.

**Macedônia inũ Grécia mai pakea anushũ Paulõ
yusikĩ hatu xinã txãkãwanikiaki, na hãtxarã**

20 ¹Éfeso anua itimaskabai ma heneabũ hanushũ Paulõ ikũwaĩbu hatu yusĩ pewanũ ishũ hatu itxawashũ hatu xinã mestẽwãmatã Deus hatu yukashũtã Éfeso anua kaĩkaĩni Macedônia mai pakea anu kaxiã ²hanushũ hatu uĩkubaũkĩ ikũwaĩbu yusĩ hatube hãtxakĩ hatu benimawakĩ xinã txãkãwãkĩ keyutã, hanua huni betsa betsapa hatu iyui atimas Grécia mai pakea anu Corinto dapi hikitã ³hanu hatuki nukutã hiweyukĩ ushe dabe inũ besti nitxĩtã hariri Síria mai pakea anu kanũ ika yubakatã niwe shashu ewapaki inai kapanã hanushũ judeubũ Paulo detekatsi yubakaxinabu Paulõ bana nĩkatã xinã betsa watã ana Macedõniakiri mananã hawẽri ana txĩtũkaĩni maĩ kaya ⁴haska kainai habũ txibãbainai Beréia anua Pirrõ bake Sópatro inũ, Tessalõnica anua Aristarco inũ Segundo inũ, Derbe anua Gaio inũ, Timóteo inũ, Ásia mai pakea anua Tíquico inũ Trófimo habe bui ⁵hatiri bebũkiri pukeshũ mae betsa Trõade anushũ nuku manaibũ ⁶hanushũ judeubũ misi shashama pi besi nawai nũ hatube iyuyaya hanua Filipos anua Paulobe ã kai niwe shashu ewapawẽ pukei shaba cinco dia binutã keti itã Trõade anu hatuki ana nukutã sete dia ikũwaĩbuki bai nũ hanu iyuniki.

Trõade anushũ Paulõ hatu yusĩnikiaki, na hãtxarã

⁷Habianuari domingo mexu merã haska nuku yunubaini Jesus nuku mawashuni xinãmati misi tũkeshũ pikatsi ikũwaĩbubes nũ itxa mexukiri kanũ ishũ Paulõ nuku yusĩ yamenapũ hãtxa heneriamakẽ ⁸hari dũtu ewapa hiwe keyatapa manaũri anu bĩ itxapa hari haya, harishũ dekuabu anu nuku itxawakẽ ⁹hiwe keyatapa tapa dabe inũ besti uĩti shui anu berunã hawẽ kena Êutico tsaushũ Paulõ yusĩ txaipawai nĩkai usha tenei hanua ushatxakayama manaũria kawani tĩ ikaya beninũ ika hawaira butukirã ma mawa betxiabu ¹⁰hakia Paulo buturiakirã haki beukaĩ teikutã ikũwaĩbu hatu yuikĩ:

—Hawẽ dateyamakãwẽ, hiweakirã— hatu wa ana hiwea uĩaĩbũ

¹¹Paulo ana nukube inakaĩ Jesus nuku mawashuni xinãmati misi tũkeshũ nuku pimatã ana nuku yusĩ nukube hãtxaxini ma shabaya hãtxa

menetã nũ kaya ¹²berunã kawana ana hiwea iyui dasibi benimahairai inũ buaibũ

Trôade anua Mileto anu Paulo kanikiaki, na hãtxarã

¹³hanua Paulõ nuku dukũ nuku nitxiã niwe shashuwẽ kai Assôs mae anu bebũkiri nũ kanũ Paulõ nuku yunutã hanua nuku yuikĩ:

—Shashũ buãtãkãwẽ, ẽ kapakeairã, haria ea ibaĩkashunã— nuku wa niwe shashu ewapawẽ kai ¹⁴ma Assôs anu Paulo kapakea haria nukuki shashũ inakaini Mitilene anu keti ika hanu ushaxini ¹⁵ana kai natukã hawẽ kena Quios kema shashũ ushariaxini ana kai natukã betsa hawẽ kena Samos anu keti ika ushaxini hanua bestẽkaini Mileto txaimakẽ hanu hikitã ¹⁶Jerusalém anu Pentecostes shekiwã bimi betsa ha dukũ kanimistiã judeubu besi nawamisbutiã hatube besinũ ika hĩ hĩ ikĩ Ásia anu usha itxapai ana baxikukatsi ikamawẽ taea Éfeso anu Paulo kama Mileto anu niti ishũ hatu manakĩ

Éfeso anuabu mekenikabuki Paulo hawẽ henei hatuki txaninikiaki, na hãtxarã

¹⁷Éfeso anua ikũwaĩbu mekenikabu hau Mileto anu bea hau habe hãtxai benũbũ Paulõ hawẽ hãtxa hatu keneshũ bumakẽ ¹⁸uĩbirani Mileto anu mekenikabu beabu Paulõ hatu yuikĩ:

—Matũ mae pakea Ásia anu ẽ matu anu hiki taeyama haska ẽ hiwekũkaĩmis mã unaiĩ. ¹⁹Earã, matu anushũ ẽ xinãnẽ xinaĩ txikixi hawa keãma ẽ Shanẽ Ibu Jesusũ ea yununi duawai nĩkabumabiakẽ matuya kashai beũ hene habakĩ judeubũ ea itxakawabiabu matu anushũ bikahaira tenei ẽ Jesus dayashũkũkaĩyamaki. ²⁰Ea haska wabiabu dasibibũ besuuria inũ matũ hiwe betsa betsapa anushũ matu yusĩki matu merabewanũ, iwanã, hawa meseki dakeama ẽ matu yusĩ heneama iniki. ²¹Haska inũ, Deuskiri txakabumisbũ hau xinã betsa watã nukũ Shanẽ Ibu Jesus inũ Deuskiri xinã betsa watã mã ikũwanũbũ judeubu inũ judeubuma ẽ matu yusĩhairaniki. ²²Hakia eskatiã Deusũ Yushĩ Papatũ Jerusalém anu ea yunutxakayamaiwẽ taea hari ẽ uĩ kaii. Ẽ hari hikia tsuabura haskarara eki tanabu ẽ unãmaki. ²³Hakia mae tibi anu ẽ ka Deusũ Yushĩ Papatũ bebũkiri ea hatu unãmakĩ bitxiti hiwe anu ea bitxishanaibu inũ betsa betsapawẽ ea bika tenemashanaibu ea yuimisbuki. Ha besti ẽ unaiĩ. ²⁴Habiaskabiakẽ earã, ẽ hiweawẽ nui yauxiama ẽ daya Jesusũ ea yununiwẽ taeshũ Deus yurabuwẽ nuikĩ haska wakĩ hawenabu hatu wakatsis ikaikiri punu nukama benimai heneama ẽ hatu yusĩkĩ keyukatsis ikũkainaii.

²⁵—Haska inũ, Deus shanẽ ibuaikiri ẽ matu yusĩkubaũyama tsuã mã ea ana uĩyama ishanai ẽ matu yuiaii. ²⁶⁻²⁷Haskakẽ ikis matu yuinũ nĩkakãwẽ. Dasibi Deusũ yurabu yubani hawa huneama shabakabi ẽ

matuki txanimiswě taeshũ tsuāra habũ danākĩ Jesus ikũwābumawě taeshũ Deusũ ea kupiama ishanikiki. ²⁸Haskakē ibubis mekekĩ Deusũ Yushĩ Papatũ matu katua merabewakĩ ikũwaĩbu mekekubaishākāwě. Deusunabu hatu wakatsi ikĩ hawě bake yunua mawashũkĩ hawě himiwě hawenawakĩ meribi hatu wani hatu putama hatu uĩrashũshākāwě.

²⁹—Hamě betsarā, ě ma kaĩkainikē kamā inu pubě keskabu beshũ txashuwā shukua yamawamis keska wakĩ ikũwaĩbu txashuwā keska atxishũ tenākĩ yamawanũ ika imisbu keska beshākanikiki. ³⁰Matu ibubis matu anua hanubi benitā shaně ibutā: “Ea txibākāwě”, ishũ matu parākĩ matu txani yusĩshākanikiki. ³¹Haskawě taeshũ ano dabe inũ besti matube hiweyushũ mā kaneai tibi ě matu meshtamakubaĩkĩ matu yusĩkubaĩkĩ bariri inũ mexu merā matuya kashabetanā ě matu haska wani hakimayamakāwě. Eskatianā, hanũ ibubis beru mestēwārikāwě.

³²—Ě betsabu inũ ě puibuũ, ě matu hātxa wai ma hatishũ ě matu keyuai nĩkakāwě. Natiā Deus ě matu yukashunaii. Hawě hātxa pepa nuimis mā unāyā haska dasibi yubakani Deus matuwě dayakĩ hawě kuxipawě matu amashanikiki, mā hawenabu meribi ewai unānepanũbunā— itā

³³—Daketapakĩ ibubis matũ pei inũ matũ mabu matu bianũ ika kemuama ³⁴hakia haskama ea ě hatube dayai hawa hatu bika tenemama haska ea inũ habũ hamapai hayama bikatsis ikĩ mekenē dayakĩ ě bikubainima mā nuku unaiĩ. ³⁵Haska inũ, nukũ Shaně Ibu Jesusũ nuku yusĩkĩ yuikĩ: “Tsuara nuitapakĩ hawara bi benimamisbuki. Hakia tsuāra nuitapaibu merabewakĩ inaĩ benimatxakayamamisbuki”, hatu wani xinaĩ: “Txikixama dayakĩ nuitapaibu merabewakubaishākāwě”, akĩ ě matu yusĩkũbaĩmiski— iwanā,

³⁶hatu yusĩ menetā Paulo dāti ikaya habe dāti iki keyuabu hau Deusũ hatu mekekubaishanũ Paulō hatu yukashūtā meneaya ³⁷hanua dasibitũ teikutā haya kashabetanā Paulo tātso atā: ³⁸“Ana mā ea uĩyama ishanai”, ikĩ hatu yuishuwě taea hawě nuitxakayamai ana benimama punu nukatā habiaskabia nitxĩnũ ika iānēwā kesha anu shashu anu Paulo iyubũ

Jerusalémkiri Paulo kanikiaki, na hātcharā

21 ¹hanushũ Jesus ikũwaĩbu hatu henebaini niwe shashu ewapaki nũ ana nanekaini natukā betsa hawě kena Cós anu kayābis besusi nũ pukea hanu ushaxini ana kai natukā betsa hawě kena Rodes anu ushariakaini hanua ana kai mae betsa Pátara anu hikishũ ²niwe shashu ewapa betsa Feníciakiri kanũ ika neshea betxitā hawěri kanũ, ika haki maekĩ hawě ibu pakatā hatube nũ ana kai ³ana patābaĩkatsi ikama besusi pukei natukā ewapa hawě kena Chipre yusiuri daĩbaini mai kesua Síria anu patākubauni Tiro anu hatũ mabu apakatsis iki hanu hikikaũ keti ikē

⁴hanua ikūwaĩbuki nukutã hanu mapekeyuxina sete dia besti hatuki nũ bayuaya Deusũ Yushĩ Papatũ bebũkiri ikūwaĩbu yuia habuã Paulo yuikĩ: “Jerusalém anu kayamayuwe”, akĩ keyuabu ⁵hanua sete dia ma keyuaya: “Ē ma kai”, nũ hatu wa nuku nitxĩnũ ika hatũ mae anua habũ ikūwaĩ hunibu inũ hatũ aĩbuaibu inũ hatũ bakebuya dasibibũ nuku txibãbirã iãnẽwã kesha anu bea maxĩ nukube dãti itã nukubetã Deus kuxipa yukatã ⁶nuku haska washũtã nũ kai penũ nuku nitxĩkĩ nuku shashũ ainitã hanua habu hatũ hiwekiri txĩtũbainaibũ

⁷hanua Tiro anua kai mae betsa Ptolemaida anu keti itã ha shashuwẽ nũ huai henetã ikūwaĩbu nũ hatu betxima benimakĩ nuku yukabu hatuki bayui hanu ushaxini ⁸hanua mexukiri Paulobe bestẽkaini ana kai Cesaréia anu hikitã Jerusalém anushũ ha sete merabewanikabu wakĩ hatu katunibu betsa hawẽ kena Filipẽ Deusũ hãtxa hatu yuikubaũmistũ hiwe anu hikitã haki bai nũ hanu iyukẽ ⁹hawẽ aĩbu bake dabe inũ dabe beneyariabumã Deusũ hãtxa hatu yuiriakubainaibũ ¹⁰hanua shaba eskarabes kaya Judéia mai pakea anua tashnikirani Deusũ hãtxa hatu yuiriakubaĩmis hawẽ kena Ágabo hua hikia ¹¹nuku uĩtanũ ika hushũ Paulõ nanesheketi bitã hawẽ tae inũ hawẽ mekẽ ibubis meneshãtã yuikĩ:

—Deusũ Yushĩ Papatũ ea yuixina matu yuinũ nĩkakãwẽ. Na ě akai keska wakĩ Jerusalém anushũ na nanesheketi ibu judeubũ atxishũ neatã Romanonawabu anu inãshãkanikiki— ikaya

¹²nĩkatã Jerusalém anu hau ana hari kayamanũ nuku inũ Cesaréia anuabũ nũ nemakĩ baxibiakubaina ¹³Paulõ nuku kemakĩ:

—Haskai ewẽ taea kashakĩ mã ea huĩti nixmawakanai? Jesus ikũwãkĩ ě txibãmiswẽ taea Jerusalém anushũ ea atxishũ neashanaibuwẽ ě dateamaki. Hakia ě Jesus dayashũkũkaĩmiswẽ taea ě haria mawariashũtiruki— nuku wa

¹⁴haska washũ hawẽ xinã betsa wamatima hau haskaratanũ nema henetã yuikĩ:

—Nukũ Shanẽ Ibũ xinãnẽ iwe— nũ wa

¹⁵habe kanũ ishũ nukũ mabu pewatã Jerusalémkiri kakũkaini nũ mapekeaya ¹⁶Cesaréia anua ikūwaĩbu hatiri nukube buxishũ huni betsa Chipre anua kaĩni hawẽ kena Mnasom ma bari itxapa Jesus ikũwãpakemistũ hiwe Jerusalém anu nũ habe iyunũ nuku hari iyukĩ

Paulo Tiagoki banikiaki, na hãtxarã

¹⁷hanua Jerusalém anu hikitã Mnasomẽ hiwe anu nuku iyuabu ikūwaĩbu nukuwẽ benimabirã nuku iabu ¹⁸hanu ushaxini Jesusũ betsa Tiago nũ haki bai ka habianuri dasibi mekenikabu nũ hatuki nukua ¹⁹hatube yuka itã hanubi Paulõ hatu hãtxa wakĩ haska Deusũ merabewakĩ dayamakĩ hamapai betsa tibi judeubuma anushũ Jesus hatu ikũwãmakubainai binumakubaĩxina hatuki txaniai ²⁰nĩkabaikĩ hanushũ Deus kẽwãtã habu betsã Paulo yuikĩ:

—Nukū betsaã, mia yuinũ nĩkawe. Nukunabu judeubu mirimabũ Jesus ma ikũwãbiakĩ hawẽ nemati inũ hawẽ yunuti Moisés nukū shenipabu yusĩni meke pewashũ henekatsi ikama txibãpakemisbũ ²¹ mĩ akaikiri mia yuãkĩ yuikĩ: “Nukunabu nawabube hiwea Paulõ hatu yusĩkĩ Moisés yusĩni hau ana txibãyamanũbũ inũ hatũ bakebu hau hatũ hina kubitxi ana meshteyamanũbũ hatu yusĩkĩ yunumiskiaki”, ibirã ibirãmisbuki, mikiri txani beshũ yuikinã. ²² Natiã mĩ ma hua nĩkatã yurabu miki sinatakĩ mia danãtirubuki. Haska mia uĩaĩbũ hawawẽ nũ mia haska watirumaki. ²³ Mĩ haska wakĩ hatu daewanũ mia yuinũ nĩkawe. Nukū betsabu quatro huni Deusbe yubakaima ma keyui kemai na habia tsauwabuki. ²⁴ Haskakẽ mia hatube kashũ Templo anu hatube pepakĩ Deusbe nukunabu hãtxashunikabũ nukū beya txibãkĩ hau Deus ana matuki sinatayamanũ Deus yubaimabu hatu pakashũtã habũ bu hatu mashtemakĩ mãkuamashãwẽ. Mĩ hatu haska washũkẽ judeubũ Jesus ikũwãkĩ dasibibũ uĩkĩ Deusũ hãtxa Moisés yusĩni kaneama mĩ txibãmis inũ hamẽmẽs mikiri txani txakamisbu unãshãkanikiki. ²⁵ Haska inũ, judeubumã Jesus ikũwaĩbukiri hau nukū beya txibãyamanũbũ nũ ma hatu bebũkiri keneshunimaki, xinã besti watã eska wakinã: “Yushĩ dami betsa kẽwãkĩ nami inãmisbu piyamashãkãwẽ. Ha inũ, himi ayamashãkãwẽ. Ha inũ, yuinaka teneshabu piyamashãkãwẽ. Ha inũ, aiyãkĩ haska Moisés nuku nemakĩ keneshuni txibãshãkãwẽ, hau nukunabu berabĩrabeyamanũbunã”, nũ hatu waniki— aki Tiago hãtxa meneaya hawẽ hiwe anua kaĩkaini Mnasom hiwe anu nũ ka

Templo hemaĩtĩ anushũ Paulo tenãnũ, iwanã, atxinibukiaki, na hãtxarã

²⁶ hanua ushaxini bestẽkaĩ Paulõ ha quatro hunibu iyui hatube pepanũ, iwanã, Templo hemaĩtĩ anu kashũ haska Deusbe hawenabu hãtxashunikabube hãtxanamei pepatikiri hatube yubakashu taewaibũ hanua ha quatro yubakaimabu habu meneaitiã ha quatro huni tibitũ hawẽ inãkuĩ betsa betsapa bui Deusbe hawenabu hãtxashunikabu anu bestibu bushuãbu Paulõ hatu banabima

²⁷ ma sete shaba keyui kaya Templo hemaĩtĩ anu Paulo nikaunai Ásia mai pakea anua judeubu bexĩshũ betxitã yurabu hatu itimaska wanũ ishũ pubẽkaĩ Paulo atxitã ²⁸ hãtxa kuxipawẽ hatu yuikĩ:

—Israelbuũ, nuku merabewai bekãwẽ. Na huninã, mae tibi anushũ yurabu hatu yusĩ txakakĩ nukukiri inũ, Moisés yusĩnikiri inũ, na nukū Templokiri hau xinã betsa wanũbũ hatu yuikubaũmiski. Ha dikabi nukū Templo anu Gregobu hatu iweshũ nukū Templo meribi ma hatu atimapa wamaikiki— ikinã, ²⁹ haska yuirã, ha dukũ Êfeso anua judeubuma Gregonawa hawẽ kena Trófimobe Paulo Jerusalém bai tanabiranai uĩxĩshũ ha huni Templo anu iyua dabanẽ marias xinãkĩ kaneirã.

³⁰ Hanushũ yurã kaiã itimaskai kuxibirã Templo hemaĩtĩ kene meribi anua Paulo atxitã shabakã kaĩmakĩ sharabainabũ Templo shui beputi

mekenikabū hawaira bepuaibū ³¹haska Jerusalém anushū Paulo tenānū, iwanā, kuxa kuxa akī ma tenāi buanaibu mae hirabi itimaskaibū Romano soldadobu shanē ibū haskaibu banabimabu nīkatā ³²hawaira hawē soldadobu inū soldado shanē ibu beshmasbu hatu itxawatā hatube kuxikaī ha yurā kaiā itxa itimaskaibu anu maputuxitā hatu uīabū Paulo kuxa kuxa akaibu hatu mepāmatuxitā ³³hanushū soldado shanē ibu Pauloki kematā hawē soldadobu yunua haki niri iki keyutā mane dispi txiwetameya dabewē meneshkī huneshaibū shanē ibū hatu yukakī:

—Narā, tsuamē? Hawa matu txakabuwaimēkaī?— hatu wa ³⁴habū hawa unāmabia unānumas hātxa betsa betsapa yuiakeakekī hawa tapīmaki pewabuma hawē soldadobu hatu yunuki:

—Hanu nukū mixki hiwe kuxipa anu iyukāwē— hatu wa iyuaibū ³⁵yurabu mesebainaibū Paulo soldadobū iashū tapaitiwē mapemabainaibū ³⁶yurā kaiā haki sinatai hatxū bukī hui kuxipawē yuikubaīkī:

—Tenākāwē! Tenākāwē!— ikubainaibū

Hawa txakabumakiri Paulō hatu yuinikiaki, na hāt خارā

³⁷hanushū soldadobu hanu mekei hiwemisbu mixki hiwe anu Paulo bitxi buaibū Gregō hāt xawē Paulō Romano shanē ibu yukakī:

—Eska ē mibe hāt xatirumē?— aka shanē ibū kemakī yuikī:

—Aa, mī Gregō hāt xayaraka? ³⁸Haskakenā, miarā, Egitonawa betsa shanē ibukī nukū mae nuku mebinū ika hawē 4.000 soldadobu hanu tsua hiweabumanu hatu iyutanimarā, mī ha dabanēbī ē ikai— aka

³⁹Paulō kemakī:

—Ē hamaki. Earā, ē judeubī. Mai pakea betsa Cilícia anu mae kuxipa Tarso anua ē kaīniki. Ea haska wama ha yurabu ē hāt xa wayuai ea heneyuwe— aka

⁴⁰shanē ibū hani:

—Iwe— akī heneyua

mixki tapaiti kesha nishū hawē mekē meneshekerabea sanātā hatu nemakī pes wakī keyua mapuabū judeū hāt xa Hebreowē Paulō shabakabi hatu yuikī:

22 ¹—Ē betsabu inū ē epabuū, haska ē txakabuma ekiri matu yuinū ea nīkakāwē— hatu wa ²habū hāt xa Hebreowē hatu yuia nīkai ana hawa banama pes ikama nīkaibū Paulō hatu yuikī:

³—Earā, ē judeuriki. Mai pakea betsa Cilícia anu mae ewapa Tarso anua ē kaībiani na Jerusalém anu ea iwenishū na habianushū ea yumewanibuki. Haska Deusū hāt xa Moisés nukū shenipabu yusīni Gamalielī ea yusī pehairawakubainai tapīnishū ē Deus dayashūkatsis ikūkainaii, na habiatīā mā Deus dayashunai keskariairā. ⁴Uatianā,

Deus dayashunũ, iwanã, tsuabũra Bai Bena Jesuskiri ikũwaĩbu hatu tenãnũ, iwanã, hunibu inũ aĩbuaibu atxishũ bitxiti hiwe anu hatu yunukĩ ẽ hatu itxakahaira wakĩ ẽ hatu nuitapa waniki. ⁵ ẽ hatu haska waya Damascokiriari Jesus ikũwaĩbu benabaũkĩ atxitã nenu iwetã ẽ hatu kupishanũ ea kuxipa wakĩ Deusbe nukunabu hãtxashunika shanẽ ibuhaira inũ nukũ mekenikabũ Damasco anu shanẽ ibubukiri ea keneshũ ea inãtã hari ea nitxĩnibuki. Na habiabu Deusbe nukunabu hãtxashunika shanẽ ibuhaira inũ nukũ mekenikabũ ea yununibũ ẽ haska akubaini unãkĩ matu yuitirubuki.

⁶Hanua ea kuxipa wakĩ kene ea inãbu bui haya kai Damasco bai tanabaini ma ẽ kemaya bari mananãbi nai anua bĩ txasha kuxipahaira peshekirã ea datxashaya ⁷ẽ maĩ di ika dakashũ nĩkaya hui tashnikĩ ea yuikĩ: “Sauloõ, Sauloõ, haskakĩ mĩ ea itxakawakubainai?” ea wa ⁸eãri yukakĩ: “Shanẽ ibuũ, mĩ tsua iki ikai?” ẽ wa hanushũ ea ana yuikĩ: “Habia ea ikũwaĩbu mĩ hatu itxakawakubainairã, ẽ Jesus Nazaré anuaki”, ea waya ⁹ha hunibu ebe bukĩ bĩ txashai uĩbiai hawẽ hãtxa nĩkabumakẽ ¹⁰eãri yukakĩ: “Shanẽ Ibuũ, haskapa?” ẽ aka ẽ Shanẽ Ibũ ea yuikĩ: “Benikaini kai Damasco anu karitãwẽ, harishũ mĩ haskakũkaĩshanai tsuãra mia yuishanikikirã”, ea akaya ¹¹ha bĩ txashapã ea beru nuka wakĩ ea mexu bepua ẽ ma bepeshebia ẽ uĩyamakẽ ẽ haibuaibũ metsũshũ Damasco anu ea iyunibuki.

¹²Hanu ẽ hikixikẽ huni betsa hawẽ kena Ananiasĩ Moisés hãtxa pe txibãmis judeu betsabũ hanu hiweshũ kẽwãmisbu ¹³Ananiasĩ ea merabewatanũ ika hua ea dapi nishũ yuikĩ: “Sauloõ, Jesus ikũwaĩ ma mĩ nukũ betsaki. Ana mĩ beruwẽ uĩ bena wariwe”, ea waya samama ẽ beru kayatiwatã ẽ ha uĩayã ¹⁴ana ea yuikĩ: “Ha nukũ Deus nukũ shenipabũ kẽwãpaunibu habiatũri mia katunishũ mia unãkĩ hau hawẽ xinãwẽ hawẽ bake pepa Jesus mĩ uĩnũ hawẽ huiwẽ mia hãtxa waxinaki. ¹⁵Haskawẽ taeshũ mianã, hawara uĩkĩ mĩ nĩkaxina yurabu mai hirabi anu hiweabu mĩ hatuki txanikũkaĩshanai”, iwanã, ¹⁶“Haskakenã, ana hatishuĩra manama mĩ Deuskiri txakabukũkaĩmis hau mia buashunũ Jesusũ kenawẽ taeshũ ẽ mia naximai kanũ beniriwe”, ea waniki.

¹⁷Hanua Jerusalém anu ẽ ana txĩtũkirãxina Deusbe hãtxanũ ika Templo hemaĩtĩ anu ka ẽ habe hãtxai nia namai keskakĩ ¹⁸Jesus ẽ uĩayã ea yuikĩ: “Nenushũ mĩ ekiri hatu yusĩayã mia nĩkama ishãkanikiki. Haskakẽ menã hawaira Jerusalém anua tashnirikaĩtãwẽ”, ea wa ¹⁹eã yuikĩ: “Shanẽ Ibuũ, hanu itxamisbu hiwe tibi anushũ mia ikũwaĩbu atxishũ bitxiti hiwe anu hatu bitximashũ hatu kupikĩ ẽ hatu kuxa kuxa amakubaĩxina dasibitũ ea unãkanikiki. ²⁰Ha inũ, mĩ hãtxa yuishunika Estêvão mãkãwẽ tsaka tsaka akaibu uĩkĩ habũ akai keska xinãkĩ hatũ tari ẽ hatu mekeshũxinaki”, ẽ wa ²¹ẽ Shanẽ Ibũ ea nemakĩ: “Txaihaira yurabu betsa betsapa judeubuma anu ẽ mia yunuaii. Hari karitãshãwẽ!” ea waniki— hatu wai

Paulo Romano documentoya hatu unāmanikiaki, na hātstarā

²²ha judeubu itxabū hatishū besti Paulō hātxa nīkashūtā ana judeubumakiri nīkakatsi ikama hakiri sinatakī unāshubima yuikī:

—Ha hunirā, nū ana hiwea uīkatsi ikamaki! Tenākī yamawarikāwē!— iki

²³heneama keketikubaikī haki sinatai nashuku paepakī hatū peyabukumisbu tari pekatā mai bekux bekux akī kuru sa sa akaibū ²⁴haskarawē taea dasibibu haki sinataibu unākatsis ikī Romano shanē ibi comandantē soldadobu yunukī:

—Nukū meketi hiwe uke merā mistuyukāwē. Harishū haskai haki sinatai biski ikanimēkaī hau nuku yuinū bitxi kuxatiwē kuxa kuxa akī txanimakāwē— hatu wa ²⁵bitxishū hawē nea pekatā hanushū kuxakatsi pewaibū hanua shanē ibi beshmas capitāo ha dapi nia Paulō yukakī:

—Romano huni documentoyabiakenā, unāti wariama mā kuxa kuxa atirumē? Ha dikabi hawa txakabu waxina unāmari mā ariatirumē? Haska mā yunuai? Earā, ē matū documentoyakirā— aka

²⁶haska wa capitāonē nīkabaī hawē shanē ibi comandante anu ka haki txanikī yuikī:

—Ha hunirā, Romano documentoyakiaki. Txanimamēkaī, yukatāwē— aka ²⁷shanē ibi comandante kashū Paulo yukakī:

—Txanima mī Romano documento hayamē? Ea yuiriwe— aka Paulō kemakī:

—Hawaikika! Ē hayabī!— aka

²⁸hanushū shanē ibi comandantē Paulo yuikī:

—Ena bikinā, pei itxapawē pakatā ē biniki— aka Paulō ana yuikī:

—Enarā, haskamaki. Romano ē kaīyā hawa pakama ē documento ea inānibuki— ikai

²⁹nīkatā datei kuxatiyabū henebainaibū hatu neamashūwē taea Romano shanē ibi comandante datebetanā Paulo hawa wama duawakī hau pe mekenūbū hawē soldadobu yunubaina

Sinédrio judeu shanē ibubuki Paulo txaninikiaki, na hātstarā

³⁰hanua shanē ibi comandantē ushaxini penaya haskaya Paulo txitexinabumēkaī, iwanā, tapīhairakatsis ikī mane dispi txiwetameyawē neshaxinabu comandantē hawē soldado hatu pekamatā Deusbe hawenabu hātshunika shanē ibubu inū Sinédrio dasibi hatu itxawatā Paulo kaīmabaī hatu anu iyushū hatū besuuri nitxiā

23 ¹Sinédrio itxabu dasibi shabakabi beiskī Paulō hatu yuikī:

—Ē betsabuū, matu yuinū nīkakāwē. Ē hawa Deuski txakabu nima natiā Deuski dateama unānuma ē hiweaki, Deusū ea unāyanā— hatu waya

²ha dapi niabū hau betsā kepais atanū Deusbe hawenabu hātxashunika shanē ibuhaira Ananiasī hatu yunua betsā kepais aka ³sinatakī Paulō kemakī:

—Bemakis mī beparamebiaya mī huīti txakabu unātā Deusū mia kupikī mia kepais ariashanikiki. Mī hari tsaushū Deusū hātxa kenenibuwē ea unāti wabiakī hau ea kepais anūbū hatu yunui na habia Deusū hātxa mī kaneaii— aka

⁴ha dapi mapuabū hawaira nemakī yuikī:

—Deusbe nukunabu hātxashunika shanē ibuhairaki dateama mī haki sinataii— akabu

⁵Paulō yuikī:

—Ē betsabuū, Deusbe nukunabu hātxashunika shanē ibuhairama dabanē ē unāma ikaii. “Matunabu shanē ibukiri hātxa txakabutimaki”, ibianikē ē kaneshuki— itā

⁶shanē ibubu itxabu Sinédrio anu hatiri saduceubu inū hatiri fariseubu Paulō unākī hui kuxipawē hatu yuikī:

—Ē betsabuū, earā, ē fariseuki. Ē epa inū ē shenipabu fariseubu irianibuki. Mawa ana hiweshanaibu ikūwākī ē manaya ea unāti wakī mā daka ea danaī ikai— hatu wa

⁷⁻⁸“Mawa ana besteābuma ishanai inū Deusū nai tsuma inū yushī hayamakī”, ikī saduceubū yuimisbū hanua fariseubu haskama:

“Mawabu ana bestēshanai inū Deusū nai tsuma inū yushī hayakī”, akī yuimisbukē Paulō ha hamebi haskakiri hatu hātxa wai nīkatā fariseubu inū saduceubu ha iki hanubi kemanamei ha itxabu anua pashkaibū

⁹haskaibū unāshubima dasibibū yui kemanamei keketikubaunaibū hanua Deusū hātxa kenenibu yusīnanāmisbu fariseubu betsa benitā fariseubu hātxashunū, iwanā, hatu yuikī:

—Na huninā, hawa txakabuwamakī. Yushī kasmai nai tsuma habe hātxai daki ixiākī— hatu waibū

¹⁰pubēhairai kemanamei hātxa berukuaibuwē taeshū Paulo yauxikī niniakeakekī pashka pashka akana ika datekī Romano soldado comandantē hau i benūbū hawē soldadobu yunua itxabu anua Paulo iyushū hawē meketi hiwe kuxipa anu soldadobū ana bitxiabū

¹¹ushaxini ana mexu betsatiā Paulo anu nukū Shanē Ibu Jesus hushū yuikī:

—Pauloō, dateama benimawe. Na Jerusalém anushū ekiri ikūwākī mī hatu yuixina keskari wakī Roma anushū habiaskari ekiri hatu yuiritāshāwē— awani kakē

Paulo tenākatsi yubakanibukiaki, na hātxarā

¹²⁻¹³hanua penaya judeubu itxapahaira 40 binua itxa Paulo tenākatsi yubakai yuinamei:

—Paulo tenānū ika tenāriama ana nū hawa piama inū nū hawa nushuama ishanaii. Hakia ariama hawara nū pikē Deusū hau nuku kupishanūwē— iki haskakiri xinaī hātxabaini ¹⁴bushū Deusbe hawenabu hātxashunika shanē ibubu inū shanē ibu beshmasbu anu bushū betsā hatu yuikī:

—Nukubunā, Paulo tenānū ika nū hakiri yubakashuki. Ariama ana nū hawa pitiruma inū nū hawa nushutiruma nū yubakashuki. Hakia tenāriama hawara nū pikē Deusū hau nuku kupishanūwē, iki 40 hunibu binua haskakiri xinaī nū hātxakāshuki. ¹⁵Haskakē dasibibū mā ana unāti pehaira wakī Paulo hau ana iwenūbū beparātā Romano soldado shanē ibu comandante yukakāwē. Hanushū iweaibū hanu mā itxamisbu anu hikiriama nū tenāshanaii— iwanā —Nū yubakakāshu nū ma peki— ikaibu ¹⁶Paulō puī huni bakē haskaibu nīkabaini hawaira kaī soldadobū meketi hiwe anu kashū haska yubakakāshu Paulo yuia ¹⁷Romano soldado shanē ibu beshmas capitāo betsā kenashū Paulō yuikī:

—Mī shanē ibu comandante hau hawara nīkashukiri banabimanū na berunā iyutāwē— aka

¹⁸hanua hawē shanē ibu comandante anu capitāonē berunā iyushū yuikī:

—Hawa daki hau mia yuinū na berunā mianu ē iwēnū ha Paulo nū bitxixinatū ea yunushuki— aka

¹⁹Romano comandantē metsūshū tari berunā ha besti iyushū yukakī:

—Hawa mī ea yuinū ika ikai?— aka

²⁰berunātū yuikī:

—Paulo ana yukanū, iwanā, mia beparātā mexukiri habu Sinédrio anu mī Paulo hatu iyushūshanū mia yukai bekatsi ma shanē ibubu yubakakāshuki. ²¹Hakia 40 hunibu binuatū Paulo tenākatsi yubakakāshū huneshū manakanikiaki. Tenāriama ana hawa piama inū hawa nushuama iyukanikiaki. Tenāriama hawara piaibū Deusū hatu kupishanikiaki. Haskakāshu miā besti: “Peki”, mī hatu wanū mia yukai bekanikiaki. Hatū hātxa ikūwāyamashāwē— aka

²²comandantē nīkatā berunā yuikī:

—Haska mī ea yuishu tsua kakawayamatāwē— ashū nitxiā berunā kaya

Hatū shanē ibu Félix anu Paulo yununikiaki, na hātxarā

²³hanushū Romano comandantē hawē capitāo dabe hatu kena beabu yunukī:

—200 soldadobu māī buaibu inū, 70 cavaloki katsaumea buaibu inū, hanua 200ri hatū haxia buaibu itxawakī hatu pewakāwē. Mexu merā 9:00 hora da noitekē Cesaréia anu nitxītākāwē, ²⁴nukū shanē ibu Félix anu iyukinā. Meribi cavalo betsaki katsaūshū Paulo hawama meke

pewashū piskumatākāwē— hatu wa kakatsi soldadobū pewaibū ²⁵hau keneyabi butanūbū comandantē keneshūkī:

²⁶“Ē ea comandante Cláudio Lísiasĩ mĩ ē shanē ibu pepahaira Félixĩ, ē mia hātxa bumai ūrashāwē. ²⁷Ha huni hawē kena Paulo haki sinatakĩ judeubū atxipakebaū tenāpanābū Romano documento hayakē tapītā hatu nemanū ika ē soldadobube kashū ē hatu mepāmaxinaki. ²⁸Hanua haskai haki sinatakĩ ha akanimēkaĩ tapīnū ishū dasibi judeu shanē ibubu Sinédrio itxabu anu iyushū ²⁹hatū shenipabū yusĩni Paulō betsa wamis haki sinatakĩ txitekĩ kūyā akaibu ē nīkaxinaki. Hakia hawa txakabu hayamawē taeshū haska ha huni tenātima inū haska bitxiti hiwe merā bitxitimakē ē hatu nemaxinaki. ³⁰Hakia tenānū ika haki yubakaibu nīkatā ha huni hawaira mia anu ē yunua iyukanikiki. Miā mekeyuwe. Habu haki sinataibu judeubu bushū hau harishū txitenūbū mia anu ē hatu yunuriashanaii, hau habū txiteai miāri mĩ nīkashanunā. Ē shanē ibu pepahaira Félixĩ, hatiski, ē hātstarā”,

ashū hatu bumaya

³¹haska wakĩ soldadobu yunua mexu merā Paulo iyuxĩkĩ mae betsa hawē kena Antipátride anu bitxiabū ³²haria hatuki pena soldadobu mexukiri maĩ bexiābu ana Jerusalém anu txītūbiranaibū hatiri soldadobu cavalowē buxiābū Paulo habū iyukubaini ³³Cesaréia anu hikitā Félix anu iyushū kene inākĩ Paulo yunuabu ³⁴kene uĩshū Félixĩ Paulo yukakĩ:

—Mĩ haniamē?— aka

Paulō yuikĩ:

—Cilficia anua ē kaĩniki— ikai ³⁵nīkatā Félixĩ yuikĩ:

—Mĩ haskaya habū mia txitexina beaibutiā hatubetā ē mia nīkashanaii— atā hawa wama Herodesĩ hiwe itamama anushū hau Paulo mekeyunūbū hatu yunuxikē

Hawa txakabuwama xiaĩkiri Paulō Félix yuinikiaki, na hātstarā

24 ¹hanua ma cinco dia binukainaya Deusbe hawenabu hātshunika shanē ibuhaira hawē kena Ananias mae ewapa Cesaréia anu kakĩ judeu mekenika betsabu inū huni unānepa pe hatu hātshunika hawē kena Tértulo Jerusalém anua hatube kai hikitā Paulo txitenū ika shanē ibu Félixĩ besuuri itxabū ²Paulo iweabu Tértulō hakiri txitekĩ taewakĩ shanē ibu Félix yuikĩ:

—Nukū shanē ibuū, mĩ pehairaki. Dasibi pewai duapai unānepai mĩ shanē ibuaya miwē taea unānuma nukū mai pakea anu nū pe hiwekūkaĩmiski. ³Mĩ nuku haska waiwē taea xinā txākākĩ enabū mia kēwākubaūmibuki, mĩ nukū shanē ibu duapahairarā. Eā ē mia habiaskari waii, Félixĩ. ⁴Hatishuĩra hāttxakayamakĩ mia bikawama eskarabes ē mia yuiiai ea nīkayuwe. ⁵Na huni Paulorā, txanimahaira

hakiri pemahaira nū uīaiī. Jesus Nazaré anuatū yusīa txibaību hatu bebūshūkī mai hirabi anua judeubu manibaunabu bikawakī hatu yusī txakakī pashkakī hatu itimaska wakubaīmiskiaki. ⁶Haska besti wama nukū Temploki meseama nuku txakabuwxinaki. Haska waya nukunabū atxiabu nukū shenipabū beya txibākī unāti watā nū kupipañā ⁷soldado comandante Lísias hawē soldadobube kashū hawē kuxipawē taeshū nuku mebīxīshū ⁸nenu mia anushū nū txitenū nuku yunuxinaki. Hanushū mī miā Paulo yukashū haska ē mia yuishu txanimamēkaī mī unātiruki— akaya

⁹nīkatā ha judeu shanē ibubu hatube itxabū Tertulō hātxa abukī Félix yuikī:

—Txanima habiaskaki— akaibū ¹⁰hanushū Paulōri hau hatu hātxa wanū shanē ibu Félixsi yunukī teweshuna hanushū Paulō shanē ibu Félix yuikī:

—Bari itxapa shanē ibukī enabu mī pe hatu mekekubaīmis unai benimakī haska ē hawa txakabuwaisma hamē ea txiteaibu hatū hātxa nemakī ē mia tapīmai nīkawe. ¹¹Deus kēwātanū ika ma 12 dia Jerusalém anu ē hikixinaki, haska txanima miari yuka ikī mī unātiruki. ¹²Hanushū Templo anua inū hanu itxati hiwe anua inū hanira hātchai nishū yurabu ē hatu itimaskawai tsua ē haska wai ea hawa nīkabuma ixiābuki.

¹³Haskawē taeshū ha hunibū mia haskakiri yuiaibuwē taeshū hatū hātxa kayabi hawa hayamaki. ¹⁴Hakia haskakiri ekiri mia yuiaiburā, shabakabi mia yuinū nīkawe. Jesusū Bai Bena nū txibāyā: “Deuskiri kanekanikiki”, iwanā, nuku aki ikanikiki, haskamabiakenā. Jesus ikūwākī nukū shenipabū Deus kēwāpauni ē duawapakemiski, Moisés yusīni inū Deusū hātxa yuishunika betsabūri kenenibu dasibiri ikūwākinā. ¹⁵Haska wakī yura pepabu inū txakabubu kupikatsi Deusū hatu ana bestēwāshanai ikūwākī ē manaii. Habiasri na judeubu nukube itxabū habiaskari manariakanikiki. ¹⁶Haskawē taeshū Deuski inū hunibuki ē xinā txakaismakī, haskai hiwei pepanū ishunā.

¹⁷Haska inū, betsarā, bari itxapa mai hirabi mae tibi kakūkaūtani enabu inākuī hatu beshuī inū Deus kēwākī txashuwā hatu kuamatanū ika ē ana txītūkirāxinaki. ¹⁸Hanushū nukukiri Deus pepa xināmatā Templo hemaītī anushū txashuwā ē inākuīayā eki hawa huni itxabuma inū tsua itimaskabumakē Ásia anua judeu betsabu eki nukushū ea habū itimaska wakī taewaxinabuki. ¹⁹Ea habū haska waxinabu ha Ásia anuabu habu betirubuki, mia bebū shabakabi nishū ea txiteirā, ē haskaxīkē eki sinatai ixiābumēkainā. ²⁰Beabumakē nukū shanē ibubu Sinédrio itxashū ea unāti wakī hawara ē txakabuwamis ea tapīxīshū na shanē ibubū mia haska yuikeākanaii. ²¹Hakia Sinédrio shanē ibū hatū besuuri nishū hātxa kuxipawē hatu yuikī: “Mawabu ana bestēshanaibu ē ikūwaiwē taeshū natiā mā ea unāti waii”, akī Jerusalém anushū ē hatu yuixinawē taea eki sinatai ikanimēkaī. Hatu yukawe— aka

²² Jesusū Bai Benakiri unāhairakī Paulō yuiiai nīkatā judeubu manamakī Félixsi hatu yuikī:

—Hatara comandante Lísias Jerusalém anua huaya ě ana matu unātihairawashūshanai, matunaki. Manayukāwē— hatu waya

²³ hanua hawē haibuaibū Paulo duawakī hau pimayushanūbū hawa hatu nemama hau Paulo hawa wama mekeyunūbū Romano capitāo hatu yunuxīshū

²⁴ hanushū shaba betsaki txipu hawē aī judeu aību hawē kena Drusila iyui Félixsi ana Paulo nīkakatsi hatu kenama Paulo iweabu Jesus Cristo ikūwaikiri hatu yuikī ²⁵ hiwea pepatikiri inū ibubis pe meketikiri inū dasibi txakabu Deusū kupishanaikiri Paulō hatu hātxa wakī yusiaī nīkai datekī Félixsi nitxīkī yuikī:

—Kayuwe, xināshū ana ě daya hayamatiā ana mia nīkakatsis ikī ě mia ana kenashanairā— atā ²⁶ Félixsi Paulokiri xinā betsa wairā: “Ě hawa wama nitxīshanū pei itxapa hau ea ināshanūwē”, ikī Félixsi Paulo hawētxais kenai habe hātxiabiakūkaikī ²⁷ hawē hātxa nīkabiakī judeu shanē ibubu daewakatsis ikī Paulo hawa nitxiāma ma bari dabe ka hanua Félix hawē daya menetā kaikainaya Roma anua shanē ibu betsa hawē kena Pórcio Festo Cesaréia anu shanē ibui taeniki.

Hawa txakabuwama iyamakiri Paulō Festo yuinikiaki, na hātcharā

25 ¹ Hanua shanē ibui Cesaréia anu Festo hikixīshū shaba dabe inū besti ma binuaya Jerusalémkiri bai kayuxīkē ² harishū Deusbe hawenabu hātshashunika shanē ibubu inū judeu shanē ibu betsabu yubakabaī Festo anu bushū Paulo txakabuwakatsi parākī:

³—Haskai mī ma nenuki. Nuku pewashūkī Paulo miāri mī nuku unāti washūkatsi nenu Jerusalém anu hau itanūbū mī hatu yunutirumē?— akabu, haskarā, eska Paulokiri yubakabaī bai tanabiranai nū tenānūbū ika inibukiaki. ⁴ Hafia Festō hatu nemakī yuikī:

—Cesaréia anushū Paulo ma pe mekesū uīkanikiki. Haskakē usha eskarabestā ě ana txītūkainaya ⁵ mā haska ea yuiairā, matū shanē ibubu Cesaréia anu ebe bushū ha hunī hawara txakabuwayama txitekī unātirubuki— hatu waxina

⁶ Jerusalém anushū oito dia kasmai dez dia daki nitxītā Cesaréia anu ana txītūkaini hikixina hanua mexukiri hanushū shanē ibui tsaushū unāti wamisbu anu hari Festo tsautā hau Paulo itanūbū hatu yunua ⁷ iweabu Jerusalém anua bexiā judeu shanē ibubū kebaūshū hawē yusia betsa betsapakiri Paulo txitebiakī hawē haska watima kayakiri Festo yuiaibū ⁸ hanushū hātseri Paulō hawa txakabuwama ikimakiri unāmakī Festo yuikī:

—Ě hawa txakabu hayamakiri ena mia yuinū nīkawe. Deusū nukū shenipabu yušini txibākī ě kaneama inū, Jerusalém anushū Templo ě

hawa txakabuwama inũ, Romano shanẽ ibuhaira Césarki ẽ hawa hakiri txakabu yuismariki— ikaya

⁹hanua judeu shanẽ ibubũ hau Festokiri pe xinãnũbũ, iwanã, Paulo yukakĩ:

—Jerusalém anurã, mĩ kakatsis ikai, harishũ mĩ haskayama hau ẽ mia unãti washanunã?— aka

¹⁰Paulõ kemakĩ:

—Haskamaki. Huni betsa tibi miã mĩ unãti wanũ Romano shanẽ ibuhaira Césarn mĩ habiaska watanũ mia yunuimaki. Haskakẽ na habiatiã mĩ ea unãti watiruki. Haskakẽ enabu judeubu ẽ hawa txakabuwama iyama ẽ mia tapĩmashuki. ¹¹Ë hawara txakabuwayamawẽ taeshũ hau ea tenãnũbũ ẽ hatu hawa nemama ikeanaii. Hakia mia paraĩbũ hau ea tenãnũbũ mĩ shanẽ ibũ hãtxa kanekĩ mĩ ea hatu yunutirumaki. Haskawẽ taeshũ maiwã kesua shanẽ ibuhaira Césarn hau ea unãti washanũ Roma anu ea yunushãwẽ— aka

¹²hanushũ unãnepa merabenãbube Festo hãtxatã Paulo yuikĩ:

—Peki. Césarn hau mia unãti washanũ mĩ ea yukashuki. Hari ẽ mia yunushanaii— axiã hiweyukẽ

Paulokiri Festõ Agripa yuinikiaki, na hãtxarã

¹³txipu shaba eskarabes kakẽ Romanobube shanẽ ibumis judeubũ shanẽ ibu Agripa hawẽ pui Berenicebe Cesaréia anu shanẽ ibu bena Festo uĩkĩ hãtxa wakĩ benimawanũ ika haki bai buxiã ¹⁴habe hiweyuabũ Festõ Paulokiri Agripa hari banabimakĩ:

—Nenu huni betsa mekeshũ Félixĩ eki henebaĩxinaki. Mia yuinũ nĩkawe. ¹⁵Nenua Jerusalém anu ẽ ka Deusbe hawenabu hãtxashunika shanẽ ibubu inũ habũ mekenikabũ txakabu hakiri yuitã ha ẽ kupinũ haki sinatakĩ ea yunuabu ¹⁶hakia eã hatu kemakĩ: “Nũ Romanobunã, nukũ yunua kuxipawenã, e iskaũ detenũbũ nũ haska beyamaki. Hakia hau detenũbũ yunukinã, ha haki kayai haratura txakabu ha dabe unãti warabetã nũ hatu nematiruki, ha ikaiburã”, akĩ ẽ hatu waxina ¹⁷ẽ hatu haska wabirana ea txibãbirãxinabu manakatsi ikama mexukiri hanushũ nũ hatu unãti wamis anu tsaushũ ha huni ẽ hatu yunua iweabu ¹⁸habu bexiãbu benishũ haska hakiri kayakĩ hawa hatũ txakabu tibi waima haskakiri txiteaibu dabanẽ haska ẽ xinaĩkiri hawa yuiabuma ¹⁹hakia haska judeubũ hiwea beya kẽwãmisbu hatu maewamai inũ huni betsa Jesus mawabiani ana hiweaki, akĩ Paulõ hatu yuimis besti hakiri txiteaibu ẽ nĩkashinaki. ²⁰Haska hakiri yuiaibũ hawawẽ ẽ haska watima ea unãtimaska kaya wabu xinãtã Paulo yukakĩ: “Jerusalém anushũ ana harishũ hatubetã ẽ mia unãti wai kashanũ hari mĩ kakatsis ikai?” ẽ wa ²¹hanushũ hatũ ea akĩ: “Hamaki. Shanẽ ibuhaira Césarn hau ea unãti washanũ Roma anu ea yunushãwẽ”, ixĩkẽ hari ea yukaxinanu yunukatsi hau bitxishũ meke bestiyunũbũ ẽ hatu yunuxinaki— aka

²²hanushū Agripā Festo yuikī:

—Ha hunirā, eāri ē nīkakatsis ikai— aka
Festō kemakī:

—Peki. Mexukiri mītsiri mī nīkatiruki— aka

²³hanua ushaxini mexukiri hatū tari pepa sawea hawēruabiranaibu hatu kēwābirākī teperewe mawabainaibū shanē ibu Agripa hawē pui Berenicebe inū Romano soldado shanē ibubu inū Cesaréia anua shanē ibu beshmasbu hanushū unāti wamis dītu anu hikibaina maniabū Festō hatu yunua Paulo iweabū ²⁴hanushū Festō hatu yuikī:

—Shanē ibu Agripa inū nukube itxabuū, na hunikiri matu yuinū nīkakāwē. Jerusalém anushū inū nenushūri judeu itxapabū hakiri txakabu kayakī ea tenāmanū ika biski ikubaixinabuki. ²⁵Hakia haska hakiri yuibiaibū eā ē nīkaxinarā, haskawē dabanā ē tenātiruma xinātā ē haskara wayupanā hamebi ea yukakī: “Hau matū shanē ibu kaya Césarn Roma anushū hau ea unāti washanū ea hari yunuwe”, ea waxina hari yunukatsi ē xināxina ē yunushanaii. ²⁶Hakia hawara txakabuwayamakiri tapī pewamabia shanē ibuhaira César anu ha hunikiri ē hawa keneshū bumatima ē xinaii. Haskawē taeshū hawa txakabuwayamamēkaī, Agripā, natiā mī besuuri ē nitxiāki, hau miāri mī ea unāti washununā, haskakiri kenetā ē bumakatsis ikairā. ²⁷Hamē hawa hawē txakabukiri unāma ē yunua: “Habitiruma benibī!” ishū ekiri xinātiruki— akaya

**Paulō ikūwaibu itxakawabiaya Jesusū katunikiri
Agripa yui txaninikiaki, na hātstarā**

26 ¹hanushū Agripā Paulo yuikī:

—Hani mī hawa txakabuismakiri nuku yuiwe— aka
—Peki— iwanā, hatu mekē sanāshūtā Paulō hatu yuikī:

²—Shanē ibuhaira Agripā, haska ekiri kayaibukiri mia bebū nishū ē haskakūkaīmis ē mia hātxa waīwē taea ē benimaii, na haska judeu shanē ibubu ekiri txakabu txanitxakakī eki kayaiburā. Ē haska hayamaki. ³Mianā, dasibi judeubū beya unākī haska betsa betsapa xinaī nū ha irabemis mī unāhairaiwē taeshū txanima ē hātxa mī nīkatiruki. Ē hātxa teneshū ea nīkayuwe.

⁴Dasibi judeubū ea unā keyukanikiki, ē hatube hiwekūkaunirā, ē mae anuabu inū hanua ē yumeni Jerusalém anuabunā. ⁵Ha dikabi ē berunātū Moisés nukū shenipabu yušini habūs xinā pashkama txibāhairakī nū mekehairamis ē fariseu ikūkaini ea uikubainishū mia yuitirubumēkaī. Hakia ekiri xinaī hāttxatirubumamēkaī. ⁶Haskawē taeshū ē haskarakē daki ea unāti watā kupikatsi haska nukū shenipabu Deusū yubani ikūwākī ē manai ea aki ikanikiki. Hanushū mawabu ana hatu bestēwaī kai Deusū nukū shenipabu yubani ē ikūwaīwē taeshū ea kupikatsis ikanikiki. ⁷Israēli bakebu 12 shukuabu tibitū haska uikatsi manakī

bariri inũ mexu merã Deus kēwākĩ duawakubaĩmisbu keska wakĩ haska manakabu keskari eãri ē ikũwaĩwē taeshũ haska bestiwe taeshũ habũ ea txitei kayanamei ikanikiki— iwanã, itxaburi uĩbaũkĩ ana hatu yuikĩ:

8—Haskakĩ mã ikũwãbumamē, matubunã, mawabu Deusũ ana hatu bestēwãshanairã?— iwanã 9—Eãnã, txanima haskakiri xinã pewariamarã, ē hatu ayuniki, hatu yamawakatsis ikinã, Jesus Nazare anua ikũwaĩbuki sinatairã. 10Na haska akinã, Jerusalém anushũ ē aniki, Deusbe nukunabu hãtxashunika shanē ibubũ hatũ kuxipawē ea yunuaburã. Jesus ikũwaĩbu itxapa atxishũ bitxiti hiwe merã ē hatu mistukubainiki. Hanushũ hatu tenaĩbũ eã hatu nemama habiaskari xinãkĩ pesshũ ē hatu uĩs bestikubainiki. 11Hatu haska wakinã, hawa betsa tukama hanu itxamisbu hiwe tibi anushũ Jesus ikũwaĩbu hau henenũbũ hatu itxakawatxakayamakĩ beshtehairakatsis iki ē hatuki bene bene ikĩ hawa hatu henekatsi ikama judeubumã mae anuri pashaibu habiaria hatuki sinatahairakĩ hatu atxinũ, iwanã, ē hatu katxibãkubainiki.

12Deusbe nukunabu hãtxashunika shanē ibubũ haska nũ akai keska nũ anũ ea hatũ kuxipayaya wakĩ yunuabu Damasco bai tanabaini ma ē kemaya 13bai putxinĩ ma bari mananãbibiakē kakĩ ē uĩayã naiuria bĩ kuxipahaira bari binuatũ ea inũ ē haibuaibu nuku datxashaya 14hanua dasibi mã nũ di ikaya nukunabũ hãtxa Hebreowē tsuãra ea yuikĩ: “Sauloõ, Sauloõ, haskakĩ mã ea itxakawakubainai? Mimebi mã txakabuaii, tsuki ikama ibubis mushaki iki ikasirã”, ea wa 15eãri yukakĩ: “Shanē ibuũ, mã tsua iki ikai?” ē wa hanushũ ea yuikĩ: “Habia ea ikũwaĩbu mã hatu itxakawakubainairã, ē Jesuski. 16Beniriwe, ē mia anu hushukirã. Mia katutã haska mã ekiri dayakũkaini txanikũkaĩshanũ ē mia uĩmashu inũ txipu betsa ē mia uĩmashanairã. 17Ena mia watã judeubu anu inũ judeubuma anu hanu ē mia yunuai anu mã ka ē mia mekepakeshanaii, mia txakabuwatirubumarã. 18Habu anu ē mia yunua kashũ hatu xinã betsa wamakĩ hau unaĩmapakĩ Satanás ana txibãyamanũbũ ē Epa Deusũ hãtxa mã hatu yusĩkubaunũ judeubuma betsa betsapabu anu ē mia yunuaii. Harishũ hatu beru bepesha keska watã ana mexu merã kama keska hakia bĩwē kai keskaibu mã hatu waya hatiritũ ea ikũwaĩbũ hatũ txakabu ē hatu buashunaya Deusũ hatu hiwekuĩmashanikiki, hawa hatu kupiamarã, hawenabu meribi wakinã”, ea waniki.

19Shanē ibuhaira Agripã, haska nũ uĩsma nai anua namai keska ē uĩxina txibãnishũ ē txibãkubaĩmiski, xinã betsa wamarã. 20Harishũ Damasco anushũ dukũ kakape hatu yusĩ taewatã txipu Jerusalém anushũ yusĩriatã Judéia mai pakea hirabi anuabu judeubu inũ judeubuma ē hatu yusĩkĩ: “Xinã betsa wakãwē”, ē hatu wa tsuãra xinã betsa watã Deusũ bake ikũwãkĩ hatũmebi hatũ hiwea bena hayakĩ uĩkubainimabuki, ē hatu unãmakubainarã. 21Ē hatu haska wamiswē taeshũ Templo

anushū judeubū ea atxishū ea tenānū ika iyamabuki. ²²Haskakē Deusū ea merabewaya hawa xinā betsa wama shanē ibubu inū shanē ibuma hatuki txani Moisés inū Deusū hātxa yuishunika betsabū haska bebūkiri kenenibu ishanai ²³yuikī: “Messiasrā, nuitapatā mawai kaikiki. Hanua ha dukū mawa bestēkaina ha dukū nuku bebushuni kaikiki. Haskaxīshū nū judeubu inū judeubuma hawē pashati bai shaba kayabi ibubis Messias txani kaikiki”, inibu habiaskari haskakiri ē hatu yusikubaīmiski— akaya

Shanē ibuhaira Agripa Paulō Jesus ikūwāmakeanikiaki, na hātẓarā

²⁴Paulō haska hawē hiweakiri yuiyai nīkai Romano shanē ibu Festo e itā unāshubima yuikī:

—Pauloō, mī patapaki. Kene itxapa unāi mī unaīsmapakūkainaii— aka

²⁵Paulō kemakī:

—Shanē ibu pepahaira Festoō, ē unaīsmapakiri hātẓamaki. Txanima shabakabi hātẓa kayabi besti ē matu yuiyai. ²⁶Haskarā, ha shanē ibu Agripā Deusū hātẓa unaīwē taeshū dateama haskakiri hātẓakī ē yui ikaii. Haska eā ē hakiri xinānā, unā keyuriaikiki. Txanima Jesus hawa huneama habiaskariai hiwekūkainiki— iwanā, ²⁷Agripakiri besushū yuikī: —Shanē ibu Agripā, Deusū hātẓa yuishunikabū kenei haskakiri ē mia yuiairā, mī ikūwai? É xinānā, mī ikūwaii— aka

²⁸Agripā kemakī:

—Mī xinānē, mī hawaira ea Cristo txibāmakatsis ikai?— aka

²⁹Paulō ana yuikī:

—Hawaira kasmai txipu kasmai mia inū dasibibū natiā habū ea nīkaibu ē ikūwai keskakī mā Jesus haibu warianū Deusū hau matu kenarianūwē, hakia na ē ika keskai mane dispiwē matu tsuā meneshamarā— hatu wa

³⁰hanushū hatu haska wai nīkatā judeu shanē ibu Agripa inū Romano shanē ibu Festo inū Berenice inū shanē ibu betsabū hatube tsauwa ³¹tari meribi benibaī hamauria Paulokiri habu hātẓanamekī yuikī:

—Ha hunīnā, hawa txakabuwaismawē taeshū tenātima inū bitxiti merā bitxitimaki— ikaibū

³²hanushū Agripā Festo yuikī:

—Ha huni hawawama mī nitxītirubia hamebi: “Hau Césarn ea unāti washanū”, ikī mia yukaxinarā, hari nitxīyushāwē— akabu

Roma anu Festō Paulo yununikiaki, na hātẓarā

27 ¹hanushū Romano maiwā kesua Itália mae ewapa Roma anu shanē ibu dasibi binuatū hau Paulo unāti wanū hari nuku nitxīkatsi xināxīshū hau nuku iyunū capitão Júlio soldado hawē shukua ewapa kena César Augustonarā, Paulo inū habu bitximisbu betsabū hatu Festō inākī yunukī:

—Roma anu iyukĩ hatu mekehairakubaĩtãkãwẽ— aka ²mae Adramítio anua niwe shashu ewapa Ásia anu kaiwẽ haki nuku naneabu mai pakea Macedônia mae betsa Tessalônica anua nukũ haibu Aristarco nukube kaya iãnẽwã kesha patãkubaini ³hanu ushaxini kai mae betsa Sidom anu nũ keti ikaya capitão Júliõ Paulo duawakĩ heneyua hanushũ Jesus ikũwaĩbu hawẽ haibuaibuki hau hatuki bayutanũbũ, iwanã, nemama kakẽ betxitã pimakĩ duawaxiãbu ⁴hanua Sidom anua bestẽkaini kai natukã ewapa hawẽ kena Chipre nũ kapanã niwe beaiwẽ taea dũkebaini ⁵mai pakea dabe Cilícia inũ Panflia besuuri iãnẽwã dũkebaini kai atimas mai pakea betsa Lícia anu hawẽ mae betsa Mirra anu nũ hikia ha shashu nũ hawẽ kai henetã

⁶hanua maei niwe shashu ewapa Itáliakiri kai Romano soldadobu capitão Júliõ benabaũkĩ betsa Alexandria anua kai betxitã ana hawẽ kakatsi haki inatã nũ kai ⁷unãshubirahaira kakũkaini ushakũkaini iãnẽwã patãkubaini dayatxakayamakubaini mae betsa Cnido besusi niwẽ nuku niti aka nuku haska wa yusmauri natukã betsa Creta dũkebauni mae betsa Salmona natukã kesua binubaini ⁸niwẽ nuku kamama teshkitã unãshubira kai bikahairakũkaĩkĩ natukã Creta kesha patãkubaini atimas mae betsa Laséia dapi hawẽ kena Bons Portos anu nuku keti akabu nũ hikikẽ

⁹niwe pepa manakubaini usha itxapakũkaini hawaira kainama judeubu samakemisbutiã ma binukẽ ui pakei taei niwẽwã bei meseaya haskawẽ taeshũ bebũkiri hatu nemakĩ Paulõ yuikĩ:

¹⁰—Hunibuũ, haska ẽ xinaĩ matu yuinũ nĩkakãwẽ. Eã ẽ uiaĩnã, nĩkamas nũ kaya niwe mesehaira bekĩ nuku shashu bitxia matũ shekiwã inũ nukũ mabu dasibi shashuyabi benui keyutiruki. Nukuri hasai nukũ hiwea nũ benuriatiruki. Buyamayunãkãwẽ— hatu wa

¹¹hanushũ hatũ shashu bumis inũ shashu ibu niti ikatsi ikama capitão Júliõ habu besti nĩkaniki, Paulõ hãtxa nĩkamarã. ¹²—Nenu Bons Portos bai butua txakabuki. Haskanushũ nũ matsi binutirumaki— ikaya dasibibũ habiaskasri xinaĩ: —Haskakenã, nenua buirã, Creta natukanu Fenice mae anu bunãkãwẽ, hanu bai butua peki, noroestekiri inũ sudoestekiri uĩakiri hanu baxikutã nũ ui binuyunũbunã— ikaibũ

Niwẽwãnẽ hamakiri hatu iyunikiaki, na hãtxarã

¹³hanua ana bunũ ishũ xinãtã buaibũ niwe kuxipama duakabi sulkiria pe shũku ikaya:

—Peki. Eskawẽ nũ katiruki, hawa bikamarã— ika ana kai taei natukã Creta hawẽ kesha hawama nũ patãkubainaya ¹⁴hanua hawaira natukãkiria niwe mexupa kuxipa bekĩ iã namakis nukũ shashu nuku tu akubainaya ¹⁵haska washũ ana tsitsũwãtũ ana ha kaikiri butima niwẽwãnẽ txixtekiri buaiwẽ taeshũ shashu hawẽ tuẽbaĩti heneabu niwẽ besti shashu bini bini

abainaya ¹⁶hanua natukã hatiuma hawē kena Cauda hunea hauri niwe shūku ikamauri dūkebaĩkĩ hawē hasai pashati shashu pixta daneshekea kai nuitapatã dayahairatã mapemakĩ nũ nanea: ¹⁷“Nukũ shashu ewapa muxitiruki”, iwanã, shashu ibu dayashūmisbũ dispi kuxipawē shashu daweshekubaĩkĩ keyutã nespã hawē kena Sirte anu teshke itiruki ika datekĩ ha shashu dakereshkaĩ bitxai hau haki teanũ, iwanã, hi keku pukuabu hatũ mestēwãkē niwē tu abaĩmis tari ewapari hawē hi mashkenãyãbi pekashũ butekĩ nũ peka niwēwãnē shashu tu akubainaya ¹⁸hanua ana penaya niwēwã ana kuxipa bekĩ shashu dabe dabe atxakayamaya shashu narabeketirukē datekĩ shashu shãka duakabi wanũ ishũ ha mabu buaibu hatiri iã merã datekĩ pukukĩ taewaibũ ¹⁹hanua usha dabexina ana penaya niwēwã maĩriamakē ha niwē hawē tu abaĩmis tari ewapa inũ hawē txibu inũ hawē nabe inũ mashkenã dasibi dispiyabi shashu anua hatubetã mekenē dasibitũ shutukĩ iã merã nũ pukuabu ²⁰hanushũ niwē nuku itxakawakubainaya mexu tibi bixi uiyama inũ shaba tibi bari uiyamari: “Nũ peamaki, haniara hasakĩ nukũ hiwea nũ benui kaii”, ikaibũ

²¹natiã datekĩ hawa piabuma ikubainaibũ hanua Paulo hatu naxui ika benikaũ hatu yuikĩ:

—Hunibuũ, ē hãtxa nĩkatã Creta anu mã baxikuxianã, bika txakabu mã meama ikeanaii. ²²Haskabiaya punu nukayamakãwē. Natianã, shashu besti benuaya nuku dasibi nũ mawama ishanaii. Matu yuinũ nĩkakãwē. ²³Mexu merã ē Deus ha ē dayashūmis ea mekemistũ hawē nai tsuma yunua hushũ ²⁴ea yuikĩ: “Pauloõ, dateyamawe. Romano shanē ibuhaira César mĩ uĩ kanũ Deusũ mia merabewakĩ ha dasibi shashũ mibe buaibu miwē taeshũ hatu tenãma ē hatu pasha washanaii”, akĩ ea yuishuki. ²⁵Hunibuũ, ana punu nukama benimakãwē. Eãnã, ē Deus ikũwãyã haska ea yubashu ashanai ē ha xinaiĩ, nũ haskai kai hawē nai tsumã ea yuishurã. ²⁶Hakia natukã betsa anu nuku teawai kaikiaki— hatu wa

²⁷hanua Creta anua buimabu ma semana dabe kaya mexu betsatiã iãnēwã deshũ betsa hawē kena Adriático anu niwē nuku shutukubaunaya iãnēwã buspu tsubaĩkĩ nuku dabe dabe akubainaya shashu ibu dayashūmistũ unãshubira bana nĩkatã xinaĩ: “Nũ ma mai kemaii”, ishũ ²⁸hawē nua meti dispiwē mea ³⁶metro tanatã ana ha katxu shekekainaya ana mekĩ ²⁷metro tanariatã ²⁹mixkiki keti ikĩ tsakai kaya datekĩ hawē shashu tsumakĩ mai betãti shãkama dabe inũ dabe shashu txishukiri pukuabu niti ikē hau Deusũ penaya uĩmakĩ hatu merabewanũ manai manixinaibũ ³⁰shashu pixta butetã pashanũ, iwanã, shashũ dayamisbũ hatu paraĩ shashu debukiria hawē mai betãti betsari pukui itsai paranantã pashai bupanãbũ ³¹hakia haskaibukiri unãkĩ capitão Júlio inũ soldadobu Paulõ hatu yuikĩ:

—Habũ shashu ibu dayashūmisbu habu besti pashaibunã, maturã, mã haskatã pashatirubumaki. Hatu nemakãwē— hatu wa

³²hawē bupanābū capitão datekī hawē soldadobu yunua ha dispiwē shashu pixta neshabu meshteabu iānē pukukainaya

³³ma pena kemaya hau pinūbū Paulō xinākī hatu yunukī:

—Menā dasibitū hawara pirikāwē, mā haskai ikai ma semana dabe kabia usha tenekī uīkubaikī mā hawa piama ē matu uīāinā. ³⁴Haskakē ē matu yunuai. Punu nukama mā pashakatsis ikairā, pirikāwē. Mā nuitapabiai mā hawa txakabui benuama ishākanai. Ē hātxa ē matu yuiai hakimayamakāwē— hatu washū

³⁵haska hatu yuitā Paulō misi bishū dasibibū besuuria dakeama Deus kēwātā misi tūkeshū pikī taewayā ³⁶hanushū unāshubira benimabaū habūri piaibū ³⁷ha shashuwē nukubu nū buaiburā, 276 yura nū iniki. ³⁸Hanushū yaniwatā shashu ana shākawakī shekiwā putakī teshe waxinabu ana hawē henekī pukukī keyuabū

**Shashu ewapa hawē buaibu dabekea hashka
hashka inikiaki, na hātstarā**

³⁹hanua penaya uībaūkī shashu ibu habu dayashūmisbubetā hanira kesha betsauri hanu unābuma anu buabu hawa unāma hakia hawē deshū anu maxi uītā:

—Maxiuri nū teai katirumēkaī. Hauri bunākāwē— hatu wa ⁴⁰habū habiaskari xinākī hawē tsitsūti haimā nea pekashū shashu debu anu ha niwē tu abaīmis tari pixta ana pūtetā iā anu henekī hawē mai betāti dispi haki neshea meshteabu maxikiri tu iki nunukaini kemai taeaya ⁴¹hakia hene hanus kuxibirani anu uke merā maxi tsakai hanu uīyama teshke ika ana harakiri katima hene kuxipai buspu tsaubirākī shashu txishu tsaka tsaka akī hashka hashka akī taewayā ⁴²huni bitxiyamabu nunai hau pashai hunebaīyamanūbū yubakatā soldadobū hatu detekatsis ikaiibū ⁴³hakia Paulo hatu mekemakatsis ikī soldado capitão Júliō hatu nematā nunanikabu habu dukū hau pukubaī maxī mapekenūbū hatu yunua ⁴⁴nuna unābumari ha katxu shashu nabe inū shashu tuash ikaiwē hau bunūbū dasibi nuku yunua haskai dasibi nū nunubaini maxi metsatā nū mapekebirābirani keyuniki, pashai tsua hasamarā.

Natukā Malta anu Paulo niti iyunikiaki, na hātstarā

28 ¹Hanu dasibi hasama maxī nū mapekei keyukē natukā hawē kena: “Maltaki”, ikī nuku yuiabu nū nīkaya ²ha uīa nuku aka shūska nū matsi teneaya hanu yura betsa hiweabu dasibi nukuwē nuikī nuku duawakī karu itxapa kuashū nū yui bunūbū nuku kenabu ³hari kashū Paulō metash itxawashū txi anu mātixikī kuaya metash anua txi kuai anu shana mebirani dunu pianā tashnikirā itxukirā hawē mekēki pikī mukua dunukē ⁴ha hanua yurabū hawē mekē anu dunu dunua uī hawē datei yuinamekī:

—Na hunirã, pubêkĩ yura betsa tenaĩmamêkaĩ. Iãnẽwã anua pashabiashukẽ dunu yunukĩ nukũ mekenika yushĩ pepatũ hiwea inãma kupikikirã— ikaibũ
 5 haka hawaira Paulõ hawẽ mekẽ meixkukĩ txi anu dunu putatã hawa meama kayakẽ 6 hanushũ dasibibũ xinãkĩ: “Meshashatã hawaira mawaimêkaĩ”, ishũ manahairabiaibũ hawama kayakẽ haskaya xinã betsa watã habũ yuikĩ:

—Ha hunirã, yushĩ kuxipamêkaĩ, dunũ pibia isĩ teneama kayakĩ!— akaibũ
 7 hanua habia iãnẽwã keshã txaimã natukã shanẽ ibu hawẽ kena Públiõ hawẽ mae ewapa kesuakea anua hushũ nuku iwãkĩ mapemaxĩshũ shaba dabe inũ besti hawẽ hiwetãshũ nuku pimakĩ pewakĩ nuku duahairawaya 8 hatu haska waitiã Públiõ epa yuna inũ txishu tenei dakakẽ Paulo yuiabu uĩ kashũ hau merabewanũ Deusũ kuxipa yukashütã hau shushanũ haki mepitã mea hawaira maiãyã 9 natukã Malta anushũ nĩkakĩ keyubauni hau eari shushawanũ ika isĩ teneabu bebirã bebiranaibu hatu shushawai ushe dabe inũ besti Malta anu nũ hiweyuniki.

Roma anu Paulo hikinikiaki, na hãtxarã

10-11 Malta anushũ nuku duahairawaibũ ui inũ niwe txakabu maĩkũkainaya niwe shashu ewapa betsa Alexandria anuari Romano yushĩ hi dami dabe hatũ kena Castor inũ Pólux shashu hawẽ debukiri netãnibu ma niwe pepa taeaya ha shashuwẽ ana nũ inai taekainaya nũ haya katanũ tari inũ piti nuku inãkuitã nuku haya nitxiãbu

12 hanua hawẽ pukei kaĩkaini natukã ewapa Sicilia anu mae betsa Siracusa anu hikitã hanua shaba dabe inũ besti nũ manayuaya 13 hanua ana kakĩ iãnẽwã patãkubaini Itãlia mai pakea anu mae betsa Régio anu hikiriãtã ushaxini sulkiria niwe pepa ana bei taeaya ana kai usha dabetã hanira hawẽ mabu mapemakatsi mae betsa Putéoli anu hikishũ shashu anua bututã 14 hanua Jesus ikũwaibuki nũ nukua nuku pimayuabũ semana bestitxai hatuki nũ bayua hanushũ Romakiri maĩ soldadobũ nuku iyukĩ taewaibũ 15 Roma anushũ ikũwaibũ nũ huai bana nĩkatã bai putxinĩ nukuki nukukatsi beaibũ hanua inãnanãmisbu hawẽ kena Ápio anu nũ hatuki nukua nukube ana bui txitũbainaiibũ mae betsa hawẽ kena Três Vendas anu ikũwaibu betsa beaibukiri nũ hatuki nukuria haibu itxapabu uĩ Paulo benimai xinã txãkãkĩ Deus kẽhairawaya 16 ana kai mae ewapa Roma anu nũ hikia huni bitxinibu betsabũ Romano shanẽ ibubũ hau hatu ana bitxinübũ hatũ soldadobu yunutã haka Paulo haska wama hau tari meribi hiwe betsa anu soldado bestitxai habe meneshekerabetã hau mekekubaishanũ yunuabu

Paulõ Roma anushũ hatu yusikubainikiaki, na hãtxarã

17 hikixina usha dabe inũ besti binukainaya Roma anu judeu shanẽ ibubu hiweabu hau habe itxai benübũ Paulõ hatu kena bea ma itxabu hatu yuikĩ:

—Enabuĩ, ekiri matu yuinũ nĩkakãwẽ. Nukunabuki inũ nukũ shenipabũ beya ẽ hawa wama kayabiakẽ Jerusalẽm anushũ ea atxishũ Romanobũ hau ea bitxinũbũ ea hatu mexui akimabu ¹⁸ea unãti watã habũ ea nĩka haska tenãtimakẽ ea nitxĩpanãbũ ¹⁹nukunabu shanẽ ibubũ ea betsa betsapawaibũ enabube yuãnanaĩ kayanamekatsi ikama hau nenushũ Romano shanẽ ibuhaira Césarn ea unãti washanũ Festo ẽ yukayamaki. ²⁰Haskawẽ taeshũ mã ea uĩ ebe hãtxai benũbũ ẽ matu kenaxinaki. Nũ Israelbũ ha Deusũ nuku yubani nũ manakaibuwẽ taeshũ haskarawẽ dabanã ea mane dispi txiwetameyawẽ soldadobe ea meneshxinabumẽkaĩ, mã eki nukuyununã— hatu wa

²¹ha itxabu betsã Paulo yuiki:

—Judéia anushũ mikiri kene nuku bemabumaki. Ha inũ, nukunabu hukĩ mikiri hawa txakabu nuku yuiabumariki. ²²Na haska yusĩa bena mĩ ikũwaĩ mae tibi anushũ abuama danãmisbu nũ nĩkabiamis haskara mĩ xinaĩ nũ nĩkakatsi ikaii— aka

²³hawatiãra ana itxashanaibu shaba katutã: —Hanu nuku ashãwẽ— abaĩxinabu judeu itxapabu hanu Paulo hiwe anu itxai beabu Deus shanẽ ibuaikiri yusĩkubaikĩ Moisés inũ Deusũ hãtxa yuishunika betsabũri kenenibuwẽ Deusũ Messias Jesuskiri Paulõ hatu ikũwãmakatsis ikĩ bari txai hatu tanamakĩ hatu yusĩbaiaya ²⁴haska Paulõ hatu yusĩa hatiritũ ikũwaibũ hatiri betsabũri danãkĩ ikũwãbumakẽ ²⁵haskakiri xinãma hatũmebi itimaskatã inũ bui beni taebainaibũ Paulõ eskakiri hatu yuiki:

—Shabakabi matũ shenipabukiri Deusũ Yushĩ Papatũ hãtxamakĩ Isafas yuimaki:

²⁶‘Kakaĩ ha yurabu yuiritãwẽ.

Habũ hãtxa itxapa nĩkabiakubaĩmisbu hawa unãma ishãkanikiki.
Itxapa uĩbiakubaĩmisbu hawa uĩama ishãkanikiki.

²⁷Hau uĩyamanũbũ hatũ beru bekua keskabuki.

Hau nĩkayamanũbũ hatũ pabĩki pabepukua keskabuki.

Na yurabu bushka kuxibũ hawa tapĩkatsis ikabumaki.

Hau ẽ hatu merabewakĩ shushawapanã ea danaĩ
ea anu bekatsis ikabumaki’,

aka matũ shenipabu yusitã Isafasĩ nuku keneshuniki. ²⁸Haskakẽ nukunabu nĩkabumakẽ natiã unuri Deusũ judeubuma hatu mekekatsis ikai hau habũ nĩkanũbũ hanuri bushũ hatu yusishãkanikiki, hawa niti ikamarã. Haskanikiri matũri xinãkãwẽ— hatu wa ²⁹Paulõ haska hatu yusĩa nĩkabiata habe kenamebaini inũ buaibũ

³⁰hiwe inãyuumabu pakakubaikĩ hanushũ bari dabe nitxĩ hanu haki bai buaibu dasibi haska habe hãtxakatsis iki buaibu hatu i pewakubainiki. ³¹Tsuã hawa nemama Deus shanẽ ibushanaikiri shabakabi hatu yusĩkĩ Deusũ Messias Jesus Cristo mekenãkiri Paulõ hatu yusĩpakekubainiki, tsuã hawa bika tenemamarã.

Teófiloõ, hatiski, Jesuskiri hawẽ tsuma kuxipayabu dayakubainibukiri hãtxarã.

Lucas